

Luk ndê ṽawaê ṽayham Yom whê ṽawaê ṽayham dindéc sa-ṽga

Luk inṽ Yisu ndê ṽgacsêṽnom dom, ma inṽ ṽgac Israel-ṽga dom. Inṽ ṽgac Grik-ṽga, ma inṽ dokta, ma bocdinaṽ tanyalê bu inṽ ṽgac tigauc. Luk dau gêlic gêṽ honṽ naṽ Yisu kôm, naṽ dom, magoc inṽ kip yom honṽ sa yêc lau naṽ sêṽbo sêṽhinṽ Yisu têṽ ndoc inṽ gic hu ndê gwelenṽ e inṽ mbu pi undambê gi (1:1-4). Luk ndê ṽawaê ṽayham hêganônṽ Yisu ti inṽ ndê gwelenṽ, ma inṽ to bapia danṽ tiyham (Aposel) pi gwelenṽ naṽ lau aposel sêkôm ṽa ṽalau Dabunṽ ndê ṽaclai.

Yêc inṽ ndê yom ṽamata-ṽga, Luk sôm bu inṽ to yom têṽ ṽgac atu danṽ ṽaê Tiopilas. ṽaê dau danem kwi bu ‘ṽgac naṽ atac whiṽ Anötö.’ Magoc inṽ to tu ṽgac tigenṽ dinaṽ-ṽga dom, inṽ to ndê ṽawaê ṽayham hêganônṽ lau naṽ lau Israel dom gitôm inṽ dau, ma lau Israel-ṽga sêṽhinṽ. Inṽ tac whiṽ bu ṽac sêṽyalê bu Yisu, inṽ lau Israel-ṽga si Mesaya, ma inṽ menṽ gic waê lau Israel-ṽga tawasê dom, magoc menṽ bu ti lau honṽ si Pômdau, ma bu mbac ndu tu lau honṽ-ṽga. Ma bocdinaṽ Luk tac whiṽ bu Yisu ndê ṽawaê sa têṽ gameṽ nom-ṽga honṽ, bu lau sêṽgô ma sêkêṽ whiṽ Yisu, dec oc sêtap Anötö ndê mwasiṽ nem ṽac si-ṽga sa.

Yom ṽamata-ṽga

¹ O ngac atu Tiopilas. Lau daêsam sêṅsahê bu sêto yom pi gêṅ hoṅ naṅ ṇandô sa yêc yac mba gameṅ.
² Ṇac sêto sêṅkuc yom naṅ lau naṅ sêmbo sêwhiṅ Yisu têṅ ndoc iṅ gic hu ndê gwelen, naṅ sic dulu têṅ yac. Lau dau sêlic gêṅ hoṅ naṅ Yisu kôm pi tandô, dec sêhoc ṇawaê ṇayham asê pi gêṅ dau. ³ Ma aô bocdinaṅ, gakip yom hoṅ sa pi gêṅ ṇamata-ṅga ma meṅ têṅ kwahic dec, ma galic ṇayham bu wato sip bapia dindéc ma waṅkiṅ têṅ am. Aô gato yom kakuc ṇadênaṅ tôm gêṅ hoṅ naṅ hôc asê. Tu dinaṅ-ṅga O ngac atu Tiopilas, ⁴ am oc êmyalê bu yom hoṅ pi Yisu naṅ am ṅgô su, naṅ yom ṇandô.

Jon, Ngac Kêku Lau-ṅga ndê puc dinda kôc iṅ-ṅga

⁵ Têṅ têm Kiṅ †Herod gêm gôliṅ gameṅ Judia-ṅga, naṅ †dabuṅsiga daṅ mbo, iṅ ndê ṇaê Sekaria. Iṅ kôm ndê gwelen whiṅ dabuṅsiga naṅ sêmbo dabuṅsiga ṇamata-ṅga Abaisa* ndê toṅ. Sekaria ndê awhê ndê ṇaê Elisabet, ma iṅ Aron† ndê wakuc daṅ, gitôm Sekaria dau. ⁶ Anötö gêlic iṅlu sêsa lêṅ gitêṅ yêc iṅ aṅgô-ṅga, sêṅsêlêṅ sêṅkuc Anötö ndê yomsu ti ṇagôliṅ ṇalêṅ ṇayham. ⁷ Iṅlu sêti

* **1:5:** Abaisa - dabuṅsiga ṇamata-ṅga daṅ naṅ mbo têṅ Kiṅ Dawid ndê têm. Têṅ têm dinaṅ lau Israel si dabuṅsiga sêwhê dau kôc ti toṅ 24 kêkuc dabuṅsiga ṇamata-ṅga si ṇaê (1 Kr 24:7-19; ma Nia 12:11-17). Ma tiṅambu sêkôm gwelen tôm ṇatoṅ 24 dinaṅ sêyô dau sêyô dau. Têṅ Yisu ndê têm, lau dabuṅsiga daêsam sêndôc gameṅ ṇamakê-ṅga, ma sêpi Jerusalem tu sêkôm gwelen yêc †lôm dabuṅ tôm ṇac si toṅ si ndoc, ma tiṅambu sêmbu sêtêṅ si gameṅ si (Luk 1:8, 23). Alic yom whê ṇaê ‘dabuṅsiga’ sa-ṅga yêc buku dindéc ṇambu-ṅga. † **1:5:** Aron - lau Israel si dabuṅsiga ṇamata-ṅga naṅ gêm akiṅ Anötö têṅ Moses ndê têm. Alic Eks 7:1-6; ma 28:1.

awhê andô ma ngac andô su, magoc balêkoc mba, bu Elisabet in awêhê gapoc.

⁸ Têñ tēm danj Sekaria ndê toñ si ndoc sênem akinj Anötö-nga hôc asê, ma in gêm ndê gwelenj dabuñsiga-nga mbo Anötö ndê lôm dabuñ yêc Jerusalem. ⁹ Ma gitôm dabuñsiga si mêtê, sêpuc gapoc gi sip Sekaria, bu sôc lôm dabuñ ñalôm ndi, ma kêñ da ñamalu ñayham. ¹⁰ Ma têtñ ndoc in sôc gi bu kêñ da ñamalu ñayham, nan lau Israel-nga hon nan sêkac sa tu s êtoc Anötö sa-nga, nan sêtenj mbec sêlhac awê. ¹¹ Têtñ ndoc dinanj Pômdau ndê anela danj hoc dau asê têtñ Sekaria, ma kalhac alta da ñamalu-nga ña-ndö-nga. ¹² Têtñ ndoc Sekaria tandô pi anela dau, in sô ti töt dau ñandô. ¹³ Magoc anela sôm têtñ in, “Töt daôm dom Sekaria, bu Pômdau ngô mbec nan am tenj. Am nem awêhê Elisabet oc kôc atômngac danj, ma am oc sam in ndê ñaê bu Jon. ¹⁴ In oc kôm am atac ñayham atu, ma lau daêsam oc sêtisambuc tu dinda kôc in-nga, ¹⁵ bu in oc ti ngac tiwaê yêc Pômdau anğô-nga. In oc nôm wain me bu ñanğa dom, magoc têtñ tēm in yêc dinda atac ñalôm enj, nan Nalau Dabuñ oc nem in ahuc, ma mbo whin in ñapanj. ¹⁶ Ma têtñ ndoc in tiatu, nan in oc nem lau Israel-nga daêsam kwi, sêmbu sêsôc Pômdau ñac si Anötö ñapu. ¹⁷ In oc ti propet ñanğa ma ti ñaclai gitôm propet ñamata-nga Elaija. Ma in oc munj Pômdau, bu nem lau daêsam si ñalôm kwi. Dambai oc atac whin atui, ma lau dangapêc oc sêti lau ti gauc nan sêsa si lêtñ gitênj. Nalênj dinanj in oc êmasanj lau si ñalôm bu sêkôc Pômdau sa.”

¹⁸ Sekaria ngô anela ndê yom dinanj su, goc sôm têtñ in, “Alu atî awêhê andô ma ngac andô su. Boc-

dinan ɲalêɲ bocke dec aö wanyalê bu am nem yom oc ɲandô sa?” ¹⁹ Goc aɲela ô yom ma sôm, “Aö Gabriel nan galhac Pômdau aɲgô-ɲga, ma in kênin aö bu wahoc ɲawaê ɲayham dindéc asê têt am. ²⁰ Gêt nan aö gasôm yom pi, nan oc ɲandô sa tôm ɲandoc. Tigen am kêt whin aö dom, ma bocdinan am oc awham mba sa, ma sôm yom dom e gêt hon dindéc hôc asê su.”

²¹ Têt dinan lau nan sêmbo awê, nan sêhôn Sekaria ma gauc gêm bu bocke ma in mbo tiwandêc yêc lôm dabun ɲalôm. ²² Ma têt ndoc Sekaria mbu sa awê gi, nan gitôm dom bu sôm yom, ma gic amba ɲambwa têt ɲac, dec ɲac si gauc sa bu in gêlic gêt ɲagatu dan yêc lôm dabun ɲalôm.

²³ Tinambu in ndê bêt gwelen-ɲga pacndê, ma in kôlhô mbu têt ndê malac gi. ²⁴ Ma in ndê awhê Elisabet daê, dec timêtê dau ɲapep, ma mbo ten mbo inlu si andu gitôm ayô aman dan. Elisabet sôm, ²⁵ “Pômdau kôm gêt dindéc ma gêm aö sa. ɲamata-ɲga aö gambo ti mayan yêc lau aɲgô-ɲga, bu aö awhê gapoc, tigen kwahic dec Pômdau tawalô aö, ma kôc aö mayan su.”

Yisu ndê puc dinda kôc in-ɲga

²⁶ Elisabet daê gitôm ayô 6 su, goc Anötô kênin aɲela Gabriel têt malac Nasaret nan yêc gamen Galili-ɲga, ²⁷ bu kêt ahen têt awhê akin dan. In ndê ɲaê Maria, ma lau sêhoc yom asê su bu Maria oc nem ɲgac dan ɲaê Josep, nan Kin Dawid ndê apanɲac dan. ²⁸ Aɲela dau têt Maria gi ma sôm, “O awhê nan Anötô tac whin am ndu andô, Pômdau whin am.” ²⁹ Yom dau kôm Maria sô ɲandô, ma in gauc gêm têt dau bu, “In awha gic aö tu sake-ɲga?”

³⁰ Goc aņela sôm tēņ in, “Töc daôm dom Maria, bu Anötö gêlic am ñayham kêlêc. ³¹ Am oc daêm ma kôc balêkoc ñgac daņ, ma sam in ndê ñaê bu Yisu. ³² In oc ti ñgac tiwaê, ma lau oc sêsam in bu Anötö Ñaclai ti Ñawasi Ñadau ndê Atu. Pômdau Anötö oc kēņ in wêkain apanğac Dawid ndê pōņ kin-ņga. ³³ In oc nem gôlin †Jakob ndê wakuc lau Israel-ņga, ma in ndê gôlin oc pacndê dom.”

³⁴ Goc Maria ndac aņela dau bu, “Aö gayêc gawhin ñgac daņ dom, ma bocdinaņ yom dau oc ñandô sa ñalêņ bocke?” ³⁵ Ma aņela ô yom ma sôm, “Ñalau Dabuņ oc tēņ am meņ, ma Anötö, Ñaclai ti Ñawasi Ñadau ndê ñaclai oc nem am ahuc. Tu dinaņ-ņga balêkoc dabuņ naņ am oc kôc, naņ lau oc sêsam in bu Anötö ndê Atu. ³⁶ Ma am ñgô! Elisabet, awhê andô naņ yêc am apami si toņ, naņ daê ma oc kôc balêkoc daņ. Sêsôm bu in awhê gapoc, magoc kwahic in daê tôm ayô 6 su. ³⁷ Bu gēņ daņ yêc dom, naņ Anötö gitôm dom bu kôm ñandô sa.” ³⁸ Ma Maria ô yom ma sôm, “Pômdau ndê awhê akin aö. Bocdinaņ, yom naņ am sôm, naņ ñandô sa pi aö.” Maria sôm yom dinaņ su, goc aņela hu in sin.

Maria gic Elisabet kêsi

³⁹ Tēņ tēm dinaņ Maria kêmasaņ dau, ma kêsêlêņ ñagahô tēņ malac daņ yêc gameņ ñabaö Judia-ņga gi. ⁴⁰ In hôc asê ma tēņ Sekaria ndê andu gi, ma ta Elisabet ndê ñaê. ⁴¹ Tēņ tēm Elisabet ñgô Maria ndê yom, naņ balêkoc naņ yêc in ñalôm kwê soc ti ñaņa, ma Ñalau Dabuņ gêm Elisabet ahuc. ⁴² Ma in sôm yom awha atu, “Anötö toc am sa hôc gêlêc lauwhê sambob su, ma oc toc balêkoc naņ am oc kôc, naņ sa bocdinaņ. ⁴³ Aö awhê bocke, dec am,

anenɲ Pômdau dinda mwenɲ bu lic aö? ⁴⁴ Têɲ ndoc aö ganɲô am mbwêc aö, nanɲ balêkoc nanɲ yêc aö ɲatac, nanɲ kwê soc ti atac ɲayham. ⁴⁵ Am kêɲ whinɲ bu Pômdau ndê yom p i am oc ɲandô sa, ma tu dinanɲ-nga am tap inɲ ndê mwasiɲ sa!”

Maria po Anötö ndê waê sa

⁴⁶⁻⁴⁷ Ma Maria sôm:

“Aö wapo Pômdau ndê waê sa ti anenɲ ɲalôm sambuc, ma aö atac ɲayham kêlêc tu Anötö nanɲ gêm aö si-nga. ⁴⁸ Nahu bu inɲ kêlhin inɲ ndê awhê akinɲ ɲambwa, aö dec siɲ dom. Têɲ kwahic dec ma ndi, lau honɲ oc sêsam aö bu awhê nanɲ Anötö kêmwasiɲ. ⁴⁹ Inɲ Nanga Nadau nanɲ kôm gêɲ atu têɲ aö, ma inɲ ndê ɲaê dabuɲ.

⁵⁰ Tôm têm sambob, inɲ tawalô lau honɲ nanɲ sêtoc inɲ ma sêtoc inɲ sa. ⁵¹ Inɲ amba ɲanga kôm gêɲ atu, ma lau nanɲ yom sêtoc dau sa-nga gêm ɲac si ɲalôm ahuc, nanɲ inɲ soc ɲac su sêlhô têtên.

⁵² Inɲ kêmasuc kinɲ nom-nga su yêc ɲac si pônɲ kinɲ-nga, magoc lau nanɲ sêɲgwiniɲ dau, nanɲ inɲ toc ɲac sa.

⁵³ Inɲ kêmwasiɲ lau ɲalôm sawa ɲa gêɲ ɲayham-ɲayham, magoc inɲ kêkinɲ lau ti lélôm sêsa amba sawa si. ⁵⁴⁻⁵⁵ Inɲ gêm inɲ ndê lau akinɲ Israel-nga sa, ma tôɲ yom nanɲ inɲ gic bata têɲ abanɲ Abraham, ma têɲ inɲ ndê wakuc honɲ nanɲ sêɲkuc inɲ, nanɲ inɲ tawalô ɲac.”

⁵⁶ Maria kêpiɲ Anötö ma sôm yom dinanɲ su, goc mbo whinɲ Elisabet gitôm ayô tö, ma tinambu inɲ kôlhô mbu têɲ ndê malac gi.

Elisabet kôc Jon

⁵⁷ Elisabet ndê ndoc menj sa dec inj kôc balêkoc ngac danj. ⁵⁸ Ma inj ndê dawai ti lau menpan inj-nga sêngô bu Pômdau tawalô inj nalên dinanj, ma nac honj atac nayham sêwhinj inj. ⁵⁹ Tênj balêkoc dau ndê bêc ti-8-nga, nac honj sêmenj bu sêsê balê ndê namlic natô su sênkuc lau Israel-nga si t̃pwac, ma nac tac whinj bu sêkênj damba Sekaria ndê naê pi inj. ⁶⁰ Tigenj inj dinda sôm, “Mba! Dasam inj ndê naê bu Jon.” ⁶¹ Ma sêsôm tênj inj, “Yêc am nem dawam, ngac naê Jon danj mbo dom.” ⁶² Ma nac sic amba tênj damba bu sênjalê naê bocke inj tac whinj. ⁶³ Inj kôm na amba bu sêkênj tapele danj tênj inj, dec sêkênj ma inj to, “Inj ndê naê Jon,” goc lau honj sêhêdaê. ⁶⁴ Ma ngaghô inj êmbala tigolonj, ma inj sôm yom asê ma kêpij Anötö.

⁶⁵ Gênj dau kôm nac lau honj sêsö, ma lau nanj sêmbo Judia ngamenj lôc-nga, nanj sem yom-galôm napanj pi gênj honj dinanj. ⁶⁶ Lau honj sêngô nawae, ma nac gauc gêm yom dau napanj yêc nac si nalôm. Ma nac sêlic bu Pômdau ndê naclai tôc dau asê yêc balê dau, dec sêndac dandi, “Inj oc ti namalac kainj bocke?”

Sekaria hoc yom asê gitôm propet

⁶⁷ Tênj têm dinanj Nalau Dabunj gêm Jon ndê damba Sekaria ahuc, ma inj hoc yom asê gitôm propet danj ma sôm,

⁶⁸ “Tampinj Pômdau, yac lau Israel-nga nenj Anötö, bu inj menj bu nem inj ndê lau si. ⁶⁹ Inj po ngac ti naclai danj sa yêc inj ndê ngac akinj Dawid ndê lau wakuc, nanj gitôm bu nem yac si. ⁷⁰ Anötö ndê propet dabunj sêhoc yom asê pi gênj dau munj su, ma kwahic dec Anötö kôm yom dau nandô sa. ⁷¹ Inj kêmasanj lêng dinanj, bu

nem yac si yêc yac neŋ ŋacyo ti lau naŋ sêtec yac amba. ⁷² In tawalô yac, tôm in gic bata têŋ abanŋ, ma gauc gêm in ndê pwac dabuŋ, ⁷³ naŋ in kêmatiŋ tidôŋ whiŋ abanŋ Abraham. ⁷⁴ In oc nem yac si yêc yac neŋ ŋacyo amba, tu bu yac danem akiŋ in ti atac pa su, ⁷⁵ ma tu bu taŋsêlêŋ dasa lêŋ gitêŋ ti dabuŋ yêc in aŋgô-ŋga tôm bêc hoŋ. ⁷⁶ Ma Jon, aneŋ balê, lau oc sêsam am bu ‘Anötö, Naclai ti Nawasi Nadau ndê propet,’ bu am oc muŋ Pômdau ma êmasaŋ lau si ŋalôm tu sêkôc in sa-ŋga. ⁷⁷ Ma am oc whê Anötö ndê lau si gauc sa pi lêŋ naŋ in oc suc ŋac si sac kwi tu bu nem ŋac si-ŋga. ⁷⁸ Yac neŋ Anötö ndê lêŋ tawalô yac-ŋga, naŋ oc tôm ac naŋ pi ma kalhac umbonŋ, ⁷⁹ ma pô lau naŋ sêndôc gameŋ ŋasec, ma lau naŋ sêmpinŋ bu sêmbac ndu. In oc wê yac dasa seŋ bu datap yom malô sa.”

⁸⁰ Tiŋambu balê dau tiatu, ma kêŋ ndê ŋalôm sambuc tu nem akiŋ Anötö-ŋga. Ma in mbo gameŋ sawa e tôm bêc naŋ in gic hu ndê gwelenŋ, dec gêm mêtê kalhac lau Israel aŋgô-ŋga.

2

Maria kôc Yisu

¹ Têŋ têm dinaŋ †Sisa Ogasta gic atu yom bu sêsê lau hoŋ naŋ sêmbo Rom si gôlinŋ ŋapu, naŋ sa tu bu sênemlhi takis-ŋga. ² (Têŋ ndoc dinaŋ Kirinios gêm gôlinŋ gameŋ Siria-ŋga, ma gêŋ dinaŋ ti têm ŋamata-ŋga naŋ sêsê lau sa yêc in ndê gôlinŋ ŋapu.) ³ Bocdinaŋ lau hoŋ sêtêŋ si malachu si, bu sêto si ŋaê sip bapia sêsê ŋac sa-ŋga.

⁴ Josep in Dawid ndê wakuc dan, ma bocdinar in hu malac Nasaret yêc gameŋ Galili-nga sin, ma sip têt Dawid ndê malac yêc gameŋ Judia-nga gi, malac nan sêsam bu Betlehem. ⁵ Josep lu Maria sêwhin dau si bu sêkêŋ si ɲaê, bu sêhoc inlu si yom asê su bu oc sênem dau. Ma Maria daê mbo. ⁶ Têt ndoc inlu sêmbo Betlehem, nan Maria ndê bêt bu kôc balêkoc-nga hôc asê. ⁷ Josep lu Maria sêyêc bêt si mala, bu ɲasawa mbasi yêc andu ɲaclêŋ-nga. Ma yêc dê, Maria kôc in ndê balêkoc ɲac ɲamata-nga. Ma in kôm in si ɲa po, ma kêt in yêc bêt si apa sêneŋ gêtŋ-nga.

Aŋela sêhoc Yisu ɲawaê asê

⁸ Têt ôbwêc dinan lau ɲatô sêyob si domba sêmbo malac dau ɲamakê. ⁹ Ma Anötö ndê aŋela dan hoc dau asê têt ɲac. Pômdau ndê ɲawê pô ɲac, ma sêtôc dau ɲandô. ¹⁰ Goc aŋela dau sôm têt ɲac bu, “Atôc daôm dom! Aô bu wakêŋ ɲawaê ɲayham dan têt mac, nan oc kôm mac atac ɲayham atu. Ma ɲawaê dindêc gic waê lau hon. ¹¹ Mac nem ɲac nem mac si-nga hôc asê têt bêt dau dindêc. In dinda kôc in yêc Betlehem, malac nan sêsam bu Dawid ndê malac. In †Mesaya dau nan Anötö gic bata bu êŋkiŋ meŋ, ma mac nem Pômdau dau. ¹² Atêt Betlehem andi, ma mac oc aŋyalê balêkoc dau pi gêt bocdec bu. Sêkôm in si ɲa po, ma sêkêŋ in yêc bêt si apa sêneŋ gêtŋ-nga.” ¹³ Ma ɲagahô aŋela undambê-nga daêsam sêhoc dau asê sêwhin aŋela dinan, ma sem wê sêmpin Anötö bocdec bu, ¹⁴ “Anötö ndê waê sa yêc lôlôc. Ma yom malô yêc nom, têt lau nan Anötö gêlic ɲac ɲayham.”

Lau sêyob domba-nga sêtên Betlehem si

¹⁵ Anjela sem wê dinan su, goc sêmbu sêpi undambê si. Ma lau sêyob domba-nga sêsôm têt dandi, “Ayôc! Datên Betlehem dandi, ma dalic gêŋ atu nan Pômdau ndê anjela sêhoc asê têt yac.” ¹⁶ Goc sêhsahic dau sêtên Betlehem si, ma sêtap Maria lu Josep sa, ma sêlic balêkoc dau yêc bôc si apa sênen gêŋ-nga. ¹⁷ Sêlic in su goc sêsa si, ma sic min yom nan anjela hoc asê têt nac pi balêkoc dau. ¹⁸ Ma lau hon nan sêngô nac si yom, nan sêhêdaê nandô. ¹⁹ Magoc Maria gauc gêm yom hon napan yêc ndê nalôm. ²⁰ Ma lau sêyob domba-nga sêlhô sêmbu sêtên gamen sêyob domba-nga si. Sêmpin Anôtô ma sêtoc in ndê waê sa tu gêŋ hon nan sêngô ti sêlic, nan gitôm anjela sôm asê têt nac.

Sêtoc Yisu yêc lôm dabun

²¹ Têt bêt 8 giŋga su, sêse balê ndê namlic natô su, kêkuc lau Israel-nga si pwac. Ma sêsam in ndê η aê Yisu, tôm anjela sam in têt ndoc in kêŋ puc Maria bu in oc daê.

²² Mun-nga, Moses to yomsu dan pi lauwhê Israel-nga nan sêkôc balêkoc, nan yêc bocdec bu. Sêhôn e bêt 40 pacndê, goc nac oc ηawasi sa tiyham yêc Anôtô ango-nga. Bocdinan têt Maria ndê bêt 40 pacndê su, goc inlu Josep sêkôc Yisu sêtên lôm dabun yêc malac Jerusalem si, bu sêtoc in yêc Pômdau ango-nga. ²³ Sêkôm bocdinan kêkuc Pômdau ndê yomsu nan Moses to bocdec bu, “Asam balêkoc ngac mbêt hon bu dabun yêc Pômdau ango-nga.” ²⁴ Ma têt têt dinan inlu sêkên da bu Maria ηawasi sa tiyham. Sêkên da tôm Pômdau ndê yomsu, balusi lu me mbac saun lu.

25 Têṇ tēm dinan ṇgac dan ṇaê Simeon mbo Jerusalem. In ṇgac gitêṇ ti dabun, ma in ḥon ndoc bu Anötö êṇkin in ndê Mesaya bu nem lau Israel-ṇga si. Nalau Dabun whin in tøm bēc hon, 26 ma tēṇ ndoc dan, kēṇ gauc tēṇ in bu in oc mbo tali e lic Mesaya nan Pômdau gic bata. 27 Ma Nalau Dabun wê Simeon tēṇ lôm dabun gi, tēṇ bēc nan Yisu dinda lu damba sêkôc in sêmen bu sêkēṇ da sêṇkuc Moses ndê yomsu. 28 In pê Yisu sa, goc kêpin Anötö ma sôm, 29-30 “O Pômdau atu, yom nan am gic bata su, nan kwahic dec ṇandô sa. Aô tanôn galic am nem †ṇgac Nem Lau Si-ṇga su, ma bocdinan dec oc tøm bu am nem ṇgac akin aô dec wambac ndu ti atac malô. 31 Am kêmasan lēṇ dindec yêc lau hon aṇgô-ṇga. 32 Am nem ṇawê oc pô lau hon, bu tøm am asê tēṇ lau gamen apa-ṇga, ma bu po am nem lau Israel-ṇga si waê sa.”

33 Simeon sôm yom dinan pi Yisu, dec kôm Yisu dinda lu damba sêhêdaê. 34 Goc Simeon gēm mbec ṇac, ma sôm tēṇ Yisu dinda Maria, “Anötö kêyalin balê dindec sa, ma tu in-ṇga lau Israel-ṇga daêsam oc sêpen, magoc daêsam nan sêkēṇ whin in, nan oc sêtap Anötö ndê mwasin sa. In men bu tøm Anötö ndê lēṇ asê tēṇ lau, magoc daêsam oc sêpu in ti ndê yom, 35 ma ṇalēṇ dinan gauc nan yêc lau daêsam si ṇalôm, nan oc men sa tiawê. Ma tu gēṇ nan oc ḥoc asê in-ṇga, am daôm oc ḥoc ṇandê atu tøm bien kun am ṇatê.”

36 Propet awhê dan mbo lôm dabun ṇabatêmdö. In ndê ṇaê

Ana, ma in damba in Panuel, nan yêc Aser ndê

tonj.* Ana in ti awhê andô su. Mun-nga in gêm ngac su ma inlu nakwen sêmbo sêwhin dau gitôm yala 7, ³⁷ goc nakwen mbac ndu ma Ana ti awhê sawa ma mbo e in ndê yala ti 84. Tôm acsalô ti ôbwêc hon in gêm akin Anötô mbo lôm dabun nabatêmdö, ma têt daêsam in hu gên danen-nga sin tu nem dabun dau ti tenj mbec nanja-nga. ³⁸ Têñ têt nan Simeon ndê yom pi Yisu pacndê, nan Ana têt nac gi, ma gêm danje Anötô. Ma in gic hu sôm yom pi balêkoc têt lau hon nan sêhôn ndoc nan Anötô oc nem lau Jerusalem ti Israel-nga si.

³⁹ Josep lu Maria sêkôm gên hon têt Pômdau ndê yomsu sôm, goc sêmbu sêtên nac si malac Nasaret yêc gameñ Galili-nga si. ⁴⁰ Ma Yisu tiatu ma ti balê ti licwalô. Ma gauc nayham ma Anötô ndê mwasin gêm in ahuc.

Yisu mbo lôm dabun

⁴¹ Tôm yala hon Maria lu Josep sêpi Jerusalem si, bu sêlic om atu †Pasowa-nga. ⁴² Têt Yisu ndê yala ti 12, nan nac hon sêpi si, têt inlu si gêbôm. ⁴³ Ma têt ndoc Mwasin Pasowa-nga pacndê, goc Maria lu Josep sêhu Jerusalem sin bu sêmbu sêtên inlu si malac sêndi. Yisu gacgen mbo Jerusalem, magoc inlu sênjalê dom, ⁴⁴ bu sênsêlên sêmbo sen sêwhin lau tonj atu, dec sem gauc bu in oc mbo lau tonj atu dinan nalom. Sêhu Jerusalem sin sêsa si gitôm bêc dan, goc sênjalê in yêc nac si lau. ⁴⁵ Sêtap in sa dom, dec bêc tilu-nga inlu sêmbu sêtên Je rusalem si, bu sênjalê in. ⁴⁶ Sêhóc asê Jerusalem, ma naganasê sêtap in sa yêc lôm dabun. In ndöc whin lau nan

* **2:36:** Aser - Jakob ndê atui 12 si dan. Lau Israel sêwhê dau kôc ti tonj 12 sênkuc apai 12 dinan (alic Gen 35:26).

sêndôhôn mêtê, ma in kên danga nac si yom. Ma in ndac nac pi gên daêsam. ⁴⁷ Lau hon nan sêngô in, nan sêhêdaê tu in ndê gauc-nga, ma tu yom hon nan in ô têt kêdôhônwaga-nga.

⁴⁸ Têt ndoc Maria lu Josep sêlic in, nan sêhêdaê. Ma Maria ndac in, “Ane balê, tu sake-nga am kôm gên dindec têt alu damam? Alu anjalê am ti nalôm nawapac.” ⁴⁹ Ma Yisu ndac inlu, “Tu sake-nga amlu anjalê aô? Daman ndê andu dindec, ma aô gac waê bu wambo dec.” ⁵⁰ Tigen nac sênyalê in ndê yom nahu dom.

⁵¹ Goc Yisu whin inlu, ma sêmbu sêtêt malac Nasaret si, ma in danga wambu têt inlu napep. Ma in dinda gauc gêm yom hon dinan napan yêc ndê nalôm. ⁵² Ma Yisu tiatu ma ti ngac tigauc, ma Anötö ma namalac hon sêlic in nayham.

3

*Jon, Ngac Kêku Lau-nga kêmasan Yisu ndê sen
(Mat 3:1-12; Mak 1:2-8)*

¹ Tinambu Taibirias ti lau Rom-nga si kin atu,* ma têt in ndê yala ti-15-nga, nan in ndê la u bata bocdec sem gôlin lau Rom-nga si gameŋ natô. Pontias Pilot gêm gôlin gameŋ Judia-nga, †Herod Antipas gêm gôlin Galili, Herod ndê dôwa Pilip gêm gôlin Ituria ma Trakonitas, ma Lisantias gêm gôlin Abelin. ² Ma Anas lu Kayapas sêti l au Israel-nga si †dabunŋiga namata-nga. Têt ndoc dinan Anötö kêkin in ndê yom têt Jon, Sekaria ndê atuŋac nan mbo gameŋ sawa. ³ Bocdinan Jon gic hu in ndê

* **3:1:** Kin atu nan gêm gôlin gameŋ Rom-nga hon nan sêsam bu †Sisa.

gwelen. In golom-golom malac hon nan yêc Bu Jordan namakê, ma gêm mêtê bu lau sêlin sanğu tu bu sêtôc asê bu sêkac si nâlôm kwi ma sêhu mêtê sac sin, dec Anötö oc suc nac si sac kwi.

⁴ Propet Aisaya hoc yom asê pi Jon mun su, tôm in to yêc ndê buku bocdec bu:

Namalac dan ta yom yêc gameŋ sawa bocdec bu, ‘Amasan Pômdau ndê sen. Amasan nem nâlôm bu akôc in sa.

⁵ Busun hon oc sêti gameŋ apa-pa, ma lôc ti nabaö hon oc sêti gameŋ gapon. Sen mbwê hon oc sêtisolop, ma sen hoc-hoc oc sêti sen nayham.

⁶ Ma lau nom-nga hon oc sêlic Anötö ndê lêŋ nem lau si-nga.’ *[Ais 40:3-5]*

⁷ Ma tu dinan-nga Jon sôm têŋ lau daêsam nan sêsa si bu in êŋku nac, “Mac mboc natui mac! Tu sake-nga mac alhö amen? Mac akôc gauc pi Anötö ndê atac nandê nan lau propet sêkêŋ puc yac bu oc meŋ sa, dec gauc gêm bu amen ma alin busanğu nambwa, a? ⁸ Anğô! Akôm mêtê nayham nan tôc asê bu mac am daôm kwi yomandô. Asôm têŋ daôm dom, bu ‘Abraham apai yac, ma tu dinan-nga Anötö oc kôc yac sa.’ Aö wasôm têŋ mac bu Anötö gitôm bu nem hoc hon dindac kwi sêti Abraham atui sêô mac. ⁹ A hon nan sem nandô nayham dom, nan kwahic dec Anötö kêŋ ki namata têŋ nawakac, ma in oc lêŋ su ma tuc pi ya ndi.”

¹⁰ Lau ton atu dinan sêngô Jon ndê yom ma sêndac in, “Bocdinan yac oc akôm sake?” ¹¹ Ma in ô yom ma sôm, “Tamwalô lau natô. Mac nem asa ndê nakwê nandô-nga lu bu sêyêc, nan kêŋ dan têŋ lau

nañ si ñakwê mbasi. Ma asa ndê gêñ danen-nga yêc, nañ nem lau nañ sêpônda dau, nañ sa bocdinañ.”

¹² Lau sêkôc takis-nga ñatô sêsa si bu Jon êñku ñac, ma sêndac, “Kêdôhônwaga, yac oc akôm sake?”

¹³ Goc Jon sôm têtñ ñac, “Akôc takis ñapep, ma ahôc gêlêc dôhôn nañ lau Rom-nga sêkên, nañ dom!”

¹⁴ Ma lau sin-nga ñatô sêndac in, “Ma yac, oc akôm sake?” Ma in sôm, “Angôlin yom tasan pi lau, me akôm gêñ ti ñaclai bu angaho ñac si mone me gêñ dom. Akôc ñaôli gwelen-nga nañ lau Rom-nga sêkên têtñ mac, ma tamgatu awa ñatô dom.”

¹⁵ Têtñ têtñ dinan lau Israel-nga sêkên bata bu Anötö oc êñkin in ndê Mesaya, ma lau hon nañ sêngô Jon, nañ sêhê gauc bu mboe in Mesaya dau.

¹⁶ Magoc Jon sôm têtñ lau hon, “Ngac dan oc men hóc asê. In ndê ñaclai hóc gêlêc aô nen su. Aô ngac ñambwa, gitôm dom bu wati in ndê ngac akin nañ kêgapwêc in ndê atapa ñawalô. Aô dec kaku mac ña bu ñambwa, tigen in oc êñku mac ña Nalau Dabun ti ya. ¹⁷ In men bu êñsahê lau, gitôm ngac nañ whê wit ñandô ti ñapa kôc, dec oc ndic ñandô sa sôc andu gêñ ñandô-nga, ma tuc ñapa sip ya nañ sa ñapan ndi.”

¹⁸ Nalên dinan Jon hoc ñawaê ñayham asê têtñ lau, ma gêm la ñac ña yom ñannga daêsam.

¹⁹ Tinambu Jon puc Kin Herod ndê giso asê, bu Herod gêm in asi ndê awhê Herodias, ma kôm mêtê sac daêsam whin. ²⁰ Dec Herod gêm dau si, ma kôm giso dan tiyham bocdec bu, in kên Jon ndôc gapocwalô.

Jon kêku Yisu

(Mat 3:13-17; Mak 1:9-11; Jon 1:32-34)

²¹ Têñ tēm nañ Herod kêñ Jon ndöc gapocwalô su dom, nañ Yisu sa tēñ Jon gi, ma Jon kêku in whiñ. Tiñambu Yisu kalhac ma tēñ mbec mbo, ma undambê kac sa, ²² ma Nalau Dabuñ gēm balusi aṅgô, ma sip meñ sac Yisu ñahô. Ma awha dan sa akêñ undambê, nañ sôm, “Aô neñ Atunḡac atac whiñ-ṅga am. Aô gatisambuc am ñandô.”

Yisu ndê apai si ñadênañ

(Mat 1:1-17)

²³ Yisu gic hu ndê gwelen tēñ in ndê yala gitôm 30. Ma in ndê apai bocdindec. Lau sêsam Yisu bu Josep atu. Ma Josep in Eli atu, ²⁴ nañ Matat atu, nañ Liwai atu, nañ Melki atu, nañ Yanai atu, nañ Josep atu, ²⁵ nañ Matatias atu, nañ Amos atu, nañ Nahum atu, nañ Esli atu, nañ Nagai atu, ²⁶ nañ Mat atu, nañ Matatias atu, nañ Semin atu, nañ Yosek atu, nañ Yoda atu, ²⁷ nañ Yoanan atu, nañ Resa atu, nañ Serubabel atu, nañ Siltiel atu, nañ Neri atu, ²⁸ nañ Melki atu, nañ Adi atu, nañ Kosam atu, nañ Elmadam atu, nañ Er atu, ²⁹ nañ Josua atu, nañ Eliesa atu, nañ Yorim atu, nañ Matat atu, nañ Liwai atu, ³⁰ nañ Simeon atu, nañ Juda atu, nañ Josep atu, nañ Yonam atu, nañ Eliakim atu, nañ Melea atu, ³¹ nañ Mena atu, nañ Matata atu, nañ Natan atu, nañ Dawid atu, ³² nañ Jessi atu, nañ Obed atu, nañ Boas atu, nañ Salmon atu, nañ Nason atu, ³³ nañ Aminadab atu, nañ Ram atu, nañ Hesron atu, nañ Peres atu, nañ Juda atu, ³⁴ nañ Jakob atu, nañ Aisak atu, nañ Abraham atu, nañ Tera atu, nañ Naho atu, ³⁵ nañ Serug atu, nañ Reu atu, nañ Peleg atu, nañ Eber atu, nañ Sela atu, ³⁶ nañ Kenan atu, nañ Apakad atu, nañ Sem atu,

naŋ Noa atu, naŋ Lamek atu, ³⁷ naŋ Metusela atu, naŋ Inok atu, naŋ Yared atu, naŋ Mahalalel atu, naŋ Kenan atu, ³⁸ naŋ Inos atu, naŋ Set atu, naŋ Adam atu, naŋ Anötö atu.

4

Sadaŋ kêtôm Yisu

(Mat 4:1-11; Mak 1:12-13)

¹ Nalau Dabuŋ gêm Yisu ahuc ma in hu Bu Jordan sin. Ma Nalau wê in bambalin mbo gameŋ sawa ² gitôm bêc 40. Yêc dindê Sadaŋ kêsahê bu êntôm in. Tôm bêc hoŋ dinaŋ Yisu gêŋ gêŋ daŋ dom, ma tiŋambu gêŋ yô in ŋandô. ³ Ma Sadaŋ sôm têt in, “Am Anötö ndê Atu, a? Bocdinaŋ sôm têt hoc dindêc bu nem dau kwi ti bolom.” ⁴ Magoc Yisu ô yom ma sôm, “Mba! Sêto Anötö ndê yom yêc bocdec bu, ‘*Gêŋ danêŋ-ŋga ŋambwa kêŋ lau sêndöc tali dom.*’ ”

⁵ Goc Sadaŋ kôc in sa pi lôc baliŋ daŋ gi, ma ŋagahô in tôc têt in gameŋ hoŋ naŋ kiŋ nom-ŋga sem gôliŋ. ⁶⁻⁷ Ma in sôm, “Gêŋ hoŋ dindêc yêc anêŋ gôliŋ ŋapu. Ma gitôm bu wakêŋ têt asa naŋ aô atac whiŋ naŋ. Am bu pôt hamduc têt aô, dec wakêŋ ŋaclai ti ŋawasi hoŋ dindêc têt am.” ⁸ Ma Yisu ô in ndê yom ma sôm, “Mba! Sêto yom yêc bocdec bu, ‘*Pôt hamduc têt Pômdau am nem Anötö, ma nem akiŋ in tiger.*’ ”

⁹ Goc Sadaŋ wê in pi malac Jerusalem gi, ma kêŋ in kalhac lôm dabuŋ ŋapoc lôlôc, ma sôm têt in, “Am Anötö ndê Atu, a? Dec pwê sip akêŋ dec ndi. ¹⁰ Am oc tisac dom, bu sêto yom yêc bocdec bu, ‘*Pômdau oc êŋkiŋ ndê aŋela bu sêyob am.* ¹¹ Nac oc

sêpê am sa lôlôc bu am tiŋ gahim pi hoc daŋ dom.’ ”

¹² Magoc Yisu ô yom bocdec bu, “Sêto yom yêc bu, *Êmsahê Pômdau am nem Anötö dom.*’ ”

¹³ Nalên dinaŋ Sadaŋ kêsahê lên daêsam tu êntôm Yisu-ŋga. Ma tiŋambu iŋ hu iŋ siŋ ma kôlhô gi, bu hôŋ têm daŋ tiyham.

Yisu gic hu ndê gwelen yêc Galili

¹⁴ Nalau Dabuŋ ndê ŋaclai gêm Yisu ahuc, ma iŋ mbu têtŋ gamen Galili-ŋga gi. Ma ŋawaê pi iŋ sa têtŋ gamen ŋamakê-ŋga hon gi. ¹⁵ Iŋ kêdôhôn lau yêc ŋac si lôm wê-ŋga, ma lau hon sêmpiŋ iŋ.

Yisu ndê lau sêsoc iŋ yêc ndê malac Nasaret

¹⁶ Tiŋambu Yisu hôc asê iŋ ndê malachu Nasaret. Yêc dinaŋ iŋ kêkuc ndê gêbôm, ma têtŋ bêc †Sabat-ŋga iŋ sôc lôm wê-ŋga gi. Iŋ tisa kalhac bu sam Anötö ndê mêtê, ¹⁷ ma sêkêŋ propet Aisaya ndê bapia tilhuŋ têtŋ iŋ. Yisu kac bapia dau sa, ma kêsâlê yom naŋ sêto yêc bocdec bu:

¹⁸ Pômdau kêŋ ndê Nalau gêm aô ahuc, dec kêyalin aô sa bu wasôm ŋawaê ŋayham asê têtŋ lau ŋalôm sawa. Iŋ kêkin aô bu wasôm asê têtŋ lau bu Anötö kêmasaŋ lên bu êŋgapwêc ŋac su yêc gapocwalô, ma bu kôm lau tapec si tandô po asê, bu wanem lau naŋ si ŋacyo sêŋgwiniŋ ŋac, naŋ sa, ¹⁹ ma bu wanem mêtê bu kwahic dec Pômdau kêyalin têm wakuc sa bu êmwasiŋ lau.

[Ais 61:1-2]

²⁰ Yisu sam yom dau su, goc kêlhuŋ bapia dau sa tiyham, kêŋ mbu têtŋ dabuŋwaga, ma ndôc sic. Lau hon naŋ sêndôc lôm, naŋ tahê iŋ, ²¹ dec iŋ gic hu ndê yom ma sôm, “Yom naŋ mac aŋgô, naŋ ŋandô sa têtŋ acsalô dindec.”

²² Lau hon sem yomgalôm pi in ti sêlic in nayham, ma sêhêdaê tu in ndê yom nayham-nga. Ma sêsôm têt dandi, “In Josep ndê atungac. Bocke ma in sôm yom kain dinan?” ²³ Ma Yisu sôm têt nac, “Aö kayalê mac nem gauc. Mboe mac oc asôm yom gôlin dindêc têt aö, ‘Dokta, nem daôm sa.’ Gêh nan aö gakôm yêc malac Kapenaom, nan mac angô nawaê su, dec mac atac whin bu aö wakôm tiyham yêc dec, a?” ²⁴ Ma in sôm, “Yomandô! Yêc propet dan ndê malac, in ndê lau oc sêkôc in sa dom. ²⁵ Têt propet Elaija ndê têt, nan lauwhê sawa Israel-nga daêsam sêmbo. Têt ndoc dinan u gic dom e tôm yala tö ma ayô 6, ma tôbôm atu gêm gamen ahuc. ²⁶ Tigen Anötô kêkin Elaija têt awhê sawa Israel-nga dan dom, magoc kêkin in bu nem awhê sawa dan sa yêc Sarepet, malac nan yêc Saidon nagamen. ²⁷ Ma têt propet Elaisa ndê têt, nan lau ti gêmbac fleprasi daêsam sêmbo lau Israel-nga nalôm. Tigen Elaisa kôm Israel si dan nayham sa dom. In gêm ngac Siria-nga Naman tawasê sa.”

²⁸ Yisu ndê yom dinan kôm lau nan sêndöc lôm wê-nga, atac nandê atu. ²⁹ Sêtisa ma sêsoc in ma sêkôc in sa sêtêt salic sac nan yêc malac dau namakê, bu sêsuc in sip ndi. ³⁰ Tigen in kêsêlên gic nac kôc, ma kölhö gi.

Yisu kêdôhôn lau ma soc nalau sac yêc malac Kapenaom

(Mak 1:21-28)

³¹ Tinambu in mbu têt malac Kapenaom nan yêc gamen Galili-nga gi. Têt bêt Sabat-nga in kêdôhôn lau. ³² Nac sêhêdaê tu in ndê yom-nga, bu in kêdôhôn lau ti nac lai atu. ³³ Ma ngac dan nan nalau

sac mbo in̄ ɲalôm, nan̄ ndöc lôwê-ɲga dinan̄. In̄ mbwêc aw̄ha atu, ³⁴ “Ei! Yisu Nasaret-ɲga. Aô kayalê am, am ɲgac dabun̄ nan̄ Anötö kêkin̄. Am bu kôm sake tēɲ yac? Am mwen̄ bu sen̄ yac su, a?”

³⁵ Magoc Yisu hec yom ɲalau sac dau ma sôm, “Am maman̄ ma hu in̄ sin̄!” Goc ɲalau sac kôm ɲgac dau pen̄ sip nom gi yêc lau hon̄ angô-ɲga, ma sa yêc in̄, magoc kôm in̄ tisac dom.

³⁶ L au hon̄ sêhêdaê tu gēɲ dinan̄-ɲga, ma sêsôm tēɲ dau, “Yom bocke nan̄ in̄ kêdôhôn̄? In̄ gic atu yom ɲan̄ga ma ti ɲaclair tēɲ ɲalau sac, ma soc ɲac su!”

³⁷ Ma tin̄ambu lau sic min̄ pi Yisu e in̄ ndê waê gēm gamen̄ hon̄ dinan̄ ahuc.

Yisu gēm lau gēmbac daêsam sa

(Mat 8:14-17; Mak 1:29-34)

³⁸ Yisu tisa ma hu lôwê-ɲga dau sin̄, ma tēɲ Saimon ndê andu gi. Saimon ndê lawawê gēmbac lic ɲandê atu, dec sêndac Yisu bu nem in̄ sa. ³⁹ Goc Yisu tēɲ in̄ gi, ma gic atu bu gēmbac dau hu in̄ sin̄. Ma ɲagahô aw̄hê dau tisa ma gēm akin̄ ɲac.

⁴⁰ Tēɲ telha dinan̄ ac gi sip su, goc lau sêkôc lau ti gēmbac hon̄ sa akēɲ ɲac si andu, ma sêtēɲ Yisu si. In̄ kêɲ amba sac ɲac hon̄, ma kôm ɲac ɲayham sa.

⁴¹ Ma in̄ soc ɲalau sac daêsam su, ma sêhu lau sin̄ ti sêmbwêc, “Am Anötö ndê Atu.” Magoc in̄ hec yom ɲac, ma kêɲ yao bu ɲac sêsôm in̄ asê dom, ɲahu bu ɲac sēɲyalê bu in̄ Mesaya dau.

Yisu hu malac Kapenaom sin̄

(Mak 1:35-39)

⁴² Tēɲ bēbêc ganduc Yisu hu malac dau sin̄, ma sa gi bu mbo tawasê. Ma lau malac-ɲga sêsa si bu sēɲsalê in̄, ma tēɲ ndoc sêtap in̄ s a, nan̄ sêten̄ in̄

bu hu ñac siñ dom. ⁴³ Magoc in sôm tênh ñac, “Mba! Aõ gac waê bu wasôm ñawaê ñayham pi †Anötö ndê gôlinj asê yêc malac ñatô whin. Anötö kêkinj aõ tu gwelenj dinan-nga.” ⁴⁴ Ma in golom-golom malac nanj sêyêc gamenj Judia-nga, ma gêm mêtê tôm ñac si lôm wê-nga honj.

5

*Yisu kêgalêm ñgacsênjomi ñamata-nga
(Mat 4:18-22; Mak 1:16-20; Jon 1:35-42)*

¹ Tênh bêc danj Yisu kalhac Bugictonj Genesaret* ñamakê. Ma lau daêsam sêkac sa ma sêngihi in ahuc tu bu sêngô Anötö ndê yom nanj in hoc asê. ² Yisu gêlic lau sêkôc i-nga ñatô sêngwasinj si wasanj sêmbo baõ, ma ñac si wanj lu sêpoc sunj sa tênh baõ. ³ Dec in pi wanj danj gi, ma ndac wanj ñadau, ñgac nanj sêsam bu Saimon, bu hêc wanj dau sa awê ñagec. Goc in ndöc sic ndöc wanj, ma kêdôhônj lau nanj sêlhac baõ.

⁴ Tênh têm Yisu gic bata in ndê yom, nanj sôm tênh Saimon, “Hêc wanj sa bugictonj ñagaponj ndi, ma kêñ nem wasanj sip bu kôc i.” ⁵ Ma Saimon sôm, “Ô ñgac atu, yac am gwelenj atu ôbwêc balin, magoc akôc i danj dom. Magoc tu am sôm-nga, dec aõ wakênj wasanj sip ndi.” ⁶ Goc Saimon ti ndê lau sêhêc wanj sêsa si, ma sêkênj wasanj sip gi. Ma sêkôc i daêsam andô e wasanj menhu, kêpinj bu wasanj kic. ⁷ Bocdinanj ñac sic gayo ñac si silip ñatô nanj sêmbo wanj tilu-nga bu sêmênj ma sênem ñac sa. Goc ñac sic dulu i sip wanj lu-lu e menhu, ma kêpinj bu wanj lu-lu sêpac.

* **5:1:** Genesaret - Bugictonj Galili-nga ndê ñaê danj.

⁸ Têñ ndoc Saimon Pita gêlic i daêsam dinan, nan in pôn haduc yêc Yisu gahi-nga ma sôm têñ in, “Pômdau, hu aô sin, bu aô ngac sac!” ⁹ In sôm yom dinan, nahu bu in ti lau hon nan sêmbo sêwhin in, nan sêhêdaê tu sêhê i daêsam dinan-nga. ¹⁰ Ma Jems lu Jon, Sebedi ndê atungac lu nan sêmbo wan tilu-nga, nan sêhêdaê boc-d inan. Magoc Yisu sôm têñ Saimon, “Töc daôm dom. Am ngac kôc i-nga, magoc kwahic dec ma ndi, am oc kôm gwelen bu kôc ñamalac sêmen sêñkuc aô.” ¹¹ Ma tinambu sêsôc baô si goc sêhu gêñ hon sin, ma sêñkuc Yisu.

*Yisu kôm ngac ti gêmbac leprasi ñayham sa
(Mat 8:1-4; Mak 1:40-45)*

¹² Yisu mbo malac atu dan, ma ngac dan nan gêmbac leprasi gêm in ndê ñamlic sambuc ahuc, nan têñ in gi. Têñ ndoc in gêlic Yisu, nan in hu dau angô andô têñ nom, ma ten in, “Pômdau, am bu tac whin, dec gitôm bu am oc kôm aô ñamlic ñawasi sa.” ¹³ Goc Yisu kêmatôc amba ma kêmasec in ma sôm, “Aô atac whin, dec wasôm têñ am bu ñamlic ñawasi sa.” Ma ñagahô en gêmbac leprasi hu in sin. ¹⁴ Goc Yisu kêñ yao ma sôm, “Ndic min têñ ñamalac dan dom, tigen têñ dabunsga ndi, ma tôc daôm têñ in bu lic bu am nem ñamlic ñawasi sa su. Ma kêñ da tu am ñamlic ñawasi sa-nga tôm yomsu nan Moses kêñ têñ yac. Ma ñalên dinan lau hon oc sêñyalê bu am ñamlic ñayham sa.”

¹⁵ Yisu bu kêñ yao ngac dau, magoc ñawaê pi gêñ nan Yisu kôm, nan gêm gamen sambuc ahuc. Bocdinan lau daêsam sêtên in si ñapan, bu sêngô in ndê yom, ma bu in kôm ñac si gêmbac ñayham sa.

16 Tigen tēm ɲatô in hu lau hon sin, ma sa gamen sawa gi bu ten mbec.

*Yisu gēm ɲgac bôlin dan sa
(Mat 9:1-8; Mak 2:1-12)*

17 Tēn bēc dan Yisu kêdôhôn lau mbo andu dan. Ma lau †Palêsai ti kêdôhônwaga yomsu-ɲga ɲatô nan sēmen akēn malac Galili-ɲga ti Ju dia-ɲga hon, ma akēn Jerusalem, nan sêndôc sēsun sa tēn in. Ma Pômdau ndê ɲac lai gēm Yisu ahuc bu kôm lau gēmbac ɲayham sa.

18 Tēn tēm dinan lau ɲatô sēmen sēmbalan ɲgac bôlin dan yēc sac, ma bu sēsôc andu dau sēndi, tu bu sêkēn in yēc Yisu aɲgô-ɲga. 19 Magoc lau daēsam sēngihi Yisu ahuc e ɲasawa mba. Bocdinan ɲac sēpi andu ɲapoc lôlôc si, ma sêkac poc sa. Goc sēnwhan sac ti ɲgac bôlin dau sip lau daēsam ɲalhu, solop tēn Yisu aɲgô-ɲga gi. 20 Yisu gêlic gēn dinan dec kêyalê bu ɲac sêkēn whin in, ma sôm tēn ɲgac bôlin, “O ɲgac daôm, kwahic dec aô wasuc am nem sac kwi.”

21 Goc lau Palêsai ti lau nan sêndôhôn yomsu sic hu sem yom-galôm tēn dau bocdec bu, “Nɲgac dindec in asa? In ndê yom sac sambuc! Anötô tigen gitôm bu suc sac kwi!” 22 Yisu kêyalê ɲac si gauc dinan ma ndac ɲac, “Tu sake-ɲga mac gauc gēm yom bocdinan? 23 Mac akēn whin dom bu anen ɲac lai yēc bu wasôm tēn ɲgac dau bu, ‘Aô wasuc am nem sac kwi.’ Bocdinan aô wasôm tēn in, ‘Tisa ma êmsêlên.’ 24 Ma tēn ndoc mac alic anen yom dau ɲandô sa, nan anyalê bu Anötô kēn ɲac lai tēn †Namalac ndê Atu bu suc ɲamalac si sac kwi yēc nom whin.”

Goc Yisu sôm tɛŋ ŋac bôliŋ dau, “Tisa, kôc nem mbô sa, ma lhô tɛŋ nem andu ndi.” ²⁵ Ma ŋagahô ŋac dau kalhac ŋac si aŋgô-ŋga, kôc iŋ ndê mbô sa, ma mbu tɛŋ ndê andu gi ti kêpiŋ Anötö. ²⁶ Ma lau hon sêhêdaê ɲandô. Sêmpin Anötö ma sêsôm, “Acsalô lec yac dalic gɛŋ kain dan solop!”

Yisu kêgalêm Liwai bu êŋkuc iŋ
(Mak 2:13-17; Luk 5:27-32)

²⁷ Tiŋambu Yisu sa awê gi ma gêlic ŋac kôc takis-ŋga dan nan ndê ɲaê Liwai, ndôc ndê mala kôc takis-ŋga. Ma Yisu sôm tɛŋ iŋ, “Êmkuc aöl!” ²⁸ Goc Liwai tisa, hu gɛŋ hon sin yêc, ma kêkuc Yisu.

²⁹ Tiŋambu Liwai ndê mwasin atu dan tu Yisu-ŋga yêc iŋ ndê andu. Ma lau sêkôc takis-ŋga daêsam, ma lau ɲatô sêndôc tebo ma seŋ gɛŋ sêwhin iŋlu Yisu. ³⁰ Ma lau Palêsai ti lau †Skraib ɲatô nan sêmbo Palêsai si ton, nan sêlic gɛŋ dau dec sêtucdin ma sêsôm tɛŋ Yisu ndê ŋacsêŋomi, “Tu sake-ŋga mac an ti anôm gɛŋ awhin lau sêkôc takis-ŋga ti lau sac ɲatô?” ³¹ Ma Yisu dau ô ɲac si yom ma s ôm, “Lau nan sêlic dau bu gêmbac mba, nan oc sêŋsalê dokta dom, magoc lau ti gêmbac oc sêŋsalê dokta. ³² Aô gamen bu wanğalêm lau nan sêlic dau bu lau gitên, nan sa dom, aô gamen bu wanğalêm lau sac sa bu sênem dau kwi.”

Yao gɛŋ danen-ŋga-ŋga
(Mat 9:14-15; Mak 2:18-20)

³³ Ma lau Palêsai ti lau Skraib dinan sêsôm tɛŋ iŋ, “Ndoc daêsam Jon, Ŋac Kêku Lau-ŋga ndê sêŋomi sêhu gɛŋ danen-ŋga sin ma sêten mbec, ma Palêsai si sêŋomi sêkôm bocdinaŋ. Magoc tôm bêc hon am nem ŋacsêŋomi sênom ti seŋ gɛŋ sêmbo.” ³⁴ Goc

Yisu sôm, “Ngac nem awhê-nga dan bu êngalêm lau sa sêmbô sêwhin in bu sênen mwasiñ nem awhê-nga, dec oc tôm dom bu dasôm têtñ nac bu sêhu gêtñ danen-nga sin têtñ ndoc ngac dau mbo whin nac. ³⁵ Nalên tigen aô gambo gawhin anen ngacsênomi, ma tu dinan-nga dec sêhu gêtñ danen-nga sin dom. Tigen ndoc oc men, nan nacyo oc sêkôc aô su yêc nac, ma têtñ ndoc dinan nac oc nalôm nawapac, ma sênkuc lêtñ dahu gêtñ danen-nga sin-nga.”

Yisu ndê yom gitôm gêtñ wakuc

(Mat 9:16-17; Mak 2:21-22)

³⁶ Ma in sôm yom gôlin dan têtñ nac bocdec bu, “Po akwa dan bu kic, dec yac dakêc po wakuc bu dasi pi po akwa dinan dom. Bu dakôm, oc tanyain po wakuc, ma po wakuc oc tôm po akwa dom. ³⁷ Ma têtñ ndoc lau sêmasan wain wakuc, nan sêkêc sip bôc ñamlic wain-nga akwa dom. Mba. Nac bu sêkôm, goc wain wakuc oc hôc ñamlic akwa kôc ma wê ñinga. Ma bôc ñamlic oc tisac bocdinan. ³⁸ Mba. Wain wakuc dakêc sip bôc ñamlic wakuc. ³⁹ Ma lau nan sênôm wain akwa su, nan sêtec bu sênôm wain wakuc, bu sêsôm, ‘Wain akwa, in ñayham.’ ”

6

Yisu in Pômdau bêc Sabat-nga

(Mat 12:1-8; Mak 2:23-28)

¹ Têtñ bêc Sabat-nga dan, Yisu kêsêlên mbo lôcwha nan gic ôm wit-nga dan kic, ma in ndê ngacsênomi sêkôc wit ñandô ma sênse ñapa goc sen ñandô. ² Ma Palêsai ñatô sêlic gêtñ dau ma sêndac, “Tu sake-nga mac akôm gwelen nan yac nen yomsu gic yao bu dakôm têtñ bêc Sabat-nga dom?” ³ Ma Yisu ô yom

ma sôm, “Gauc nem yom nanj sêto yêc pi gêñ nanj Kin Dawid kôm. Mac asam su, me? Têñ ndoc danj gêñ yô inj ma lau nanj sêwhinj inj, ⁴ dec inj sôc Anötô ndê andu gi, ma gêñ bolom dabun nanj lau sêkên ti da, nanj Moses kêñ yao bu dabunsga tawasê sêñej. Ma inj kêñ têñ lau nanj sêmbo sêwhinj inj ma ñac senj. Magoc lau danj sêngôlinj yom pi Dawid me sêsôm bu inj kêgili yomsu lec dom.”

⁵ Ma inj sôm têñ ñac, “Ñamalac ndê Atu inj gêñ honj ñadau, ma inj Pômdau bêc Sabat-ñga whinj.”

Yisu kôm ñgac amba balê ñayham sa têñ bêc Sabat-ñga

(Mat 12:9-24; Mak 3:1-6)

⁶ Têñ bêc Sabat-ñga danj inj sôc lôm wê-ñga danj gi, ma kêdôhôn lau. Ma ñgac danj nanj ndê amba andô-ñga tibalê nanj ndöc. ⁷ Lau Palêsai ti lau nanj sêndôhôn yomsu nanj sêñsalê yom bu sêngôlinj pi Yisu. Tu dinan-ñga dec ñac tatinj inj ñapep bu mboe inj oc kôm ñgac dau ñayham sa têñ bêc Sabat-ñga, dec ñac oc sêsôm bu inj kêgili yomsu Sabat-ñga. ⁸ Yisu kêyalê ñac si gauc, ma sôm têñ ñgac amba balê, “Tisa, ma lhac lau honj anjô-ñga.” Ma inj tisa kalhac. ⁹ Goc Yisu sôm têñ ñac, “Aö bu wandac mac bu gêñ bocke oc êñgili yomsu Sabat-ñga? Dakôm ñayham têñ lau, me dakôm sac têñ lau? Danem ñamalac sa, me datec ñac sêmbac ndu?” ¹⁰ Inj tahê ñac honj, ma sôm têñ ñgac dau, “Êmatôc amam.” Goc ñgac dau kêmatôc amba, ma amba dau ñayham sa tiyham.

¹¹ Magoc gêñ dau kôm lau Palêsai ti lau Skraib atac ñandê atu, ma ñac sem yomgalôm têñ dau pi Yisu, ma pi gêñ bocke bu sêkôm têñ inj-ñga.

*Yisu kêyalin aposel 12 sa
(Mat 10:1-4; Mak 3:13-19)*

¹² Têñ béc dan Yisu pi lôc dan gi bu ten mbec, ma tòm ôbwêc baliñ in ten mbec mbo. ¹³ Têñ galanşê bêbêc in kêgalêm lau nan sêñkuc in sêmen, ma kêyalin ñac si lau 12 sa, ma sam ñac bu lau †Aposel. ¹⁴ Lau Aposel dau si ñaê bocdec: Saimon, nan Yisu sam bu ‘Pita,’ lu asi Andru, ma Jems, Jon, Pilip, Batolomeas, ¹⁵ Matyu, Tomas, Jems (nan Alpayas ndê atu), Saimon (nan sêsam bu ‘Ngac †Selot’), ¹⁶ Judas (nan ñadamba in ñgac dan ñaê Jems), ma Judas Iskeriot nan tinambu oc hoc Yisu asê.

*Yisu kédôhôn lau ma kôm gêmbac ñayham sa
(Mak 3:7-12)*

¹⁷ Yisu ti ndê ñgacsêñomi sêsip akêñ lôc sêmen, ma Yisu kalhac gameñ gapon. Ma †sêñomi daêsam nan sêñkuc Yisu, nan sêkac sa su sêmbo dinan. Ma lau toñ atu akêñ malac Jerusalem ti malac gameñ Judia-nga hon, ma lau akêñ gameñ gwêc-nga nan yêc kêpin malac Taya ma Saidon, nan sêmen bu sêngô in ndê yom, ma bu in kôm ñac si gêmbac ñayham sa. ¹⁸ Lau nan ñalau sac sêmbo ñac si ñalôm, nan Yisu kôm ñac ñayham sa. ¹⁹ Ma lau hon sêhóc sôsôwec bu sêmasec in, ñahu bu ñaclai sa yêc Yisu, ma kôm lau gêmbac hon ñayham sa.

*Yisu ndê yom ñatô
(Mat 5:1-12)*

²⁰ Yisu tahê in ndê ñgacsêñomi ma sôm,
“Anötô ndê mwasiñ gic waê mac lau ñalôm sawa,
bu in gêlic ñayham bu kôc mac sa andöc in ndê
gôlin ñapu.

21 Anötö ndê mwasin gic waê mac lau nan kwahic dec gêṇ yô mac, bu in oc kêṇ gêṇ hôc mac dôṇ-ṇga.

Anötö ndê mwasin gic waê mac lau nan kwahic dec andöc ti tamsulu, bu in oc nem malô mac e ambwac.

22 Anötö ndê mwasin gic waê mac lau nan sêtec mac ma sêtin mac, ma sêpu mac ti sêkôm nem waêm tisac tu mac anḵuc Ṇamalac ndê Atu-ṇga.

23 Ahêgo daôm dom tēṇ ndoc lau sêkôm boc-dinaṇ, tigen atê wê ti atac ṇayham, bu Anötö oc kêṇ ṇagêyô ṇayham tēṇ mac yêc undambê. Ma gauc nem bu lau nan sêtec mac, nan si apai sêkôm ṇalêṇ tigen dinaṇ tēṇ Anötö ndê lau propet ṇamata-ṇga.

24 Oyaê mac lau nan apo daôm sa ṇa awa ti wapa daêsam. Mac atap nem mwasin ṇayham sa tēṇ tēm kwahic dec-ṇga, magoc gêṇ dau oc tôm dom bu nem mac sa tēṇ tēm ṇambu-ṇga.

25 Oyaê mac lau nan an ḡṇ ṇawahô kwahic dec. Tinambu ḡṇ oc yô mac.

Oyaê mac lau nan ambwac kwahic dec. Tinambu mac oc atan dangibo atu ma andöc ti tamsulu.

26 Oyaê mac lau nan lau hoṇ sêmpin mac. Atac ṇayham tu gêṇ dinaṇ-ṇga dom, bu ṇalêṇ tigen lau Israel-ṇga si apai sêmpin lau propet tasan.”

Atac whin mac nem ṇacyo

(Mat 5:43-48)

27 Ma Yisu sôm tēṇ lau dinaṇ, “Angô aneṇ yom. Atac whin mac nem ṇacyo, ma akôm ṇayham tēṇ lau nan sêtec mac. 28 Anem mbec lau nan sêpucho mac, ma atēṇ mbec pi lau nan sêkôm sac tēṇ mac.

²⁹ Ngac dan bu tap am sip alim andô danğa, nan kên danğa bu in ndic whin. Ngac dan bu kôc nem nakwê balin su yêc am, nan êmgamin nem nakwê nandô-nga dom magoc kên têt in whin. ³⁰ Ngac dan bu ndac gêt dan, nan kên têt in. Ma ngac dan bu kôc am nem gêt dan, nan ndac bu in kên mbu men dom. ³¹ Mêtê nayham-nayham nan mac atac whin bu lau sêkôm têt mac, nan mac daôm akôm têt nac.

³² “Lau hon atac whin lau nan atac whin nac ô. Bocdinañ mac bu atac whin nem silip tawasê ma atac tec nem nacyo, dec mac nem mêtê hôc gêlêc lau sac si mêtê su dom. ³³ Ma lau hon sêkôm nayham têt lau nan sêkôm nayham têt nac ô, ma mac bu akôm bocdinañ, dec mac nem mêtê hôc gêlêc lau sac si mêtê su dom. ³⁴ Ma mac bu akên tôp têt mac nem silip, nan in gêt atu dom. Mac anyalê su bu tinambu nac oc sêndic tôp dau. Lau sac sêkên tôp têt si silip, ma takwê bu nac sêndic tôp hon mbu men.

³⁵ “Bocdinañ ayob daôm bu ankuc lau sac si mêtê dom. Atac whin nem nacyo, ma akôm nayham têt nac. Akên gêt têt nac, ma ahêgo daôm dom pi ndoc bocke nac oc sêkên gêt dau mbu men-nga. Tu dinañ-nga Anötö, Naclai ti Nawasi Nadau oc kên naôli nayham atu têt mac, ma sam mac bu in ndê atui awhê ma ngac. Bu Anötö dau kêmwasin lau sac ma lau nan sem danğa in dom, nan sêwhin. ³⁶ Bocdinañ tamwalô lau hon, tôm Damam undambê-nga tawalô lau.”

*Yom datoc asidôwai sa-nga
(Mat 7:1-5)*

³⁷ Ma Yisu sôm, “Anem dôhông lau si lêng ti sakinj tu bu alic lau nãtô sac nambwa, me tu bu apu nãc-nãga dom. Mac bu akôm, dec Anötö oc lic mac sac ma pu mac tu mac nem lêng ti sakinj-nãga boc-dinañ. Asuc lau si sac kwi, ma Anötö oc suc mac nem kwi boc-dinañ. ³⁸ Têñ ndoc mac bu anem lau nãtô sa, nañ akêñ gêñ têñ nãc ti nem nãlôm sambuc, ma boc-dinañ Anötö oc kêñ gêñ hóc gêlêc su têñ mac e meñhu ma êñsalê mac ahuc. Bu Anötö oc êmwasiñ mac, gitôm mac amwasiñ lau.”

³⁹ Ma Yisu sôm yom gôlinj dañ bocdec, “Ngac tapec gitôm bu wê tapec dañ dom. Mba! Inlu lu-oc sêpeñ sêsip sê sêndi. ⁴⁰ Ma kwapuc dañ oc hóc gêlêc gwalam akwa nañ kêdôhông in, nañ dom. Magoc kwapuc hon nañ sêndôhông gêñ hon e tidông nãc, nañ oc sêtôm nãc si kêdôhôngwaga.

⁴¹ “Tu sake-nãga am hêgo daôm tu gêñ golop saun nañ yêc nem asidôwa tandô, tigenj gêñ golop atu nañ yêc am daôm tanôm, nañ am gêlic apu? ⁴² Ma bocke am oc sôm têñ nem asidôwa, ‘Aneñ asidôwa, aô bu wakôc gêñ golop nañ yêc am tanôm, nañ sa,’ magoc gêñ golop atu nañ pôc am daôm tanôm ahuc, nañ am gêlic dom? Am ngac tim yom lau-nãga! Gêñ nãmata-nãga kôc gêñ golop sa yêc daôm tanôm e tanôm nãwa sa, goc tiñambu kôc gêñ golop saun nañ yêc nem asidôwa tandô, nañ sa.”

*Lau si mêtê whê nãc sa bu nãyham me sac
(Mat 7:16-19; 12:33-35)*

⁴³ Ma Yisu sôm, “A nãyham dañ oc nem nãndô sac dom, ma a sac oc nem nãndô nãyham dom. ⁴⁴ Dalic nãndô nañ a tidau-tidau sem, ma bocdinañ yac tañyalê bu a nãyham me sac. Gitôm dom bu dahinj

ɲandô ɲayham yêc a sac. ⁴⁵ Ma ɲalêɲ tigen, yom naɲ lau sêsôm, naɲ tôc gêɲ bocke naɲ hôc ɲac si ɲalôm ahuc, naɲ asê. Mêtê ti gauc ɲayham yêc lau ɲayham si ɲalôm, ma bocdinaɲ sêkôm mêtê ɲayham. Ma mêtê ti gauc sac yêc lau sac si ɲalôm, dec sêkôm sac.”

*Yom gôlin pi ɲgac sêkwê andu-ɲga lu
(Mat 7:24-27)*

⁴⁶ “Tu sake-ɲga mac asam aô bu, ‘Pômdau, Pômdau,’ tigen mac daɲam wambu aneɲ yom dom? ⁴⁷ ɲamalac naɲ têt aô meɲ ma ɲgô aneɲ yom, ma daɲga wambu yom dau, naɲ aô bu wawhê in sa têt mac. ⁴⁸ In gitôm ɲgac kwê andu-ɲga naɲ kwê sê baliɲ sip nom ɲaɲga, ma kêɲ hoc kêgapiɲ alhô dôɲ têt ndoc in kêsuhuɲ sip sê baliɲ dinaɲ. Têt ndoc uhô-ɲga, bu hêc meɲ hôc pi andu dau, magoc andu dau kalhac ɲaɲga, bu in kwê ɲapep. ⁴⁹ Magoc ɲamalac naɲ ɲgô aneɲ yom ma daɲga wambu dom, naɲ gitôm ɲgac naɲ kwê andu, magoc kêɲ alhô sip nom ɲalôm gi dom. Têt ndoc uhô-ɲga, bu hêc ma hôc pi ndê andu e ɲagahô eɲ andu dau ku sa ma tisac sambuc.”

7

*ɲgac bata siɲ-ɲga daɲ kêɲ whiɲ ɲaɲga
(Mat 8:5-13)*

¹ Yisu gic bata yom naɲ in kêdôhôn têt lau ton atu dinaɲ, goc sôc malac Kapenaom gi. ² Ma ɲgac bata Rom-ɲga naɲ gêm gôlin lau siɲ-ɲga 100, naɲ mbo malac dau. In ndê ɲgac akiɲ daɲ naɲ in tac whiɲ kêlêc, naɲ gêmbac e kêpiɲ bu mbac ndu. ³ Ma in ɲgô Yisu ɲawaê, dec kêkiɲ lau bata Israel-ɲga

ɲatô sê tɛɲ in si, bu sêndac in bu mɛɲ ma kôm in ndê ɲgac akiɲ ɲayham sa. ⁴⁻⁵ ɲac sêhôn asê tɛɲ Yisu, ma sêsôm tɛɲ in bu, “ɲgac bata siɲ-ɲga dinan in ɲgac ɲayham, ma in tac whiɲ yac lau Israel-ɲga. In gêm yac sa tu akwê yac mba lôm wê-ɲga. Boc-dinan yac atɛɲ am bu nem in sa.”

⁶ Goc Yisu whiɲ ɲac gi. In mɛɲ suɲ sa tɛɲ andu, ma ɲgac bata siɲ-ɲga dau kêkiɲ ndê silip ɲatô bu sêsôm tɛɲ in, “Pôm dɛu, ɲgac bata siɲ-ɲga dau sôm bu in tec bu kêɲ ɲawapac tɛɲ am. In sôm bu am ɲgac tiwaê nan hôn gêlêc in su, dec in maya bu am tɛɲ in ndê andu ndi. ⁷ Tu dinan-ɲga in dau tɛɲ am mɛɲ dom. Tigen in sôm bu in kêyalê su bu am ɲgac ti ɲaclai atu, ma bocdinan dec am gitôm bu sôm ɲa awham ɲambwa, dec in ndê ɲgac akiɲ oc ɲayham sa. ⁸ Bu in dau danɲa wambu lau nan si ɲaclai hôn gêlêc in ndê, ma in ndê lau siɲ-ɲga danɲa wambu in. In bu sôm tɛɲ dan, ‘Am ndi,’ dec in oc ndi. Ma in bu sôm tɛɲ dan, ‘Mwen!’ dec in oc mɛɲ. Ma in bu sôm tɛɲ ndê ɲgac akiɲ bu kôm gɛɲ dan, dec in oc kôm.”

⁹ Yisu ɲgô ɲgac bata siɲ-ɲga ndê yom dinan e hêdaê. In kac dau kwi ma sôm tɛɲ lau toɲ atu nan sêɲkuc in, “Aô wasôm tɛɲ mac bu yêc lau Israel-ɲga hon aô gatap ɲac si dan nan kêɲ whiɲ ɲanɲa gitôm ɲgac Rom-ɲga dinan, nan sa dom.”

¹⁰ Ma tiɲambu ɲgac bata siɲ-ɲga ndê lau sêmbu sê tɛɲ in ndê andu si, ma sêtap sa bu ɲgac akiɲ dau ɲayham sa su.

Yisu un ɲgac dan nan mbac ndu su, nan sa

¹¹ Bêc ɲatô ginga su, ma Yisu tɛɲ malac Nein gi, ma in ndê ɲgac-sêɲomi ti lau daêsam sêwhiɲ in si. ¹² Têɲ tɛm in mɛɲ kêpiɲ malac dau ɲagatam, in

gêlic lau ñatô sêsa sêmen, sêmbalan ñgac batê dan bu sêñsuhun in. Ngac batê dinan dinda in awhê sawa nan ndê balêkoc ñatô mbasi. Ma lau malac-nga daêsam sêwhin dinda sêsa sêmen. ¹³ Pômdau gêlic dinda, ma tawalô in ñandô, goc sôm, “Am tan dom.” ¹⁴ Goc in têt ñac gi, ma kêmasac sasac nan ñgac batê yêc. Ma lau nan sêhóc sasac, nan sêlhac ten. Ma in sôm, “Aneñ balê, aô wasôm têt am bu tisa!” ¹⁵ Ma ñgac dau tisa ndöc, ma gic hu sôm yom. Goc Yisu kêñ in mbu têt dinda gi. ¹⁶ Gêñ dinan kôm lau hon sêtöc dau atu, ma ñac sic hu sêmpin Anötö. Ñatô sêsôm, “Propet atu dan hóc asê yac.” Ma ñatô sêsôm, “Anötö kêlhin in ndê lau yac sin dom, in gêm yac sa.” ¹⁷ Ma tinambu ñawaê pi gêt nan Yisu kôm, nan gêm gamen Judia-nga ma gamen ñamakê-nga hon ahuc.

*Yisu sôm yom pi Jon, Ngac Kêku Lau-nga
(Mat 11:2-18)*

¹⁸ Têt ndoc dinan Jon, Ngac Kêku Lau-nga ndöc gapocwalô, ma in ndê sêñomi sic min têt in pi gêt hon nan Yisu kôm. Goc Jon kêyalin in ndê sêñomi lu sa, ¹⁹ ma kêkin inlu sêtêt Yisu si, bu sêndac in, “Anötö gic bata têt yac bu oc êñkin Mesaya. Am daôm dinan, me yac oc akêt batan ñgac dan tiyham?”

²⁰⁻²¹ Têt ndoc ñgac lu dinan sêhóc asê Yisu, in gêm gwelen mbo, ma kôm lau daêsam ñayham sa, lau gêmbac ma lau ti ñalau sac. Ma in kôm lau tapec daêsam si tandô po asê. Ma inlu sêsôm têt in, “Jon, Ngac Kêku Lau-nga kêkin alu atêt am amen, bu andac am bu am Mesaya dau, me yac oc akêt batan ñgac dan tiyham?” ²² Goc Yisu ô inlu si yom

ma sôm, “Amlu ambu andi ma asôm yom têt Jon pi mêtê nan amlu anjô aô gahoc asê, ma pi gêt nan amlu alic aô gakôm. Lau tapec sêlic gamen tiyham, lau bôlin sênsêlên tiyham, lau ti gêmbac leprasi si ñamlic ñawasi sa, lau dangasun bic sêngô yom tiyham, lau batê sêtisa, ma lau ñalôm sawa sêngô ñawaê ñayham. ²³ Anjô! Lau nan atac lu-lu tu aô-nga dom, nan oc sêtap Anötö ndê mwasiñ sa.”

²⁴ Ngac lu nan Jon kêkin, nan sêhu Yisu sin ma sêmbu si, goc Yisu sôm yom pi Jon têt lau ton atu, ma ndac ñac bocdec bu, “Têt ndoc mac asa atêt Jon yêc gamen sawa a, nan mac gauc gêm bu atap ñamalac kain bocke sa? Mac bu alic ngac gauc babalê, gitôm gakoc nan mbu kêwic, a? ²⁵ Mac asa a bu alic ngac nan sôc ñakwê ñayham, a? Mba! Lau nan sêsôc ñakwê ñayham ma sen gêt ñayham, nan sêmbo gamen ñayham gitôm kin si andu. ²⁶ B ocdinan dec aô bu wandac mac, bu mac asa a bu alic sake? Bu alic propet dan? Yomandô! In propet dan, ma in hôc gêlêc propet hon su. ²⁷ Propet akwa dan to yom nan Anötö sôm têt Mesaya bocdec bu, ‘Aô wanjin anen ngac ahen-nga mun am, bu êmasan am nem sen.’ Y om pi ngac ahen-nga dau hêganôn Jon solop. ²⁸ Ñamalac nan dinda nom-nga sêkôc ñac, nan si dan hôc gêlêc Jon su dom. Tigen aô wasôm têt mac, bu lau hon nan sêsôc Anötö ndê gôlin ñapu su, lau tiwaê, ma lau waêmba bocdinan, nan hon sêhôt gêlêc Jon su yêc Anötö anjô-nga.”

²⁹ Lau daêsam nan sêngô Yisu ndê yom dinan, ma lau sêkôc takis-nga sêwhin, nan sêtôt asê bu sêlic Anötö ndê lêt bu lêt solop en. Nahu bu mun-nga, têt ndoc Jon gêm mêtê ma kêku lau mbo, nan sêkôc

in ndê yom sa ma sêlin sanġu. ³⁰ Tigen lau Palêsai ti gwalam akwa yomsu-nga sêkôc Jon ti in ndê yom sa dom, ma sêlin in ndê sanġu dom, dec tôc asê bu sêtec Anötö ndê lêng nan Jon tôc têng nac.

³¹ Ma Yisu gic têku yom ma sôm, “Lau têng dindec-nga nac lau kain bocke? Aö wanem dôhông pi gêng sake tu bu wawhê nac si lêng sa-nga? ³² Nac sêtôm balêkoc nan sêkôc whê sêmbo malac lôm, nan sêtucdin nac si silip natô ma sêsôm, ‘Têng ndoc nan yac ac on bu datê wê, nan mac atec. Ma têng ndoc yac am wê danġibo-nga, nan mac atec bu atan awhin.’ ³³ Ma mac lau têng dindec-nga bocdinan. Jon, Ngac Kêku Lau-nga men ma gêng gêng nayham dom, ma nôw wain dom, ma mac asôm bu nalau sac dan mbo in ndê nalôm. ³⁴ Ma Namalac ndê Atu men hôc asê, ma gêng gêng nayham ti nôw wain, ma mac asôm bu in ngac gêng gêng ti nôw wain nawahô-nga, ma in hê silip têng lau sac ti lau sêkôc takis-nga. Bocdinan, mac lau têng dindec-nga atôm balêkoc nan sêkôm tô anin napan. ³⁵ Tigen Anötö ndê gauc hôc gêlêc gêng hon, ma in ndê lau sênġalê bu in ndê lêng in lêng solop.”

*Awhê dan kêc bu namalu pi Yisu gahi
(Mat 26:6-13; Mak 14:3-9; Jon 12:1-8)*

³⁶ Palêsai dan naê Saimon kêgalêm Yisu bu nen gêng whin in, dec Yisu sôc in ndê andu gi, ma ndôc tebo bu nen gêng. ³⁷ Yêc malac dinan, awhê sac dan mbo. In ngô nawae bu Yisu ndôc Palêsai ndê andu dinan, dec kôc bu namalu nayham sip kac dan, ma têng andu dau gi. ³⁸ In pôn haduc yêc Yisu gahi-nga ma tan, ma in ndê tasulu sip Yisu gahidômbwê. Goc in pun Yisu gahi na kêclan, ngutô in gahi, ma mbac

gêñ malu dau pi in gahi. ³⁹ Saimon gêlic gêñ dau, ma gauc gêm yêc dau, “Ngac dindec in bu propet dan, dec in oc êñyalê bu awhê nan kêmasêc in, nan awhê sac dan.” ⁴⁰ Yisu kêyalê yom nan Saimon gauc gêm, goc sôm, “Saimon, aô bu wasôm yom dan têñ am.” Ma Saimon ô yom ma sôm, “Kêdôhônwaga, sôm.”

⁴¹ Goc Yisu sôm yom gôlin dan bocdec bu, “Ngac lu sêkôc tôp yêc ngac ti lêlôm. Ngac dan ndê tôp gitôm ðdenarii 500 ma dan ndê tôp gitôm denarii 50. ⁴² Inlu si mone sêndic tôp-nga mbasi, dec in hu inlu si tôp ñayom sin. Am gauc gêm bocke? Inlu si asa oc atac whin ngac dau hôc gêlêc?” ⁴³ Ma Saimon sôm, “Ngac nan kôc tôp atu, nan.” Ma Yisu sôm, “Am sôm solop.” ⁴⁴ Goc in kac dau kwi, tahê awhê dinan, ma sôm têñ Saimon, “Aô gasôc am nem andu gamen, magoc am kêñ bu têñ aô bu wanğwasin gahin-nga tôm lau Israel-nga si gêbôm dom. Tigen lic awhê dec. In ndê tasulu kôm aô gahin ñamaim sa, ma in pun aô gahin ña kêclauñ. ⁴⁵ Am ngutô aô dom, tigen awhê dec ngutô aô gahin ñapan. ⁴⁶ Am kêc olib ñakwi pi aô ñagôlôn dom, tigen in kêc bu ñamalu pi aô gahin. ⁴⁷ Bocdinan aô wasôm têñ am bu awhê dindec kêyalê bu Anôtô suc in ndê sac daêsam kwi, ma bocdinan in atac whin aô ñandô. Tigen lau nan gauc gêm bu ñac si sac atu dom, nan oc atac whin in nan bu suc ñac si sac kwi, nan ñandô dom.”

⁴⁸ Ma Yisu sôm têñ awhê dau, “Aô gasuc am nem sac kwi su.” ⁴⁹ Ma ñaclen ñatô nan sêndôc sêwhin, nan sêsôm têñ dandi, “Ngac dindec in ngac kain bocke, dec in suc sac kwi?” ⁵⁰ Tigen Yisu sôm têñ

awhê dau, “Am nem kêñ whiñ gêm am si. Lhõ ti atac malô ndi.”

8

Lauwhê daêsam sêñkuc Yisu

¹ Tiñambu Yisu golom malac atu-tu ti saun-saun, ma gêm mêtê ma hoc ñawaê ñayham asê pi Anötö ndê gôlin. Ma ñgacsêñomi 12 ² ti lauwhê daêsam sêñsêlêñ sêwhiñ in. Lauwhê dinañ ñatô Yisu soc ñalau sac su yêc ñac, ma ñatô in kôm ñac si gêmbac ñayham sa. Ñac si dan in Maria Magadala, nañ Yisu soc ñalau sac 7 su yêc in. ³ Ma awhê dan in Joana, nañ ndê akweñ Kusa yob Herod ndê andu. Maria lu Joana, ma Susana, ma lauwhê daêsam sêñkuc Yisu ma sêkêñ si awa ti wapa tu sênem in ti ndê ñgacsêñomi sa-ñga.

Yom gôlin pi ñgac kêbalip wit ñawhê (Mat 13:1-9; Mak 4:1-9)

⁴ Têñ têm dan lau toñ atu sêtêñ Yisu sêmen, ma lau akêñ malac hon yêc gamen Galili-ñga sêmbo sêwhiñ. Ma Yisu sôm yom gôlin dan bocdec bu, ⁵ “Ñgac dan sa gi bu êmbalip wit ñawhê yêc ndê ôm, ma têñ ndoc in kêbalip gêñ dau, nañ ñatô sêpen sêsip sen, dec lau sêkwê dôn ma mbac lôlôc-ñga sêsip sêmen ma sen su. ⁶ Ma ñawhê ñatô sêpen sêsip gamen hoc-hoc, ma têñ têm sêpo sêpi sêmen, nañ sem bôlin, bu nom dau tibasô. ⁷ Ñawhê ñatô sêpen sêsip kwan ti ñakwa ñalôm, ma têñ ndoc sêpo sêpi sêmen, nañ kwan pi whiñ e yan gêñ dau ndu. ⁸ Ma ñawhê ñatô sêpen sêsip nom ñayham, ma sêpo sêpi sêmen e sem ñandô gitôm 100.” Yisu gic bata yom

gôlinj dau, goc sôm, “Asa bu dangasunj yêc, nanj ngô anej yom!”

*Yisu whê yom gôlinj wit nawhê-nga nahu sa
(Mat 13:10-23; Mak 4:10-20)*

⁹ Tinambu Yisu ndê ngacsênomi sêndac inj bu whê yom gôlinj dinanj nahu sa. ¹⁰ Ma inj sôm, “Anötö ndê gôlinj nalên nahu sip nalôm gi. Inj kêyalinj mac sa bu anjyalê nahu dau, magoc aô wasôm yom têtj lau natô na yom gôlinj nambwa. Tôm yom nanj sêto yêc, nanj sôm, ‘*Nac sêlic gêtj nanj aô gakôm, nanj napanj, magoc nac si gauc sa dom. Ma nac sêngô anej yom napanj, tigenj nac sênyalê nahu dom.*’ ”

¹¹ Goc Yisu sôm, “Yom gôlinj dau nahu bocdec. Yom pi wit nawhê nanj hêganônj Anötö ndê yom. ¹² Wit nawhê nanj sêpej sêsip senj, nanj hêganônj lau nanj sêngô Anötö ndê yom, magoc Sadañ menj ma kêgaho yom dau su yêc nac si nalôm, tu bu nac sêkênj whinj dom, ma sêtap Anötö ndê mwasiñ nem nac si-nga sa dom. ¹³ Ma yom pi wit nawhê nanj sêpej sêsip gamenj hoc-hoc, nanj hêganônj lau nanj sêngô Anötö ndê yom ma sêkôc sa ti atac nayham, tigenj gitôm gêtj nawhê nanj nawakac mba, dec lau dinanj sêkênj whinj nasawa saunj, magoc lêtôm menj ku nac dulu. ¹⁴ Ma yom pi wit nawhê nanj sêpej sêsip kwanj ti nakwa nalôm, nanj hêganônj lau nanj sêngô Anötö ndê yom, magoc nawapac ma mone ti gêtj nayham-nayham nom-nga gêm nac si nalôm ahuc, ma nac si nandô mbasi. ¹⁵ Tigenj wit nawhê nanj sêpej sêsip nom nayham, nanj hêganônj lau ti nalôm nawasi, nanj sêngô Anötö ndê yom ma sêkôc sa tidônj yêc si nalôm, ma sêlhac nanja napanj ma sem nandô daêsam.”

Dasiŋ lam ŋawê kwi dom
(Mak 4:21-25)

¹⁶ Ma Yisu sôm yom daŋ bocdec bu, “Yac datuŋ lam asê tu bu dasiŋ kwi sip lônŋ ŋalôm, me dakêŋ sôc sasac ŋapu dom. Mba! Taŋkiŋ êŋgalêŋ ŋalhu, bu lau naŋ sêsôc sêmen, naŋ sêlic ŋawê. ¹⁷ Ma ŋalêŋ tigen, yom naŋ yêc siŋ dau, ma yom naŋ ŋahu sip ŋalôm gi, naŋ oc meŋ sa tiawê.

¹⁸ “Bocdinaŋ akôc gauc ŋapep pi Anötö ndê yom naŋ mac aŋgô. Asa naŋ kôc Anötö ndê yom sa sip ndê ŋalôm e tidôn, naŋ Anötö oc kêŋ ŋagauc daêsam têŋ iŋ. Magoc asa naŋ gauc gêm bu iŋ kôc Anötö ndê yom sa su, tigen iŋ kôc sa tidôn dom, naŋ Anötö oc kôc yom dau su yêc iŋ.”

Yisu dinda ti asii
(Mat 12:46-50; Mak 3:31-35)

¹⁹ Yisu ndôc andu daŋ, ma iŋ dinda ti asii sêmen bu sêlic iŋ. Magoc lau daêsam sêmbo sêwhiŋ iŋ, ma gitôm dom bu sêtigasuc iŋ. ²⁰ Ma ŋamalac daŋ sôm têŋ Yisu, “Am dinam ti asimi sêmbo awê, ma ŋac bu sêlic am.” ²¹ Magoc Yisu ô yom ma sôm, “Lau naŋ sêŋgô Anötö ndê yom ma daŋga wambu ŋapep, naŋ sêti aô dinaŋi ti asiŋi.”

Yisu kôm bu ŋampon timalô
(Mat 8:23-27; Mak 4:35-41)

²² Têŋ bêc daŋ Yisu sôm têŋ iŋ ndê ŋgacsêŋjomi, “Dapi bugictonŋ ŋadaŋga dandi,” goc iŋ pi waŋ daŋ whiŋ ŋac, ma sêsa si. ²³ Sêlac waŋ sêmbo, ma Yisu yêc bêc yêc. Ma mbu puc atu dec gêli bu sa ma ŋampon gic sip waŋ e kêpiŋ bu waŋ pac. ²⁴ Dec sêtêŋ Yisu si, sêuŋ iŋ sa ma sêsôm, “Ŋadau, ŋadau, yac oc dandiŋaŋ!” Ma Yisu tisa ma sôm yom ŋaŋga

têḡ mbu ti bu ṇampon, dec ṇampon dau timalô, ma gamen ṇanṇ sa. ²⁵ Ma Yisu sôm têḡ ṇac, “Tu sake-ṇga mac akêḡ whiṇ gwalec?” Ma ṇac sêṭöc dau ti sêhêdaê, ma sêsôm têḡ dandi, “Ei! In ṇgac dec asa? In gitôm bu kêḡ yatu gêḡ hon, ma mbu ti bu ṇampon sêwhiṇ, ma sêsôc in ndê yom ṇapul!”

*Yisu kôm ṇgac ti ṇalau sac ṇayham sa
(Mat 8:28-34; Mak 5:1-20)*

²⁶ Sêlac e sêhóc asê lau Gerasa-ṇga si gamen nan yêc Bugicton Galili-ṇga ṇadaṇga mbu têḡ gamen ac pi-ṇga. ²⁷ Yisu sip baö gi, ma ṇgac dan akêḡ malac atu nan yêc gamen dinan, nan têḡ in men. In ṇgac nan ṇalau sac sêmbo in ndê ṇalôm. Ṇasawa baliṇ su ṇgac dau sôc ṇakwê dom, ma ndöc andu dom, magoc mbo ôm sêhō-ṇga. ²⁸⁻²⁹ Ndoc daêsam ṇalau sac sêkôc in dôn, ma lau sêṇsahê bu sêsô in amba ti gahi dôn ṇa sen ṇanṇa ma sêyob in. Magoc tēm hon in hê sen kic, ma ṇalau sac sêwê in sa gamen sawa gi. Têḡ ndoc in gêlic Yisu men, nan in mbwêc ma hu dau sip nom yêc in aṇgô-ṇga. Ma Yisu gic atu ṇalau sac bu sêhu ṇgac dau siṇ, goc ṇalau dan ta yom ti ṇanṇa, “Yisu, Anötö Ṇaclai ti Ṇawasi Ṇadau ndê Atu, am bu kôm sake têḡ aö? Aö waterṇ am bu kôm aö ṇayom dom!” ³⁰ Goc Yisu ndac ṇalau sac, “Am nem ṇaê asa?” Ṇalau sac daêsam sêmbo ṇgac dau ṇalôm, ma tu dinan-ṇga ṇac si dan ô Yisu ndê yom ma sôm, “Aneṇ ṇaê ‘Tonṇ Atu.’ ” ³¹ Ma ṇalau sac h on dinan sêṭen Yisu tidim daêsam, bu êṇkin ṇac sêsip suṇ baliṇ sac nan sêsam bu Abis,* nan sêndi dom.

* **8:31:** Suṇ baliṇ sac (Abis) - alic Rev 9:1.

³² Têñ tēm dinan̄ bôc ton̄ atu sen̄ gêñ sêmbô lôc ñapu yêc gamen̄ dinan̄, ma ñalau dau sêten̄ Yisu bu êñkin̄ ñac sêsôc bôc dinan̄ si ñalôm, ma Yisu gôlôc. ³³ Goc ñalau sac sêhu ñgac dinan̄ sin̄ ma sêsôc bôc si ñalôm si. Ma bôc hon̄ sênti sêsip salic sac ma sêsip bugicton̄ ñalôm si, ma bu kô ñac sêmbac ndu. ³⁴ Têñ ndoc lau sêyob bôc-nga sêlic gêñ dau, nan̄ sêlhô si, ma sic min̄ pi gêñ dau têtñ lau nan̄ sêmbô malac atu ti gamen̄ ñamakê-nga. ³⁵ Ma lau hon̄ sêsa si bu sêlic gêñ nan̄ Yisu kôm. Têñ tēm sêhôt asê in̄, nan̄ sêlic ñgac nan̄ in̄ soc ñalau sac su yêc in̄, nan̄ ndôc Yisu gahi-nga. Sêlic bu in̄ ndê gauc ñawa sa, ma in̄ sôc ñakwê sa tiyham, dec sêtôc dandi. ³⁶ Lau nan̄ sêlic gêñ dau, nan̄ sic min̄ têtñ ñac pi ñalên̄ nan̄ Yisu kôm ñgac ti ñalau sac ñayham sa. ³⁷ Ma lau Gerasa-nga hon̄ sêndac Yisu bu hu ñac sin̄, bu ñac sêtôc dau atu. Goc Yisu pi wan̄ ma bu lhô ndi. ³⁸ Ma ñgac nan̄ ñalau sac sêhu in̄ sin̄, nan̄ ten̄ Yisu ñan̄ga bu whin̄ in̄ ndi, magoc Yisu kêkin̄ in̄ sa gi ma sôm, ³⁹ “Am mbu têtñ am nem andu ndi, ma ndic min̄ gêñ hon̄ nan̄ Anötô kôm têtñ am.” Goc ñgac dau kôlhô gi, ma gic min̄ têtñ lau hon̄ nan̄ sêmbô malac atu dinan̄, pi gêñ atu nan̄ Yisu kôm têtñ in̄.

*Yisu kôm awhê lu ñayham sa
(Mat 9:18-26; Mak 5:21-43)*

⁴⁰ Lau daêsam sêhôn̄ Yisu sêmbô gamen̄ Galili-nga, ma têtñ tēm in̄ mbu akên̄ bugicton̄ ñadan̄ga men̄, nan̄ sêkôc in̄ sa ti atac ñayham. ⁴¹ Ma ñgac bata dan̄, nan̄ yob lôm wê-nga yêc gamen̄ dinan̄, nan̄ men̄ hôc asê Yisu. In̄ ndê ñaê Jairas, ma in̄ hu dau sip nom yêc Yisu an̄gô-nga, ma ten̄ in̄ ñan̄ga bu têtñ in̄ ndê andu ndi, ma nem in̄ ndê atuwê sa.

⁴² Bu in ndê atuwê tigen, nan ndê yala gitôm 12, nan gëmbac atu e kêpin bu mbac ndu. Bocdinan Yisu whin in gi.

In kêsêlên mbo sen, ma lau ton atu sêngihi in ahuc. ⁴³ Lau ton dinan si dan in awhê nan gëm dac napan tôm yala 12 su, magoc namalac dan gitôm bu nem in sa dom. ⁴⁴ A whê dau men kêsêlên mbo Yisu nambu-nga, ma kêmasec in ndê nakwê sip nadali. Ma ngahô in ndê dac sa tiyham dom. ⁴⁵ Têj dinan Yisu ndac, “Asa kêmasec aô?” Lau dan sêsôm dau asê dom, ma Pita sôm, “Aneŋ nadau, lau ton dindêc sêwhin yac sêkôm am si.” ⁴⁶ Magoc Yisu sôm, “Namalac dan kêmasec aô, bu aô kayalê bu aneŋ naclai natô sa gi.” ⁴⁷ Awhê dinan kêyalê bu in gitôm dom bu sin dau, dec tigasuc Yisu. In kêtitec, ma hu dau sip nom gi. Ma yêc lau hon angô-nga, in whê sa bu in kêmasec Yisu tu bu nayham sa-nga, ma bu têt ndoc in kêmasec in, nan ngahô in nayham sa. ⁴⁸ Ma Yisu sôm têt in, “O aneŋ bawhê, am nem kêŋ whin aô dec kôm am nayham sa. Am lhô ti atac malô ndi.”

⁴⁹ Yisu sôm yom dinan mbo, ma ngac dan men akêŋ Jairas ndê andu, ma sôm têt Jairas, “Am atômwe mbac ndu su, dec kêŋ nawapac têt Kêdôhônwaga dau dom.” ⁵⁰ Yisu ngô yom dinan, magoc in sôm têt Jairas, “Tôc daôm dom. Kêŋ whin, ma in oc nayham sa.”

⁵¹⁻⁵³ Têt ndoc sêhôt asê Jairas ndê andu, nan sêlic lau daêsam sêhu dangibo asê ma sêtan sêmbo. Goc Yisu sôm, “Mac atan dom! In mbac ndu dom, in yêc bêc yêc.” Magoc nac sêmbwac in, bu sênjalê bu bawhê dau mbac ndu su. Tigen Yisu kalhac lau hon ahuc sêmbo awê, ma kôt Pita, Jems ma Jon, ma

bawhê dau damba lu dinda, sêwhiņ in ma sêsôc andu si. ⁵⁴ Ma in kêm bawhê dau sip amba ma sôm, “Aneņ bawhê, tisa!” ⁵⁵ Goc bawhê dau tali sa tiyham, ma ŋagahô in tisa kalhac. Ma Yisu sôm bu sêkêņ gêņ daneņ-ņga têņ in. ⁵⁶ In damba lu dinda sêhêdaê, magoc Yisu gic yao bu sêndic miņ pi gêņ naņ in kôm, naņ dom.

9

*Yisu kêkiņ ŋgacsêņomi 12 sêsa si
(Mat 10:7-11; Mak 6:7-11)*

¹ Yisu kêgalêm ŋgacsêņomi 12 sa sêpitigen, ma kêņ ŋaclai ti licwalô têņ ŋac gitôm bu sêsoc ŋalau sac su, ma sêkôm lau gêmbac ŋayham sa. ² Ma in kêkiņ ŋac bu sêsa sêndi ma sênem mêtê pi Anötô ndê gôliņ, ma bu sênem lau gêmbac sa. ³ In sôm têņ ŋac, “Anșêlêņ amam sawa andi, akôc tôc dom, ma akôc talhi, me bolom, me mone, me ŋakwê aô daôm-ņga dom. ⁴ Têņ têm mac asôc malac daņ ma lau sêkôc mac sa asôc ŋac si andu, naņ ambo whiņ ŋac e mac ahu malac dau siņ. ⁵ Ma lau malac daņ-ņga bu sêkôc mac sa dom, naņ aton kop su yêc gahim têņ ndoc mac ahu ŋac siņ, bu atôc ŋac si giso asê.” ⁶ Ŋgacsêņomi sêņgô yom dinan, goc sêsa si. Ŋac sêņsêlêņ sêlom-sêlom malac ma sêhoc ŋawaê ŋayham asê, ma sêkôm lau ŋayham sa yêc gameņ hoņ.

*Herod ndac bata Yisu
(Mat 14:1-2; Mak 6:14-16)*

⁷ Têņ ndoc dinan gôliņwaga Galili-ņga Herod ŋgô yom pi gêņ hoņ naņ Yisu kôm. Ma in gauc gêm yom daêsam, bu lau ŋatô sêsôm bu Yisu in Jon, Ŋgac Kêku Lau-ņga naņ tisa akêņ lau batê-ņga. ⁸ Ma lau ŋatô

sêsôm bu in propet akwa Elaija nan men hoc dau asê, ma ñatô sêsôm bu in propet ñamata-nga si dan, nan tisa akên lau batê-nga. ⁹ Tigen Herod sôm, “Aô gac atu, dec sêtim Jon ndê kachu kic su. Asa dec lau sic min pi in?” Ma in tac whin bu lic Yisu.

Yisu gôlôm lau 5,000

(Mat 14:13-21; Mak 6:32-44; Jon 6:1-15)

¹⁰ Têñ têm aposel 12 sêmbu sêmen, nan sic min têt Yisu pi gêt hon nan sêkôm. Ma tinambu in kôc ñac sa sêwhin in, ma ñac tawasê sêtên malac Betsaida si. ¹¹ Magoc lau daêsam sêngô ñawaê ma sêtên Yisu si. Ma in kôc ñac sa, ma sôm y om têt ñac pi Anötö ndê gôlin, ma kôm ñac si lau gêmbac ñayham sa.

¹² Sêmbô e kêpin bu ac ndi sip, goc ñgacsênomi 12 sêtên in si ma sêsôm, “Gamen dindec yac dambo, nan gameñ sawa. Bocdinañ êmkin lau toñ dindec sêlhô sêtên malac ti gameñ ñamakê-nga sêndi, bu sênşalê gêt sênen-nga ma gameñ sêyêc bêc-nga.” ¹³ Magoc Yisu sôm, “Mac akên gêt têt ñac sênen.” Ma ñac sêo yom ma sêsôm, “Yac mba gêt danen-nga daêsam dom. Bolom limdan ma i lu sêndöc. Bocke? Yac andi anemlhi gêt bu lau hon sênen, a?”

¹⁴ Ñac sêsôm yom dinañ ñahu bu lau toñ dinañ si laungac ñanamba gitôm 5,000. Magoc Yisu sôm têt in ndê ñac-sênomi, “Akên lau sêndöc sic titon-titon tôm 50.” ¹⁵ Goc ñac sêkôm gitôm in sôm, ma lau hon sêndöc sic. ¹⁶ Ma Yisu kôc bolom limdan ma i lu sa, tatic undambê, ma gêm danje, goc pô kôc-kôc, ma kêt têt ñgacsênomi bu sêndic sam têt lau. ¹⁷ Lau hon señ gêt e hôc ñac dôn, ma tinambu ñgacsênomi sic gêt ñadêlê sa sip gatop 12 e menhu.

*Pita sôm Yisu ηahu asê
(Mat 16:13-20; Mak 8:27-30)*

¹⁸ Têη ndoc dan Yisu ti in ndê ngacsêηomi sêmbo tawasê, ma in ten mbec mbo. Pacndê, goc in ndac ηac, “Lau sêsôm bu aö asa?” ¹⁹ Ma sêsôm, “Lau ηatô sêsôm bu am Jon, Ngac Kêku Lau-ηga, ma ηatô sêsôm bu am Elaija, ma ηatô sêsôm bu am propet ηamata-ηga si dan, nan tisa akêη lau batê-ηga.” ²⁰ Goc Yisu ndac ηac, “Ma mac daôm, mac asôm bu aö asa?” Ma Pita sôm, “Am Mesaya, nan Anötö gic bata bu êηkin men.” ²¹ Yisu ηgô yom dau ma gic yao ηac bu sêsôm asê têη lau dan dom e tinambu. ²² In sôm, “Namalac ndê Atu gic waê bu hôc ηawapac daêsam. Lau bata ti †dabun̄siga atu-tu ma lau nan sêndôhôn̄ yomsu oc sêtec in ma lau oc sêndic in ndu. Magoc têη bêc titö-ηga Anötö oc un in sa tiyham.”

*Lau nan sêηkuc Yisu oc sêhôn̄c ηawapac
(Mat 16:24-28; Mak 8:34–9:1)*

²³ Ma in sôm têη ηac hon, “Asa nan tac whin bu êηkuc aö nan êηgwiniη dau, ma tômbêc hon hôc ndê a gicso dau sa, ma êηkuc aö. ²⁴ Bu asa nan tac whin bu sap gêη nom-ηga dôn̄c ηapan̄ tu mbo tali-ηga, nan oc ninga. Magoc asa nan bu hu gêη nom-ηga sin̄ tu êηkuc aö-ηga, nan oc ninga dom. ²⁵ Namalac dan bu po gêη nom-ηga hon sa, magoc in dau gatu bu ninga, dec gêη nom-ηga hon dinan̄ oc tômbêc dom bu nem in sa. ²⁶ Asa nan bu maya tu aö ti anen̄ yom-ηga, nan Namalac ndê Atu oc maya tu in-ηga, têη ndoc in mbu men̄ ti in dau ndê ηawasi, ma Damba ndê ηawasi ma an̄ela dabun̄ si ηawasi whin. ²⁷ Ma aö wasôm bu yomandô, lau ηatô kwahic dec sêmbo,

naŋ oc gacgeŋ sêmbô tali e sêlic Anötö ndê gôliŋ meŋ sa tiawê.”

Pita, Jems ma Jon sêlic Yisu ndê ŋawasi

(Mat 17:1-13; Mak 9:2-10)

²⁸ Yisu sôm yom dinaŋ su, ma bêc ŋatô gitôm 8 meŋ gi su. Ma Yisu bu teŋ mbec, dec kôc Pita, Jon ma Jems sêwhiŋ iŋ ma sêpi lôc daŋ si. ²⁹ Ma têtê têtê Yisu teŋ mbec mbo, naŋ iŋ ndê aŋgô andô kaiŋ daŋ sa, ma iŋ ndê ŋakwê ŋawasi sêp sambuc. ³⁰⁻³¹ Ma ŋgac lu sêhôt asê ti ŋawasi atu, naŋ Moses lu Elaija, ma iŋlu sem yomgalôm sêwhiŋ Yisu. Sêsôm yom pi gêt naŋ oc hôt asê Yisu yêc malac Jerusalem têtê ndoc meŋ sa bu iŋ hu nom dindêc siŋ.

³² Têtê ndoc dinaŋ, Pita ma ŋgac lu naŋ sêwhiŋ iŋ, naŋ kwapac ma bêc yô ŋac, tigenŋ ŋac tali sa ma sêlic Yisu ndê ŋawasi ti ŋgac lu naŋ sêlhac sêwhiŋ iŋ.

³³ Têtê têtê Moses lu Elaija bu sêhu Yisu siŋ, naŋ Pita sôm têtê iŋ, “Nadau, ŋayham kêlêc bu yac dambo dec. Yac oc akwê bac tô, am nem daŋ, Moses ndê daŋ, ma Elaija ndê bac daŋ.” Iŋ sôm yom dinaŋ, magoc iŋ ndê gac sa dom. ³⁴ Iŋ sôm yom dinaŋ mbo, ma dao daŋ meŋ ma kôm ŋac ahuc e ŋgacsêŋomi tô dinaŋ sêtôt dau atu. ³⁵ Ma awha daŋ sa yêc dao ŋalôm, naŋ sôm, “Aô neŋ atungac dau dindêc, naŋ aô kayaliŋ sa. Aŋgô iŋ ndê yom maŋ!” ³⁶ Sêŋgô su goc sêlic Yisu tawasê mbo. Tiŋambu ŋac sem yom dau ahuc yêc dau-ŋga, ma têtê ndoc dinaŋ sêsôm yom asê pi gêt naŋ sêlic, naŋ dom.

Yisu soc ŋalau sac su yêc balê daŋ

(Mat 17:14-21; Mak 9:14-29)

³⁷ Têtê galaŋsê ŋac sêsip akêt lôc dau sêmeŋ, ma lau toŋ atu sêkac sa sêtêŋ Yisu si. ³⁸ Ŋac si daŋ

ta yom bocdec bu, “Kêdôhônŋwaga, aö gakôc anenŋ atunŋac tigenŋ dindec menŋ, ma watenŋ am bu nem inŋ sa. ³⁹ Nalau sac danŋ mbo inŋ nalôm, ma têm daêsam kôc inŋ dôŋ, m a kêmwananŋ inŋ nanŋa e inŋ mbwêc atu, ma whapwic sa. Nalau sac dau bu kôm inŋ tisac, ma tec bu hu inŋ sinŋ. ⁴⁰ Aö gatenŋ am nem ngac-sênŋomi bu sêsoc nalau dau su, magoc nac sêtôm dom.” ⁴¹ Goc Yisu sôm, “O mac lau sac. Mac nem akênŋ whinŋ mbasi! Aö gambo gawhinŋ mac nasawa hic balinŋ su, ma bocke mac atôm dom bu akôm gênŋ danŋ? Aö oc wambo wawhinŋ mac tu wanem mac sa napanŋ-nga dom!” Ma Yisu sôm têtŋ balê dau nadamba, “Kôc nem balê sa mwenŋ.”

⁴² Têtŋ têm balê dau kêsêlênŋ menŋ, nanŋ nalau sac kôc inŋ dôŋ ma kêmwananŋ inŋ. Tigenŋ Yisu hec yom nalau sac, ma kôm balê dau nayham sa, ma kênŋ inŋ mbu têtŋ inŋ damba gi. ⁴³ Nalênŋ dinanŋ Yisu tôc Anôtô ndê naclai ti nawasi atu asê, dec kôm lau honŋ sêhêdaê.

Yisu sôm tiyham bu inŋ oc mbac ndu ma tisa tiyham

(Mat 17:22-23; Mak 9:30-32)

Lau honŋ sêlhac ti sêhêdaê tu gênŋ honŋ nanŋ Yisu kôm-nga, ma inŋ sôm têtŋ inŋ ndê ngacsênŋomi, ⁴⁴ “Anŋô anenŋ yom dindec napep! Tinambu oc sêkênŋ Namalac ndê Atu sip lau natô amba.” ⁴⁵ Magoc nac sênŋyalê yom dau nahu dom. Yom dau nahu yêc sinŋ dau têtŋ nac, ma sêtôc bu sêndac Yisu bu whê sa têtŋ nac.

Asa ti ngac namata-nga

(Mat 18:1-5; Mak 9:33-37)

⁴⁶ Tinambu Yisu ndê ngac-sênŋomi sêsenŋ dau pi nac si asa inŋ ngac namata-nga. ⁴⁷ Yisu kêyalê nac si gauc,

goc kôc balê saun dan ma kêñ in kalhac kêpin in,
⁴⁸ ma sôm tênh ñac, “Asa nan kôc balê saun dan tôm
 in dindec sa tu anen ñaê-nga, nan kôc aô sa, ma asa
 nan kôc aô sa, nan kôc in nan kêkin aô gameñ, nan
 sa. Mac nem asa nan kêgwiniñ dau ma ti mac nem
 ñgac akin, nan ti ñgac ñamata-nga yêc Anötö anğô-
 nga.”

*Lau nan sêkôm gwelen tu Yisu-nga, nan sêwhê dau
 kôc dom
 (Mak 9:38-41)*

⁴⁹ Ma Jon sôm, “Ñadau, yac alic ñgac dan kôm
 gwelen ma soc ñalau sac su yêc lau ña am nem ñaê.
 In kêkuc am whin yac dom, ma boc-dinan yac ac
 yao in bu kôm gwelen dau dom.” ⁵⁰ Tigen Yisu sôm,
 “A lhac in ahuc dom, bu asa nan kêñ kisa mac dom,
 nan mac nem dan.”

Lau gameñ Samaria-nga sêkôc Yisu sa dom

⁵¹ Ndoc men kêpin bu Yisu mbu pi undambê
 ndi, dec in kêmasan dau bu pi malac Jerusalem
 ndi. ⁵² In kêkin lau ahen-nga sêmun in, sêsôc lau
 †Samaria-nga si malac dan si, bu sêmasan gameñ tu
 in mbo-nga. ⁵³ Magoc lau Samaria-nga sênjalê bu
 in kêsêlên hêganôn malac Jerusalem, ma tu dinan-
 nga dec sêkôc in sa dom. ⁵⁴ Jems lu Jon sêlic gên
 dau, goc sêndac Yisu, “Pômdau, am bu sôm, dec yac
 oc anğalêm ya sip akên undambê men, ma sen ñac
 su.” ⁵⁵ Tigen Yisu kac dau kwi, ma sôm inlu. ⁵⁶ Ma
 ñac hon sêlom malac dan si.

*Lên tanhuc Yisu-nga
 (Mat 8:18-22)*

⁵⁷ Yisu ti ndê ngacsêñomi sêñsêlêñ sêmbô senj ma ngac danj sôm têtj Yisu, “Aö bu wanjuc am, wawhinj am watêñ gamenj bocke nanj am oc ndi.” ⁵⁸ Ma Yisu ô inj ndê yom ma sôm, “Giam pôm si hocsunj yêc, ma mbac lôlôc-nga si ñaic yêc, tigenj Ñamalac ndê Atu ndê mala yêc bêc-nga mba.”

⁵⁹ Ma inj sôm têtj ngac danj, “Mwenj êmkuc aö!” Magoc ngac dau sôm, “Pômdau, gêtj ñamata-nga aö wandi wambo wawhinj anenj lau e anjahunj damanj su nanj, ma tinjambu wambu wamenj wanjuc am.”

⁶⁰ Ma Yisu sôm têtj inj, “Mba! Am êmkuc aö nanj gêtj ñamata-nga. Tec lau batê sêñsuhunj lau batê. Tigenj am ndi, ma hoc yom asê têtj lau pi Anötö ndê gôlinj.”

⁶¹ Ma ngac danj tiyham sôm, “Pômdau, aö bu wanjuc am, tigenj gêtj ñamata-nga wambu watêñ anenj andu, ma wakam anenj lau.” ⁶² Ma Yisu ô inj ndê yom ma sôm, “Asa nanj gic hu gwelenj danj, tigenj kac dau kwi ma hêgo gêtj nanj inj hu sinj su, nanj gitôm dom bu nem gwelenj mbo Anötö ndê gôlinj ñapu.”

10

Yisu kêkinj sêñomi 72 sêsa si

¹ Tinjambu Pômdau kêyalinj sêñomi 72 tiyham sa, bu êñkinj ñac lu-lu sêsa sêndi sêmunj inj, sêtêñ gamenj ti malac honj nanj inj atac whinj bu ndic kêsi. ² Ma inj sôm têtj ñac, “Gêtj ñandô daêsam yêc ôm, magoc lau sêndic gêtj ñandô sa-nga daêsam dom. Bocdinañ atenj mbec têtj ôm ñadau bu êñkinj lau gwelenj-nga sêsôc inj ndê ôm sêndi, ma sêndic gêtj ñandô sa.

³ Kwahic dec aö bu wanjinj mac asa andi! Magoc

ayob daôm napep, bu aö kakin mac bu asa andi atôm domba ntu, nan sêten giam pôm si gamen sêndi. ⁴ Akôc talhi, me dalu, me atapa dom, ma anjêlên ngahô andi. Ahê mwalêc lau yêc sen dom. ⁵ Têj ndoc mac bu asôc andu dan, nan asôm bu, ‘Yom malô têj lau andu dindec-nga.’ ⁶ Andu natau bu ngac yom malô-nga dom, dec mac nem mbec yom malô-nga oc gacgen yêc mac-nga. Ma andu natau bu ngac yom malô-nga, dec in oc kôc mbec yom malô-nga dinan sa. ⁷ Ambo andu dinan, ma alom-alom andu dom. Anen ti anôm gêj bocke nan sêkên têj mac, nan ti mac nem naôli gwelen-nga. Mêtê solop bu lau g welen-nga sêkôc naôli gwelen-nga.

⁸ “Têj têm mac asôc malac dan, ma lau sêkôc mac sa, nan anen gêj danen-nga nan sêkên têj mac. ⁹ Akôm nac si lau gembac nayham sa, ma asôm têj nac, ‘Anötö ndê gôlin men kêpin.’ ¹⁰ Tigen mac bu asôc malac dan, ma sêkôc mac sa dom, nan goc alhac malac lôm ma asôm, ¹¹ ‘Yac aton kop mac nem malac-nga su yêc yac mba gahin. Yac akên kop dindec mbu têj mac bu atôc nem mêtê sac asê. Tigen anyalê bu Anötö ndê gôlin men kêpin.’ ¹² Yomandô aö wasôm têj mac bu têj bêc Anötö êmatôc lau-nga, nan lau malac dinan-nga oc sêtap ngâyê sac andô sa, hóc gêlêc ngâyê nan Anötö oc kêj têj lau sac malac Sodom-nga.”

*Yisu sôm yom pi lau nan sem dau kwi dom
(Mat 11:20-24)*

¹³ Yisu gic têku yom ma sôm, “Oyaê mac lau malac Korasin ma Betsaida-nga. Mac oc atap Anötö ndê atac nandê sa. †Lau apa nan sêndôc

malac Taya ma Saidon, bu sêlic gêñ dalô nan aö gakôm yêc mac anôm-nga, dec oc tòm sênem dau kwi wandêc su, ma sêndôc ti sêtañ si sac. ¹⁴ Tigen mac akôm dom, dec wasôm têñ mac bu têñ ndoc Anötö êmatôc lau-nga, nan in oc kêñ ñagêyô sac sambuc têñ mac, hôc gêlêc ñagêyô nan in oc kêñ têñ lau Taya ti Saidon-nga, nan su.

¹⁵ “Ma mac lau Kapenaom-nga, mac gauc gêm bu mboe Anötö oc kôc mac sa andôc undambê, a? Mba! In oc êmasuc mac su asip lambwam andi!”

¹⁶ Ma Yisu sôm têñ sêñomi 72 bu, “Asa nan kôc mac nem yom sa, nan gitôm in kôc aneñ yom sa. Ma asa nan tec mac, nan gitôm in tec aö bocdinañ. Ma asa nan tec aö, nan tec Daman nan kêkin aö gameñ.” Yisu sôm yom dinañ su, goc kêkin sêñomi 72 sêsa si.

Sêñomi 72 sêmbu sêmeñ

¹⁷ Tinambu sêñomi 72 dinañ sêmbu sêmeñ ti atac ñayham, ma sêsôm, “Pômdau, têñ ndoc yac asôm am nem ñaê asê, nan gêñ hon sêsôc yac mba yom ñapu, ma ñalau sac sêwhin.” ¹⁸ Ma Yisu sôm, “Aö kayalê bu gêñ nan mac akôm, nan ku Sadañ ndê ñaclai dulu, e tòm in peñ akêñ undambê ñagahô ñambwa, tòm sickac hep tigen.” ¹⁹ Aö gakêñ ñaclai têñ mac su, tòm bu akwê mboc ti gapin gap dôn, ma bu ahôc gêlêc mac nem ñacyo Sadañ ndê ñaclai hon su. Gêñ dañ oc kôm mac atisac dom. ²⁰ Kwahic dec mac atac ñayham bu ñalau sac sêsôc mac nem yom ñapu. Tigen atac ñayham atu, bu Anötö to mac nem ñaê sa yêc undambê.”

21 Têñ ndoc dinan̄ Nalau Dabun̄ gêm̄ Yisu ahuc, ma in̄ tac ñayham̄ atu, ma sôm̄, “O Daman̄, undambê ti nom̄ ñadau. Aõ wampin̄ am bu am tôc nem yom̄ ña-ñandô asê têt̄ lau nan̄ sêngwiniñ dau, ma sin̄ kwi têt̄ lau nan̄ gauc gêm̄ bu ñac lau tigauc ma sêñyalê gêt̄ hon̄. Aêc, Daman̄, am kôm̄ bocdin̄an̄ kêkuc am daôm̄ nem atac whin̄.

22 “Daman̄ kêñ gêt̄ hon̄ sip aõ aman̄. Lau dan̄ sêñyalê Atu dom, Damba tawasê kêyalê in̄. Ma lau dan̄ sêñyalê Damba dom, tigen̄ in̄ ndê Atu kêyalê in̄, ma lau nan̄ Atu dau atac whin̄ bu tôc in̄ asê têt̄ ñac, nan̄ sêñyalê Damba.”

23 Ma in̄ kac dau kwi ma sôm̄ têt̄ in̄ ndê ñgacsênomi tawasê, “Atac ñayham̄ tu mac alic gêt̄ hon̄ dindec-nga. 24 Aõ wasôm̄ têt̄ mac bu propet ti kin̄ daêsam̄ atac whin̄ bu sêlic gêt̄ nan̄ mac alic su, magoc sêlic dom. Ma ñac atac whin̄ bu sêngô yom̄ nan̄ mac an̄gô su, magoc sêngô dom.”

*Yom̄ gôlin̄ pi lau men̄pan̄ yac-nga
(Mat 22:34-40; Mak 12:28-31)*

25 Têñ ndoc dan̄ gwalam̄ akwa yomsu-nga dan̄ tisa bu êñsahê Yisu. Ma in̄ ndac Yisu bocdec bu, “Kêdôhôn̄waga, aõ wakôm̄ sake, dec Anötô oc kôc aõ sa wambo tan̄li ñapan̄ yêc undambê?” 26 Ma Yisu sôm̄, “Am kêyalê yomsu hon̄ nan̄ Anötô kêñ têt̄ Moses. Ma yomsu dau sôm̄ bu am kôm̄ sake?” 27 Goc ñgac dau sôm̄, “Yomsu dan̄ sôm̄ bu, ‘Atac whin̄ Pômdau, am nem Anötô, ti am nem ñalôm̄ sambuc, ti gatôm̄ sambuc, ti licwalô sambuc ma ti am nem gauc sambuc.’ Ma yomsu dan̄ tiyham̄ sôm̄ bu, ‘Atac whin̄ lau men̄pan̄ am, tôm̄ am tac whin̄

am daôm.’ ” ²⁸ Ma Yisu sôm, “Am sôm solop. Kôm bocdinañ, dec am oc ndöc tamli ñapañ.”

²⁹ Magoc ñgac dau gauc gêm bu tôc asê bu in ñgac gitên, dec ndac Yisu, “Ma lau asa sêti aneñ lau menpañ aö-ñga?” ³⁰ Yisu ô in ndê yom ña yom gôlin dan bocdec bu, “Ñgac Israel-ñga dan kêsêlên mbo sen akên Jerusalem ma bu sip tên malac Jeriko ndi, ma lau kan sêkôc in dôn. Ñac sêkôc in ndê ñakwê su, sic in tisac e kêpin bu mbac ndu, goc sêhu in sin yêc ma sêlhô si. ³¹ Tinjambu dabunjsiga Israel-ñga dan kêsêlên mbo sen tigen dinañ men, ma tên ndoc in gêlic ñgac dau, nan kêlêc in ma kôlhô gi. ³² Malô goc ñgac Israel-ñga dan akên †Liwai ndê ton men hôc asê, gêlic ñgac dau, ma kêlêc in ma kêsêlên gi. ³³ Tinjambu ñgac Samaria-ñga dan kêsêlên mbo sen dinañ, men hôc asê, goc gêlic ñgac dau ma tawalô in. ³⁴ In tên in gi, kêgwasiñ in ndê gamboc ña olib ñakwi ti wain, goc kêpañ. Ma in kên in ndöc in ndê donki ñahô, kôc in sa gi sôc andu ñaclen-ñga dan, ma yob in. ³⁵ Galanjsê bêbêc in kên mone denarii lu tên andu ñadau, ma sôm, ‘Nem yaom ñgac dindec. Ma mone dindec bu nditôm dom, goc wakên mone ñatô tiyham tên ndoc aö wambu wamen.’ ”

³⁶ Ma Yisu ndac, “Am gauc gêm bocke? Lau tö dinañ si asa in ñgac nan sip lau kan si amba, nan ndê ñgac menpañ in-ñga?” ³⁷ Goc ñgac yomsu-ñga sôm, “Ñgac dê, nan tawalô in.” Ma Yisu sôm, “Am ndi ma kôm bocdinañ. Tamwalô lau hon ma nem ñac sa.”

Mata lu Maria

³⁸ Yisu ti ndê ñgacsênjomi sênjsêlên si e sêhôt asê malac dan. Ma awhê dan, nan ndê ñaê Mata,

kêgalêm Yisu bu nen gên yêc in ndê andu. ³⁹ Têñ ndöc Yisu sôc gi ndöc, nan Mata ndê asiwê Maria ndöc sic kêpiñ Pômdau gahi-nga, bu ngô in ndê yom. ⁴⁰ Tigen Mata kôm gwelenj atu tu ndê gên-nga. In têt Yisu men ma ndac, “Pômdau, aô tanwasênj gakôm gwelenj gambo! Aô asinwê lec gêm aô sa dom, ma am gêlic nayham, me? Sôm bu in nem aô sa.” ⁴¹ Magoc Yisu ô in ndê yom ma sôm, “Mata, Mata, am hêgo daôm tu gên daêsam-nga. ⁴² Magoc lau honj sêpônda gên atu tigen. Maria tac whinj gên nayham dau, ma lau danj oc sêtôm dom bu sêkôc su yêc in.”

11

*Yom pi lêñ datenj mbec-nga
(Mat 6:9-13; 7:7-11)*

¹ Têñ bêt danj Yisu tenj mbec mbo gamenj danj. In tenj mbec pacndê, ma in ndê ngac-sênôm danj sôm têt in, “Pômdau, tôm Jon kêdôhônj in ndê sênômi, dec êmdôhônj yac bu atenj mbec.” ² Ma Yisu sôm, “Têñ ndoc mac bu atenj mbec, nan atenj bocdec bu:

Damanj, am nem nêê lau sênem dabunj manj.

Mwenj ti lau honj si Pômdau.

³ Tôm bêt honj kêñ yac mba gö têt yac.

⁴ Suc yac mba sac kwi, bu lau honj nanj sêkôm sac têt yac, nanj asuc si sac natôp kwi bocdinanj.

Ma yob yac bu lêtôm tap yac sa dom.”

⁵⁻⁶ Ma inj gic têt yom ma sôm, “Akôc gauc pi mac daôm nem lêñ nanj atenj gên têt nem dawami. Mboe am nem nêclenj senj balin-nga danj menj hôc asê têt ôbwêc, ma am pônâda gên danen-nga bu kêñ têt in. Ma têt timaninhu am bu têt am nem

dawam danj ndi, ma sôm tênh in, ‘Oê dawan, kên gö ñatô tênh aô bu wakên tênh aô nen silip nanj kwahic dec menj hôc asê.’ ⁷ Am gauc gêm bocke? Am dawam dinanj oc ô nem yom yêc andu ñalôm ma sôm, ‘Kên ñawapac tênh aô dom! Aô gac gatam ahuc su, ma anenj balêkoc sêyêc bêc su. Gitôm dom bu watisa ma wakên gên danj tênh am!’ Inj oc sôm bocdinanj, a? ⁸ Aô wasôm tênh am, bu am nem dawam oc tisa ma kên gên tênh am, magoc inj oc kên tu am dawam inj-nga dom. Inj oc kên gên tênh am tôm am ndac, ñahu bu am pônâ daôm ma mayam pac tu ndac inj-nga.

⁹ “Bocdinanj aô wasôm tênh mac. Atenj gên tênh Anötö, dec oc akôc ñandô, anjalê inj ti ndê lênh, ma oc atap sa, ma amati gatam, dec oc lêc su tênh mac. ¹⁰ Bu Anötö kên gên tênh lau honj nanj sêndac inj, ma lau honj nanj sênjalê inj ti ndê lênh, nanj oc sêtap sa, ma ñac nanj sêmati gatam, nanj oc lêc su tênh ñac.

¹¹ “Damba danj, bu atungac tenj i, dec oc kên mboc wêm danj tênh inj dom. ¹² Ma atungac bu ndac mbac ñ agulu, goc damba oc kên gapingap tênh inj dom. ¹³ Mac lau sac, tigenj atoc nem balêkoc sa ña gên ñayham-ñayham. Magoc Damam nanj mbo undambê inj gitên enj, ma oc kên Ñalau Dabunj tênh lau nanj sêtenj inj.”

Yisu ndê ñaclai ñahu

(Mat 12:22-32; Mak 3:23-27)

¹⁴ Tênh ndoc danj Yisu soc ñalau sac awha mba danj su yêc ñgac danj. Tênh têm ñalau sac hu ñgac awha mba dau sinj, nanj ñgac dau gic hu sôm yom asê, ma lau tonj atu nanj sêlic, nanj sêhêdaê.

15-16 Lau natô bu sêṇsahê Yisu, dec sêṇdac iṇ bu kôm gêṇ dalô danṇ bu tôc asê bu iṇ kôc ṇac lai yêc Anötô ndê. Ma lau natô sêṇsôm, “ṇalau sac si ṇadau †Belsebal kêṇ ṇac lai têṇ Yisu, ma bocdinaṇ iṇ soc ṇalau sac su.” 17 Yisu kêyalê ṇac si gauc, ma sôm, “Lau gameṇ danṇ bu sêwhê dau kôc, dec ṇac si ṇacyo oc sêṇṇ ṇac su. Ma gôlôwac danṇ bu sêwhê dau kôc, dec ṇac oc sêlhac ṇaṇga dom, ma ṇac si ṇacyo oc sêku ṇac dulu. 18 Ma Sadanṇ boc-dinaṇ. Iṇ bu kêṇ kisa iṇ ndê ṇalau sac, dec iṇ ndê gôliṇ oc ṇiṇga. Bocke dec mac asôm bu aô gasoc ṇalau sac su ṇa Belsebal ndê ṇac lai. 19 Mac asôm bu aô gakôc ṇac lai yêc Belsebal, dec gasoc ṇalau sac su. Ma bocke? Mac nem sêṇjomi naṇ sem gwelenṇ sêṇsoc ṇalau sac-ṇga sêwhiṇ, naṇ mac aṇgôliṇ yom dau pi ṇac whiṇ, a? ṇac oc sêlic mac nem yom bu so ma sêmatôc mac! 20 Aô gasoc ṇalau sac ṇa Anötô ndê ṇac lai, bocdinaṇ aṇyalê bu Anötô ndê ṇac lai bu nem gôliṇ gêṇ hoṇ, naṇ hôc asê mac su.

21 “Sadanṇ iṇ gitôm ṇgac ti licwalô atu naṇ kôc iṇ ndê wapa siṇ-ṇga, ma yob iṇ ndê andu. Oc tôm dom bu lau sêṇgaho ṇgac kainṇ dinaṇ ndê gêṇ danṇ. 22 Tigeṇ ṇgac ti licwalô atu naṇ hôc gêlêc iṇ ndê bu ndic siṇ têṇ iṇ ma ku iṇ dulu, dec iṇ oc kôc iṇ ndê wapa siṇ-ṇga su, ma whê iṇ ndê wapa hoṇ kôc.

23 “Asa naṇ kalhac whiṇ aô dom, naṇ ti aneṇ ṇacyo. Ma asa naṇ gic lau sa sêtêṇ aô sêmeṇ dom, naṇ soc ṇac su yêc aô.”

*Nalau sac sêṇsalê mala naṇ yêc ṇambwa
(Mat 12:43-45)*

24 “Têṇ ndoc ṇalau sac danṇ sa yêc ṇamalac danṇ, naṇ gitôm iṇ kêgihi mbo gameṇ sawa ma kêsalê

mala ênwhan dau-nga. Tigen têng ndoc in tap sa dom, nan in oc sôm têng dau, ‘Aö wambu wandi wasôc andu nan aö gahu sin su.’ ²⁵ Ma in oc mbu ndi, ma tap sa bu ñamalac dau ndê ñalôm yêc ñambwa, gitôm andu sawa nan sêmasan ñawasi sa. ²⁶ Dec in oc sa ndi, kôc ñalau sac 7 nan sac sambuc sêhóc gêlêc in su, nan sêmen, ma ñac hon oc sêsôc andu dinan sêndi ma sêmbo dinan. Bocdinan ñawapac nan tap ñamalac dau sa, nan hóc gêlêc ñawapac ñamata-ñga-ñga su.”

²⁷ Yisu sôm yom dinan, ma awhê dan yêc lau ton atu ñalôm ta yom ma sôm, “Am dinam nan kôc am ma kêñ su am, nan tap Anötö ndê mwasin sa su.”

²⁸ Ma Yisu sôm, “Lau nan sêngô Anötö ndê yom ma sêkôc sa ti danğa wambu, nan oc sêtap Anötö ndê mwasin sa hóc gêlêc su.”

Lau sêndac Yisu bu kôm gêñ dalô
(Mat 12:38-42)

²⁹ Lau daêsam nan sêmbo sêwhin Yisu, nan si ton kêsôwec ñapan. Ma in sôm, “Lau têm dindec-nga ñac lau sac. Sêndac gêñ dalô, magoc Anötö oc tôc gêñ dalô tigen têng ñac, tôm gêñ dalô nan in kôm pi Jona.

³⁰ Anötö kêkin Jona têng lau Ninewa gitôm gêñ dalô dan, ma ñalên tigen gêñ nan oc hóc asê ñamalac ndê Atu, nan oc ti lau têm dindec-nga si gêñ dalô.

³¹ “Muñ-nga, Kwin Siba-nga* kêsêlên sen balin, bu ngô Kin Solomon ndê yom ti gauc atu-tu. Ma kwahic dec ñgac nan hóc gêlêc Solomon su mbo dec, tigen lau têm dindec-nga sêpu in ndê yom. Tu dinan-nga, kwin dau oc tisa akên lau batê têng ndoc

* **11:31:** Kwahic dec dasam gamen Siba-nga bu ‘Arabia.’ Min pi Kwin Siba-nga sêto yêc 1 Kin 10:1-13.

Anötö oc êmatôc lau, ma in oc hoc lau têm dindec-nga si sac asê. ³² Ma ñalên tigen, tên béc ñambu-nga lau Ninewa oc sêtica sêwhin lau têm kwahic dec-nga, ma ñac oc sêhoc lau dindec si sac asê. Nahu bu lau Ninewa sêngô Jona ndê yom ma sem si ñalôm kwi. Ma kwahic dec, ngac nan hôc gêlêc Jona su mbo dec, tigen lau kwahic dec-nga sem dau kwi dom.”

*Namalac si tandô gitôm ya ñawê
(Mat 6:22-23)*

³³ “Yac datun lam asê tu bu dasin kwi me tanjatôc ña suc ahuc dom. Mba! Dakên êngalên lhu, bu lau nan sêsôc sêmen nan sêlic ñawê.

³⁴ “Am nem tanôm gitôm ya ñawê nan tôc sen tên am. Bocdinañ am nem tanôm bu wê am sa lên ñayham, dec am oc gacgen mbo ñawê ñalôm. Magoc tanôm bu wê am sa lên sac-nga, dec am gacgen mbo ñasec ñalôm. ³⁵ Tu dinañ-nga dec yob daôm ñapep bu ñawê nan yêc nem ñalôm, nan mbac e ñasec sa dom. ³⁶ Ma am bu sap lên ñawê-nga dôn ñapan, ma ndic ahê lên ñasec-nga, dec ñawê oc nem am nem ñalôm sambuc ahuc, tôm lam dan pô am.”

Yisu pu lau Palêsai ti lau yomsu-nga

³⁷ Yisu gic bata yom dinañ su, goc Palêsai dan kêgalêm in bu nen gên whin in. Yisu sôc ngac dau ndê andu gi ma ndôc sic ndôc tebo. ³⁸ Ma Palêsai dau hêdaê bu Yisu gên gên magoc kêgwasin amba mun su dom. ³⁹ Goc Pômdau sôm tên in, “Mac lau Palêsai atôm laclhu ti pele nan sêngwasin ñadômbwê-nga ñawasi sa, magoc ñalôm ñadômbwi yêc dôn yêc. Bu mêtê tamgatu gên ma mêtê sac

hóc mac nem ñalôm ahuc. ⁴⁰ Mac lau gauc mbasi-
nga. Anötö nan kêmasan ñamalac ñamlic ti gêñ awê-
nga nan kêmasan ñalôm-nga whin. ⁴¹ Tamwalô lau
ñalôm sawa, ma akêñ nem ñalôm sambuc tu anem
ñac sa-nga, ma bocdinan dec mac nem ñamlic ti
ñalôm whin oc ñawasi sa yêc Anötö anğô-nga.

⁴² “Oyaê. Mac lau Palêsai awhê nem gêñ ôm-nga
sauñ-sauñ hon kôc ti ton amanlu, ma akêñ ton tigen
ti da têt Anötö. Mac akôm gêñ sauñ dinan, tigen
mac ahu gêñ atu sin. Mac amatôc lau si yom ñapep
dom, ma atac whin Anötö su dom. Gêñ sauñ nan
mac akôm, in ñayham, magoc akôm yêc gêñ atu-tu
whin bocdinan. ⁴³ Oyaê. Mac lau Palêsai atac whin
bu andôc lau tiwaê si pôn yêc lôm wê-nga, ma atac
whin bu lau sêtoc mac sa atôm lau tiwaê yêc malac
lôm. ⁴⁴ Oyaê. Tu mêtê sac nan hóc mac nem ñalôm
ahuc, dec mac atôm nom nan sêñsuhun ngac batê
dan yêc ñalôm, ma lau sêñyalê dom ma sêñsêlên
sêmbo ñahô.”

⁴⁵ Gwalam akwa yomsu-nga dan ngô Yisu ndê
yom dinan ma sôm, “Kêdôhônwaga, am sôm yom
dinan pi lau Palêsai, ma am pu yac lau yomsu-nga
whin.” ⁴⁶ Ma Yisu sôm, “Oyaê. Mac lau yomsu-
nga akêñ yomsu daêsam têt lau nan kêt wapac ñac
ñandô, tigen mac daôm akôm gêñ dan bu anem ñac
sa tu sêhóc ñawapac dinan-nga dom.

⁴⁷ “Oyaê. Mac amasan sêhô bu atoc propet
akwa-kwa sa, magoc mac daôm apami sic propet
dau ndu. ⁴⁸ Bocdinan mac atôc asê bu mac alic
gêñ nan apami sêkôm, nan bu ñayham. ⁴⁹ Anötö
kêyalê gêñ hon, dec hoc yom asê gwanan pi mac
apami bocdec bu, *‘Aö wanjin lau propet ma lau*

aposel sêten̄ ηac sêndi, magoc ηac oc sêndic propet ηatô ndu, ma sêkôm mêtê sac têt̄ ηatô.’ ⁵⁰ Bocdinan̄ mac lau têt̄ dindec-nga oc awêkain̄ ηagêyô awhin̄ apami, tu propet hon̄ si dac nan̄ sêkêc sin̄-nga, têt̄ têt̄ ηamata-nga andô e men̄. ⁵¹ Aêc, Abel in̄ ηgac ηamata-nga, ma Sekaria in̄ ηgac ηambu-nga, propet nan̄ ηac sic̄ ndu yêc lôm dabun̄, ma alta nan̄ kalhac lôm dabun̄ ηasactô, nan̄ ηalhu. Aêc, aô wasôm têt̄ mac, lau têt̄ kwahic dec-nga oc sêtap matôc sa pi lau hon̄ dinan̄ si dac.

⁵² “Oyaê. Lau daêsam takwê mac gwalam akwa yomsu-nga bu awhê Anötö ti ndê lêt̄ sa têt̄ ηac, magoc mac am ηac sa ηapep dom. Mac atôm lau nan̄ sêyob ki gatam-nga, ma sêtec bu sêkac sa têt̄ lau nan̄ bu sêsôc sêndi. Mac daôm anyalê Anötö ti asôc in̄ ηapu dom, ma mac alhac lau nan̄ bu sên̄yalê in̄ ti sêsôc in̄ ηapu, nan̄ ahuc.”

⁵³ Yisu gic bata yom dinan̄ ma hu andu dau sin̄. Ma lau Palêsai ti lau nan̄ sêndôhôn̄ yomsu, nan̄ sic̄ hu sêkê̄n̄ kisa in̄ ηandô. Nac sêndac in̄ pi gêt̄ daêsam, ⁵⁴ sên̄sahê bu sêtim in̄ bu sôm yom giso, dec oc tôm bu sêmatôc in̄.

12

Yisu ndê yom ηatô (Mat 10:26-33)

¹ Têt̄ têt̄ dinan̄ lau daêsam andô, tausen ma t ausen, sêkôm mwasac bu sêtigasuc Yisu e sên̄gapin̄ dau sa. Ma Yisu sôm yom têt̄ in̄ ndê ηgacsên̄omi bocdec bu, “Ayob daôm ηapep bu lau Palêsai si mêtê sac lom mac dom. Nac sêsôm yom ηayham magoc

ɲac dau sêkôm ɲandô sa dom. Mêtê dau gitôm yist naɲ tôm bu nem bolom ahuc ɲagahô eɲ.

² Gêɲ hoɲ naɲ lau sem ahuc, ma gêɲ hoɲ naɲ yêc siɲ dau, naɲ oc meɲ sa tiawê. ³ Yom bocke naɲ mac asôm têtɲ daôm têtɲ ôbwêc, naɲ lau oc sêɲgô têtɲ acsalô. Ma yom naɲ mac asôm malô têtɲ daôm yêc andu ɲalôm, naɲ oc sêsôm asê yêc malac lôm. ⁴ Aneɲ lau mac aɲgô. Atôc lau naɲ bu sêndic mac ndu-ɲga dom, bu tiɲambu ɲac sêtôm dom bu sêkôm gêɲ daɲ tiyham têtɲ mac. ⁵ Tigeɲ aô wasôm têtɲ mac bu atôc Anötô, ma asôc iɲ ɲapu. Bu têtɲ ndoc mac ambac ndu su, iɲ ndê ɲac lai yêc bu tuc mac asip lambwam andi. Aêc, aô wasôm têtɲ mac, atôc iɲ!

⁶ “Akôc gauc pi mbac kecsoc naɲ lau sêlic bu gêɲ ɲambwa. Tigeɲ Anötô oc êɲlhiɲ ɲac si daɲ siɲ dom. ⁷ Ma Anötô tac whiɲ mac hóc gêlêc mbac saun-saun daêsam su. Yomandô! Anötô kêyalê mac e pi sa, gitôm iɲ sê mac nem kêclauɲ hoɲ sa timala. Bocdinaɲ atôc daôm dom.

⁸ “Aô wasôm têtɲ mac bu asa naɲ sôm asê yêc lau aɲgô-ɲga bu iɲ kêɲ whiɲ aô, naɲ ɲamalac ndê Atu oc sôm ɲamalac dau ndê ɲaê asê yêc Anötô ndê aɲela aɲgô-ɲga. ⁹ Tigeɲ asa naɲ sêc iɲ ndê kêɲ whiɲ aô-ɲga ahuc yêc lau aɲgô-ɲga, naɲ ɲamalac ndê Atu oc sêc iɲ ahuc yêc Anötô ndê aɲela aɲgô-ɲga bocdinaɲ. ¹⁰ Asa naɲ bu sôm yom sac pi ɲamalac ndê Atu, tigeɲ tiɲambu kac ndê ɲalôm kwi, naɲ Anötô oc suc iɲ ndê sac kwi. Tigeɲ asa naɲ sôm yom sac sambuc pi ɲalau Dabuɲ, naɲ Anötô oc suc iɲ ndê sac kwi dom.

¹¹ “Tiɲambu lau oc sêkôc mac dôɲ tu mac akêɲ whiɲ aô-ɲga. ɲac oc sêwê mac atêɲ lau bata Israel-

nga andi, bu sêmatôc mac yêc nac si lôm wê-nga. Ma nac oc sêkên mac alhac gôlinwaga ma lau ti naclai ango-nga bocdinaŋ. Têŋ ndoc dinaŋ, ahêgo daôm tu yom asôm ma aô têŋ nac-nga dom. ¹² Bu Nalau Dabuŋ oc êndôhôn mac ma kêŋ yom têŋ mac tu asôm-nga têŋ ndoc dinaŋ.”

Yom gôlin pi ngac ti lêlôm

¹³ Ngac daŋ yêc lau toŋ atu dinaŋ nalôm ndac Yisu bocdec bu, “Kêdôhônwaga, sôm têŋ aô dôwaŋ bu whê damaŋ ndê wapa lênsêm kôc ma kêŋ natô têŋ aô.” ¹⁴ Magoc Yisu sôm, “Am ngô su naŋ. Anötö kêyalin aô sa ti am nem ngac êmatôc yom-nga me ngac whê wapa kôc-nga dom.” ¹⁵ Goc in sôm têŋ lau hoŋ, “Ayob daôm napep bu tamgatu wapa nom-nga dom. Bu namalac si nahu sêmbo tali-nga sip awa ti wapa daêsam naŋ sic sa-nga, naŋ dom.”

¹⁶ Ma in sôm yom gôlin daŋ têŋ nac bocdec bu, “Ngac ti lêlôm daŋ mbo, ma gêŋ naŋ in sô yêc ndê nom gêm nandô daêsam andô. ¹⁷ Dec in gauc gêm têŋ dau, ‘Aô wakôm sake? Anen andu wakên gêŋ nandô sôc-nga oc nditôm dom.’ ¹⁸ Bocdinaŋ dec in sôm, ‘Aô wakôm gêŋ bocdec. Aô wasen andu akwa-kwa hoŋ su, ma wakwê andu wakuc natô naŋ atu andô. Ma yêc dinaŋ, aô wandic anen gêŋ nandô ti wapa hoŋ sa. ¹⁹ Ma aô wasôm têŋ dauŋ, ‘Aô gac gêŋ nayham daêsam sa, gitôm bu oc wambo yala daêsam. Aô wanwhaŋ dauŋ, ma waneŋ ti wanôm gêŋ ma watisambuc.’ ” ²⁰ Magoc Anötö sôm têŋ in, ‘Am ngac gauc mbasi-nga! Ôbwêc dec am oc mbwac ndu. Ma wapa naŋ am gic sa tu daôm-nga, naŋ oc ti asa ndê?’ ” ²¹ Goc Yisu sôm, “Lau hoŋ naŋ sic wapa daêsam sa tu dau-nga, magoc sêmbo sêtôm lau

nalôm sawa tu sênyalê Anötö ti ndê mêtê dom-nga, nan lau gauc mbasi-nga bocdinan.”

Dahêgo dauŋ dom

(Mat 6:25-34)

²² Ma Yisu sôm têŋ in ndê ngacsêŋomi, “Bocdinan dec aô wasôm têŋ mac, ahêgo daôm tu gêŋ aneŋ-nga, me tu ŋakwê asôc-nga dom. ²³ Bu Anötö kêŋ mac ambo tamli, ma gêŋ dinan in gêŋ atu. Gêŋ danen-nga in gêŋ atu dom. Ma Anötö kêŋ mac nem ŋamlic ŋagêŋ hon. Dinan in gêŋ atu, ma ŋakwê asôc-nga in gêŋ atu dom.

²⁴ “Akôc gauc pi mbac ko. Nac sêsô gêŋ dom, ma sic gêŋ ŋandô sa dom. Nac si andu gêŋ ŋandô-nga mbasi, tigen Anötö gôlôm ŋac. Ma Anötö tac whin mac ŋamalac hôc gêlêc mbac hon su. ²⁵ Ma mac nem asa, bu hêgo dau dec oc tôm bu ndic têku ndê têm mbo tali-nga? ²⁶ Mac atôm dom bu akôm gêŋ saun andô dinan, bocdinan tu sake-nga mac ahêgo daôm pi gêŋ ŋatô?

²⁷ “Ma akôc gauc pi ŋaola ŋayham nan sêpo sêlhac kwan ŋalôm. Sêkôm gwelen dom, ma sêmasan ŋakwê dom, tigen aô wasôm têŋ mac, bu Kin Solomon in sôc ŋakwê ŋayham andô, magoc in ndê gôlôn ti ŋawasi hôc gêlêc ŋaola dinan dan su dom. ²⁸ O mac lau nan akêŋ whin gwalec, aŋgô! Kwan ti ŋaola nom-nga sêlhac bêc daêsam dom, ma lau oc sêkêŋ ya neŋ su, magoc Anötö kêŋ gêŋ dau ti ŋadalô ŋayham ma yob ŋapep. Ma bocdinan, anjalê bu yom ŋandô, Anötö oc yob mac ma kêŋ ŋakwê têŋ mac whin. ²⁹ Ahêgo daôm pi gêŋ aneŋ ti anôm-nga dom, ma ambo ti ŋalôm ŋawapac dom. ³⁰ Lau sambuc nan sênyalê Anötö dom, nan sêhêgo dau pi

gêñ kainj dinanj napanj, magoc Damam undambê-nga kêyalê su bu mac apônda gêñ dau. ³¹ Ahêgo daôm tu gêñ dinanj-nga dom, magoc akôm nanga bu atap malam sa yêc Anötö ndê gôlinj napu. Ma inj oc yob mac tu gêñ nom-nga-nga whinj. ³² O anenj lau, atöc daôm dom. Bu mac nem Damam undambê-nga tac whinj bu ti mac nem Kinj ma kôc mac sa andöc inj ndê gôlinj napu.”

Tajsalê awa nandô undambê-nga

(Mat 6:19-21)

³³⁻³⁴ “Aö wasôm têñ mac, bu gamenj bocke nanj mac nem awa yêc, nanj mac oc ahê gauc pi ma atac whinj napanj. Bocdinañ akêñ nem wapa nom-nga têñ lau sênemlhi, ma akêñ nem awa tu anem lau njalôm sawa sa-nga. Ma apo gêñ undambê-nga sa ti nem awa nandô, nanj oc yêc nayham napanj. Lau kanj oc sêtôm dom bu sênem kanj, ma gêñ danj oc kôm tisac dom.”

Tamasanj daunj tu Pômdau mbu menj-nga

(Mat 24:42-51)

³⁵⁻³⁶ “Amasanj daôm napep. Ambo atôm lau akinj nanj sêsôc ñakwê gwelenj-nga sa, ma sêtuj si lam asê ma sêhônj si ñadau bu mbu menj akêñ mwasiñ nem awhê-nga. Têñ ndoc ñac si ñadau mbu menj ma êmati gatam, nanj ñac oc sêkac gatam sa têñ inj ñagahô. ³⁷ Ñadau bu mbu menj ma tap lau akinj sa, nanj sêmasanj dau gwananj ma sêhônj inj sêmbo, dec ñac oc sêtap mwasiñ atu sa yêc inj. Aö wasôm yomandô, ñadau dau oc menj, sôc ñakwê tôm lau akinj sêsôc, kênj ñac sêndöc tebo, ma nem akinj ñac. ³⁸ Ñadau bu menj têñ timaninjhu me têñ ôbwêc lôm, ma tap ñac sa sem ali ma sêhônj inj sêmbo, dec inj

oc êmwasiŋ ɲac êɲlêc. ³⁹ Tigen ɲɔŋô su naŋ! Lau kaŋ sêkêŋ puc pi ndoc sêmeŋ-ɲga dom. Andu ɲadau daŋ, bu êɲyalê ndoc naŋ ɲgac kaŋ daŋ oc meŋ, dec iŋ oc yob iŋ ndê andu ɲapep bu ɲgac kaŋ dinaŋ sôc meŋ dom. ⁴⁰ Ma mac bocdinaŋ, amasaŋ daôm ɲapep ma anem ali ɲapaŋ, bu ɲamalac ndê Atu oc mbu meŋ têtŋ ndoc naŋ mac akêŋ batam, naŋ dom.”

⁴¹ Têtŋ dinaŋ Pita sôm, “Pômdau, am sôm yom gôliŋ dinaŋ bu yac ɲgacsêɲomi ɲɔŋô, me bu lau hoŋ sêɲgô?” ⁴² Ma Pômdau ô yom ma sôm, “Mac nem asa iŋ gitôm ɲgac akiŋ ɲayham ma ti gauc? ɲgac akiŋ kaiŋ dinaŋ ndê ɲadau bu lhô têtŋ gameŋ daŋ ndi, goc iŋ oc kêtŋ iŋ yob lau akiŋ ɲatô ma kêtŋ gêtŋ daneŋ-ɲga têtŋ ɲac tôm ɲandoc. ⁴³ Ma têtŋ ndoc ɲadau mbu meŋ ma tap iŋ sa kôm iŋ ndê gwelen ɲapep mbo, naŋ iŋ oc lîc iŋ ɲayham ma kôm ɲayham têtŋ iŋ. ⁴⁴ Yomandô! ɲadau oc kêtŋ iŋ yob iŋ ndê wapa hoŋ. ⁴⁵ Magoc ɲgac akiŋ sac oc sôm têtŋ dau, ‘Aneŋ ɲadau oc mbu meŋ ɲagahô dom.’ Goc iŋ oc ndic lau akiŋ ɲatô, ma neŋ gêtŋ ɲawahô ti nôm wain e êɲiŋ iŋ. ⁴⁶ ɲadau oc mbu meŋ hôc asê têtŋ bêc ti acgatu naŋ ɲgac akiŋ dau kêtŋ bata, naŋ dom. Ma iŋ oc kêtŋ ɲagêyô sac sambuc têtŋ iŋ, ma soc iŋ su ndi bu mbo whiŋ lau naŋ daŋgapêc ma sêkêŋ whiŋ dom.

⁴⁷ “ɲgac akiŋ naŋ kêyalê gêtŋ naŋ iŋ ndê ɲadau tac whiŋ bu iŋ kôm, tigen tec bu kôm ma kêmasaŋ dau dom, naŋ oc tap ɲagêyô atu sa. ⁴⁸ Magoc ɲgac akiŋ naŋ kêyalê gêtŋ naŋ ɲadau tac whiŋ bu iŋ kôm, naŋ dom, dec kôm mêtê sac naŋ gic waê bu iŋ tap ɲagêyô sa, naŋ oc kôc ɲagêyô saŋ. Lau hoŋ naŋ sêtap mwasiŋ sa yêc Anötô, naŋ iŋ takwê ɲac bu

sêkôm gwelenj ɲa mwasiɲ dinanj e nem ɲandô. Ma ɲac nanj sêtap mwasiɲ atu sa, nanj inj takwê ɲandô daêsam.”

Lau oc sêwhê dau kôc tu Yisu-ɲga
(Mat 10:34-36)

⁴⁹ Ma Yisu gic têku yom ma sôm, “Aô gasip nom gameɲ bu wakêɲ ya êɲsahê lau nom-ɲga, ma aô atac whiɲ bu ya dau lom asê ɲagahô. ⁵⁰ Aô dauɲ oc wahôc ɲawapac ti ɲandê atu, nanj gitôm busaɲgu kainj danj tu waliɲ-ɲga. Ma aô wapô sim dauɲ ɲandô e gêɲ dau ɲandô sa. ⁵¹ Gauc nem bu aô gameɲ bu wahê wamba lau dom. Mba! Tu aô-ɲga dec lau oc sêwhê dau kôc. ⁵² Têɲ kwahic dec ma ndi, lau nanj sêmbo andu danj, nanj oc sêwhê dau kôc tu aô-ɲga. Lau amanɲanj bu sêmbo, goc lu oc sêkêɲ kisa tō, ma tō oc sêkêɲ kisa lu. ⁵³ Tu aô-ɲga dec ɲac oc sêwhê dau kôc. Damba lu atungac oc sêkêɲ kisa dau, ma dinda lu atuwê oc sêkêɲ kisa dau. Ma lawawê akwa lu lawawê wakuc oc sêkêɲ kisa dau bocdinaɲ.”

Taɲyalê ndoc

⁵⁴ Ma Yisu sôm têɲ lau toɲ atu, “Mac bu alic dao yec sambuc danj puc pi meɲ, dec mac asôm bu u oc ndic, ma u gic. ⁵⁵ Ma muasa bu êɲsêlêɲ, dec mac asôm bu gameɲ oc ɲandê sa, ma gameɲ ɲandê sa. ⁵⁶ Mac lau atim yom lau-ɲga! Mac alic gêɲ dalô nom-ɲga ti umbonj-ɲga ma mac atôm bu aɲyalê ndoc. Ma bocke dec mac alic gêɲ honj nanj aô gakôm yêc nom, magoc mac nem gauc sa pi aô neɲ ɲahu lec dom.

⁵⁷ “Oc tôm bu mac aɲsahê gêɲ honj tu bu aɲyalê lêɲ bocke inj lêɲ gitêɲ, magoc tu sake-ɲga mac akôm

dom? ⁵⁸ Angô! Am asa nan nem tôp bu yêc namalac dan, ma in bu wê am têt ngac êmatôc yom-nga, nan goc êmsahê bu êmasan yom whin in têt ndoc amlu anjêlê ambo sen. Ma bocdinan ngac dau oc kê am têt ngac êmatôc yom-nga dom. Bu mba, mboe ngac êmatôc yom-nga o c kê am têt ngac yob gapocwalô-nga, ma in oc kê am sôc gapocwalô ndi. ⁵⁹ Aô wasôm têt am bu am oc ndôc gapocwalô napan e am ndic nem tôp hon pacndê.”

13

Danem daun kwi bu dandinan dom

¹ Têt ndoc dinan lau natô sêmbô sêwhin Yisu, ma nac sic min yom pi lau Galili-nga natô. Lau dinan sic domba ndu bu sêkên ti da, ma gôlinwaga Pailot ndê lau sêmen ma sic nac ndu ma sêngalun nac si dac whin domba si dac. ² Yisu ngô nac si yom dau, goc ndac, “Mac gauc gêm bocke? Lau Galili-nga dinan si sac hôc gêlêc lau Galili-nga natô si sac su, ma bocdinan nawapac dinan hôc asê nac, a? ³ Aô wasôm, mba! Tigen mac bu anem nem nalôm kwi dom, dec mac oc andinam. ⁴ Gauc nem andu balin nan lau sêkwê yêc Siloam, nan ku sa ma sec lau 18. Mac gauc gêm bocke? Lau 18 dinan si sac hôc gêlêc lau Jerusalem-nga si sac, a? ⁵ Aô wasôm têt mac, mba! Tigen mac bu anem nem nalôm kwi dom, dec mac hon oc andinam.”

⁶ Goc Yisu sôm yom gôlin dan bocdec bu, “Yêc ngac dan ndê ôm wain-nga, a kin dan kalhac. Ma ngac dau gi kêsalê a kin nandô, magoc tap sa dom. ⁷ Dec in sôm têt ngac nan yob in ndê ôm, ‘Tôm yala tö aô gamen kasalê nandô yêc a kin dindec,

ma gatap sa dom. Lêñ dulu, bu a dau pôc gamen ahuc ma gêm ñandô dom.’ ⁸ Tigen ñgac yob ôm-nga sôm, ‘Aneñ ñadau, hu sin lhac yala dan tiyham. Aô wandic gwelec ma wahôc nom pi ñahu. ⁹ In bu nem ñandô têng yala wakuc, dec oc ñayham. Ma bu nem ñandô dom, nan goc am lêñ dulu.’ ”

Yisu kôm awhê bôlin dan ñayham sa têng bêc Sabat-nga

¹⁰ Têng bêc Sabat-nga dan, Yisu kêdôhông lau mbo lôm wê-nga dan. ¹¹ Ma awhê dan mbo, nan ñalau sac kôm in ndôc bôlin tôm yala 18. In kêsêlêng kêñkôñ ma gitôm dom bu in lhac solop. ¹² Yisu gêlic in ma ta in meñ, goc sôm, “O awhê daôm, aô bu wasen gêñ nan sô am dôn, nan su.” ¹³ Goc Yisu kêñ amba sac in, ma ñagahô in kalhac tisolop, ma kêpin Anôtô.

¹⁴ Tigen ñgac bata nan yob lôm wê-nga dinan, in tac ñandê bu Yisu kôm awhê dinan ñayham sa têng bêc Sabat-nga. Dec in sôm têng lau, “Bêc 6 yêc bu danem gwelen. Mac bu atac whin bu ñayham sa, dec amen têng bêc Sabat-nga dom. Amen têng bêc 6 dinan ñadan.” ¹⁵ Magoc Pômdau ô in ndê yom ma sôm, “Mac lau atim yom lau-nga. Mac hon akôm gwelen têng bêc Sabat-nga têng ndoc mac ambwala nem donki ti makao su, ma awê ñac sêsa si bu sênôm bu. ¹⁶ Awhê dindê in Abraham ndê apawê dan, ma Sadañ sô in dôn tôm yala 18 su. Tu sake-nga dec tambwala in su têng bêc Sabat-nga dom?” ¹⁷ Yisu ndê yom dau kôm in ndê ñacyo hon maya atu. Tigen lau daêsam atac ñayham pi gêñ ñayham hon nan in kôm.

Yom gôlinj pi gêñ ñawhê saunj
(Mat 13:31-32; Mak 4:30-32)

¹⁸ Ma Yisu ndac lau dinanj, “Anötö ndê gôlinj kêsôwec ñalênj bocke? Aö wanem dôhônj pi gêñ sake bu wawhê sa? ¹⁹ Anötö ndê gôlinj gitôm ñawhê saunj andô danj, gitôm a soc ñawhê. Ngac danj kôc sa gi ma sô yêc ndê ôm, ma tinjambu gêñ dau po ti a atu, ma mbac lôlôc-nga sêmenj sêhê si ñaic yêc ñasangac.”

Yom gôlinj pi yist
(Mat 13:33)

²⁰ Ma inj sôm yom gôlinj danj tiyham bocdec bu, “Aö wanem dôhônj Anötö ndê gôlinj pi gêñ sake bu wawhê sa? ²¹ Aö wanem dôhônj pi yist, nanj awhê danj kêñ sip plawa lônj atu danj ma kégalañ. Ma ñasawa saunj enj yist dinanj kôm plawa honj sunj.”

Gatam undambê-nga saunj andô

²² Tinjambu Yisu kêsêlênj hêganônj Jerusalem gi. Inj golom-golom malac atu-tu ti saunj-saunj honj, ma kêdôhônj lau. ²³ Ma ñamalac danj ndac inj, “Pômdau, Anötö oc kôc lau tigenj-tigenj sa sêndöc undambê, me lau daêsam?” Ma Yisu ô yom ma sôm têtj lau, ²⁴ “Lau daêsam oc sêñsahê bu sêsôc gatam sêndi, magoc ñac oc sêtôm dom, bu gatam dau saunj andô. Bocdinañ akôm ñanga bu asôc gatam dau andi. ²⁵ Andu ñadau bu tisa ma ndic gatam ahuc, dec mac oc alhac awê, amati gatam ma asôm, ‘Pômdau, lêc gatam su têtj yac.’ Magoc inj oc sôm têtj mac bu, ‘Mac lau dinanj amenj akênj nde? Aö kayalê mac dom.’ ²⁶ Ma mac oc asôm, ‘Yac anj gêñ ti anôm gêñ awhinj am, ma am kêdôhônj lau yêc yac mba malac lôm.’ ²⁷ Tigenj inj oc sôm, ‘Mac lau dinanj amenj akênj nde? Aö kayalê mac dom. Alhö su yêc aö, mac

lau akôm sac-nga!’ 28-29 Têñ têm nambu-nga, mac oc alic Abraham, Aisak ma Jakob ti p ropet akwa-kwa hon sêndöc Anötö ndê gamen undambê-nga. Ma lau oc sêmen akên nom nabin hon, ma sênen mwasin atu yêc undambê. Magoc Anötö oc êmasuc mac su andi ambo gamen ahôc nandê-nga, ma yêc dinan mac oc atan, ma mac nem lhôm ênsin pi dau. 30 Angô su nan! Lau natô nan kwahic dec sêti lau nambu-nga, nan oc sêti lau namata-nga, ma lau namata-nga oc sêti lau nambu-nga.”

Yisu tan pi lau Jerusalem-nga

31 Têñ ndoc dinan lau Palêsai natô sêtên Yisu sêmen ma sêsôm, “Hu gamen dindec sin ma lhö ndi, bu Herod tac whin bu ndic am ndu.” 32 Magoc Yisu sôm têt nêc, “Mac andi asôm têt Herod, giam pôm dinan, ‘Acsalô lec ma lansê aö oc wasoc nalau sac su, ma wakôm lau gêmbac nayham sa. Ma têt bêt titö-nga aö oc wandic dabin anen gwelen.’ 33 Aö oc wakôm anen gwelen tôm bêt natô, ma tinambu aö watên Jerusalem wandi. Mac lau Israel-nga ac propet daêsam ndu su yêc Jerusalem, ma bocdinan dec aö gac waê bu wapi wandi wawhin.

34 “O Jerusalem, Jerusalem. Mac ac Anötö ndê lau propet ndu, ma lau gitên nan in kêkin têt mac, nan mac atuc na hoc ndu. Ndoc daêsam aö tac whin bu wandic mac lau sa asôc Anötö ndê gôlin napa tiyham, gitôm mbac dalec dinda gic natu sa sôc namakê napa. Tigen mac atec. 35 Bocdinan Anötö oc hu mac ti nem andu sin. Ma aö wasôm têt mac bu mac oc alic aö tiyham dom e mac asôm, ‘Tampin Mesaya nan men gêm Pômdau angô.’ ”

14

Yisu gêm ngac ñamlic sun dan sa

¹ Têñ béc Sabat-nga dan, Yisu sôc ngac bata dan ndê andu gi bu neñ gên. Ngac bata dau in lau Palêsai si dan, ma ñac si lau ñatô tatin Yisu sêmbo.

² Yisu gêlic ngac gêm bac dan ndöc, nan amba ti gahi sun. ³ Goc in ndac lau Palêsai ti gwalam akwa yomsu-nga bocdec bu, “Yac bu dakôm lau ñayham

sa têñ béc Sabat-nga, dec oc tanğilî yomsu Sabat-nga, me mba?” ⁴ Ñac sem dôn ma sêo yom dan dom, goc in kêmasec ngac ti gêm bac dinan, kôm in ñayham

sa, ma kêñ in kôlhö gi. ⁵ Ma in ndac ñac, “Mac nem balê dan me donki dan bu peñ sip sê ñalôm têñ béc

Sabat-nga, dec mac oc akôm sake? Mac oc ahê in sa pi meñ, me ahu in sin yêc?” ⁶ Ma ñac sêtôm dom bu sêo in ndê yom.

Datoc daun sa dom

⁷ Yisu gêlic bu lau nan ngac bata dau kêgalêm ñac sa bu sêneñ gên sêwhin in, nan atac whin bu sêndöc pôn nan gic lau tiwaê ñawaê. Dec in sôm

yom gôlin dan têñ ñac bocdec bu, ⁸ “Lau bu sêkên aheñ am bu neñ mwasiñ nem awhê-nga, nan ndi

ndöc lau tiwaê si pôn dom. Mboe mwasiñ ñadau kêgalêm ngac tiwaê dan nan hôc gêlêc am su. ⁹ Bu

bocdinan dec in oc têñ am meñ ma sôm, ‘Kêñ pôn ñayham dindêc têñ ngac atu dindêc.’ Ma am oc tisa

ti mayam, ma ndi ndöc pôn ñambwa. ¹⁰ Boc-dinan lau bu sêkên aheñ am bu neñ mwasiñ, nan ndi

ma ndöc pôn ñambwa. Ma mboe ñadau oc meñ ma sôm têñ am, ‘Aneñ silip, tisa ma mweñ ndöc pôn

ñayham.’ Ma bocdinan in oc po am nem waêm sa yêc ñacleñ hon anğô-nga. ¹¹ Ñalên tigen, lau nan

sêtoc dau sa, naŋ Anötö oc êngwiniŋ ɲac. Ma lau naŋ sêngwiniŋ dau, naŋ Anötö oc toc ɲac sa.”

Tamwasiŋ lau ɲalôm sawa

¹² Ma Yisu sôm têt ɲgac bata dau, “Am bu ndê mwasiŋ bu lau sêneŋ sêwhiŋ am, naŋ kêŋ aheŋ nem silip ti asidôwai, me lau ti lêtôm naŋ sêndöc am nem malac, naŋ dom. Am bu kôm bocdinaŋ, dec tiŋambu ɲac oc sêkêŋ aheŋ am bu neŋ gêt whiŋ ɲac, ma mwasiŋ dau ti am nem ɲagêyô. ¹³ Têt têt am ndê mwasiŋ daŋ, naŋ kêŋ aheŋ lau ɲalôm sawa ti lau bôliŋ ma lau tapec. ¹⁴ Ma bocdinaŋ am oc tap Anötö ndê mwasiŋ sa. ɲahu bu lau dinaŋ sêtôm dom bu sêkêŋ gêt daŋ ô nem mwasiŋ têt kwahic dec. Magoc têt ndoc lau gitêt sêtisa akêŋ lau batê-ŋga, naŋ Anötö oc kêŋ ɲagêyô ɲayham têt am.”

Yom gôliŋ pi mwasiŋ atu
(Mat 22:1-14)

¹⁵ Lau naŋ seŋ gêt sêwhiŋ Yisu, naŋ si ɲgac daŋ ɲgô Yisu ndê yom dinaŋ ma sôm têt iŋ, “Lau naŋ bu sêneŋ mwasiŋ atu yêc Anötö ndê gameŋ undambê-ŋga, naŋ oc atac ɲayham hôc gêtêc.” ¹⁶ Ma Yisu ô yom ma sôm, “ɲgac daŋ kêmasaŋ mwasiŋ atu daŋ, ma kêŋ aheŋ lau daêsam. ¹⁷ Têt mwasiŋ dau ɲabêc iŋ kêkiŋ ɲgac akiŋ daŋ bu sôm têt lau naŋ iŋ kêgalêm ɲac sa bu, ‘Ameŋ, bu aô kamasan gêt hon su.’ ¹⁸ Tigeŋ ɲac hon sêtêc bu sêmeŋ, dec sêmasaŋ yom têt iŋ. ɲgac daŋ sôm, ‘Aô waloc dom, bu aô gamlhi nom daŋ su, ma kwahic dec aô bu wasa wandi walic. Aô wateŋ am bu hu aô siŋ.’ ¹⁹ Ma daŋ sôm, ‘Aô waloc dom, bu aô gamlhi makao amanlu, ma kwahic dec aô bu wasa wandi ma waŋsahê ɲac tu sêkôm gwelen-ŋga. Wateŋ am

bu hu aö siñ.’ ²⁰ Ma dan tiyham sôm, ‘Kwahic dec aö gam awhê sa, bocdinañ gitôm dom bu waloc.’ ²¹ Bocdinañ ngac akind dau mbu gi ma gic min yom dinañ têt in ndê ndau. Ma yom dau kôm ndau tac ndê, dec in kêkin ndê ngac akind tiyham ma sôm, ‘Ngahô sôc malac atu ndi, ma kôc lau ñalôm sawa ti lau bôlin ma lau tapec sa sêmen bu sênen aö nen mwasiñ.’ ²² Ma ngac akind kôm bocdinañ, goc mbu men ma sôm, ‘Anen ndau, aö gakôm gitôm am sôm, ma ñasawa yêc dôn yêc.’ ²³ Dec ndau sôm têt in, ‘Sa sen ma gamen ñamakê-nga ndi, ma kac lau bu sêsôc sêmen. Aö tac whin bu anen andu menhu. ²⁴ Yomandô aö wasôm têt mac, bu lau nan aö gakên ahên têt ñamata-nga, nan si dan oc nen anen mwasiñ dom.’ ”

Lên tan̄kuc Yisu-nga

²⁵ Lau daêsam sêñsêlên sêwhin Yisu, ma in kac dau kwi ma sôm têt ñac, ²⁶ “Asa nan têt aö men ma bu êñkuc aö, nan atac whin aö hôc gêlêc gên hon ndic ñawaê. In bu atac whin damba me dinda, me in nawhê ma balêkoc, me asidôwai ti lhuwêi, me in dau ndê lên mbo-nga hôc gêlêc in ndê atac whin aö, dec oc tôm dom bu in ti anen dan ma êñkuc aö. ²⁷ Asa nan bu êñkuc aö, magoc tec bu hôc ndê a gicso dau, nan gitôm dom bu êñkuc aö.

²⁸ “Mac nem dan bu kwê andu atu dan, nan gên ñamata-nga in oc ndôc sic ma kôc gauc pi in ndê mone ti gên bu oc nditôm bu kwê andu dau sa, me mba. ²⁹ In bu kên alhō sip nom ndi, magoc ndic dabin andu dom, dec lau nan sêlic, nan oc sêsu in susu, ³⁰ ma sêsôm, ‘Ngac dindê gic hu kwê andu, magoc gitôm dom bu ndic dabin.’

³¹ “Ma kin dan bu sa ndi bu ndic sin tēn kin dan, dec gēn namata-nga in oc ndōc sic ma kōc gauc pi in ndē lau sin-nga 10,000, bu oc sētōm bu sēhōc gēlēc kin dinaŋ ndē lau sin-nga 20,000, me mba. ³² In bu lic bu ŋac sētōm dom, dec in oc ēnkin lau wamba-nga sētēn kin dinaŋ tēn ndoc in mbo ahē, bu sēsōm yom wamba-nga.

³³ “Bocdinaŋ akōc gauc ŋapep muŋ su, goc amen aŋkuc aō. Asa naŋ tec bu hu in ndē gēn hoŋ sin tu aō-nga, naŋ oc nditōm dom bu ti aō neŋ dan.

³⁴ “Gwēc so in gēn ŋayham, tigen namakic bu niŋga, oc dakōm namakic sa tiyham ŋalēn nde? ³⁵ Gwēc so dau tisac su, ma boc-dinaŋ tambaliŋ sin niŋga. Mac danamsuŋ bu yēc, naŋ aŋgō aneŋ yom.”

15

Yom gōliŋ pi domba dan naŋ giŋga (Mat 18:12-14)

¹ Lau sēkōc takis-nga ma lau ŋatō naŋ lau Palēsai sēsam ŋac bu lau sac, naŋ daēsam sētēn Yisu si bu sēngō in ndē yom. ² Ma lau Palēsai ti lau naŋ sēndōhōn yomsu, naŋ sētucdiŋ Yisu ma sēsōm, “Ŋac dau kōc lau sac sa, ma gēn gēn whiŋ ŋac.” ³ Dec Yisu sōm yom gōliŋ dan tēn ŋac bocdec bu, ⁴ “Mac nem ŋac dan bu yob domba 100, ma in ndē domba dan bu niŋga, dec in oc kōm sake? In oc hu 99 sin sēmbō gameŋ gapon, ma ēnjalē domba naŋ giŋga su e in tap sa. ⁵ Ma tēn ndoc in tap sa, naŋ in oc hu sac bakēyac ti atac ŋayham atu. ⁶ Ma in oc mbu tēn ndē andu ndi, ma ēnjalēm in ndē lau meŋpaŋ in-nga ti ndē silip, ma sōm tēn ŋac, ‘Mac atac ŋayham awhiŋ aō, bu aō gatap aneŋ domba

naŋ ginja su, naŋ sa.’ ⁷ Aö wasôm têt mac, bu ñalên tigen dinan Anötö ti aŋela undambê-nga oc atac ñayham atu tu ñamalac sac dan naŋ gêm ndê ñalôm kwi, hôc gêlêc atac ñayham tu lau gitên ⁹⁹ naŋ si yom me giso tu sênem dau kwi pi-nga mbasi.”

Yom gôlin pi mone naŋ ginja

⁸ Ma Yisu sôm, “Ma akôc gauc pi awhê dan, naŋ ndê mone silba amanlu sêndôc. Mone dan bu ñinga, dec in oc tun lam asê ma sê andu ña-basac sa, goc êñsalê ñapep e in tap mone dau sa. ⁹ Têt ndoc in tap sa su, naŋ in oc êñgalêm in ndê silip ti lau menpan in-nga sêmen sêpitigen ma sôm, ‘Mac atac ñayham awhin aö, bu aö gatap mone naŋ ginja su, naŋ sa.’ ¹⁰ Aö wasôm têt mac bu ñalên tigen, Anötö ti aŋela undambê-nga oc atac ñayham atu, têt ndoc ñamalac kôm sac-nga dan gêm ndê ñalôm kwi.”

Yom gôlin pi balê naŋ ginja

¹¹ Ma Yisu gic têt yom ma sôm, “Ngac dan mbo ma in ndê atungac lu. ¹² Ma balê saun sôm têt damba, ‘Daman, wapa lêñsêm naŋ gic aö ñawaê, naŋ kên têt aö.’ Goc damba whê ndê wapa ti gêt hon kôc tu inlu-nga, ma kên têt balê saun tôm in ndac. ¹³ Ñasawa saun ma balê saun dau gic in ndê gêt hon sa, ma kôlhô têt gamen baliŋ dan gi. Ma yêc dindê in kôm gêt hon tôm in ndê atac whin, ma kêyaiŋ ndê awa ti gêt hon. ¹⁴ Têt ndoc in ndê mone hon pacndê, naŋ tôbôm atu gêm gamen dinan ahuc ma in pônnda dau. ¹⁵ Goc in têt ngac atu dan yêc gamen dinan gi, ma kêsalê gwelen. Ma ngac dau kên in gôlôm in ndê bôc. ¹⁶ Gêt yô in ñandô, tigen lau sêkên gêt dan têt in tu nen-nga

dom, ma boc-dinaŋ iŋ gauc gêm bu neŋ gêŋ naŋ bôc seŋ. ¹⁷ Tiŋambu iŋ ndê gauc sa, ma iŋ sôm têt dau, ‘Damaŋ ndê lau akiŋ sêpônda gêŋ danaŋ-ŋga dom. Tigeŋ gêŋ yô aô ndu tôm bu wambac ndu-ŋga. ¹⁸ Aô walhô wambu watêŋ damaŋ wandi, ma wasôm, “Damaŋ, aô gakôm mêtê sac têt Anötö ma têt am. ¹⁹ Aô ŋgac sac, dec gitôm dom bu am sam aô bu am atômŋgac tiyham. Lic aô gitôm am nem ŋgac akiŋ daŋ.” ²⁰ Goc iŋ tisa ma mbu têt damba gi.

“Iŋ kêsêlêŋ mbo seŋ, ma damba gêlic iŋ yêc ahê ma tawalô iŋ ŋandô, dec kêti têt iŋ gi, gôlô iŋ dôn ma ŋgutô iŋ. ²¹ Magoc atuŋgac sôm têt iŋ, ‘Damaŋ, aô gakôm mêtê sac têt Anötö ma têt am. Aô ŋgac sac, dec gitôm dom bu am sam aô bu am atômŋgac tiyham.’ ²² Tigeŋ damba sôm têt iŋ ndê lau akiŋ, ‘Ŋagahô, akôc ŋakwê ŋayham ti atapa bu iŋ sôc, ma akêŋ gôlôn amanatu-ŋga sôc iŋ amba-atu. ²³ Ma akôc makao ŋatu tôp ŋayham daŋ, ma andic ndu. Yac oc dandê mwasiŋ atu ti atac ŋayham, ²⁴ bu yac gauc gêm bu aneŋ atuŋgac dindêc mbac ndu su, magoc kwahic dec dalic bu iŋ mbo tali. Iŋ giŋga su, ma datap iŋ sa tiyham.’ Ma ŋac hoŋ atac ŋayham.

²⁵ “Têt ndoc dinaŋ balê dau dôwa kôm gwelen mbo ôm, ma têt ndoc iŋ mbu meŋ suŋ sa andu, naŋ iŋ ŋgô lau sêtê wê ti sêkôm atac ŋayham atu. ²⁶ Goc iŋ mbwêc ŋgac akiŋ daŋ meŋ ma ndac iŋ bu, ‘Lau lê sêkôm ŋanta ti atac ŋayham tu sake-ŋga?’ ²⁷ Ma iŋ sôm, ‘Am asim meŋ su ma iŋ mbo ŋayham, ma bocdinaŋ dec damam gic makao tôp ŋayham daŋ ndu, ma ndê mwasiŋ atu.’ ²⁸ Yom dau kôm dôwa tac ŋandê atu, ma iŋ tec bu sôc balan ŋalôm

ndi. Goc damba sa gi ma kêmwanen in bu sôc ndi.
²⁹ Tigen in sôm tên damba, ‘Yala nen su aô gam
 akin ti danan wambu am. Tigen am kên nanin
 natu me gên saun dan tên aô bu wandê mwasin
 tu anen silip-nga dom. ³⁰ Kwahic dec am nem
 atômngac dinan, nan kêyain am nem awa ti wapa
 whin lauwhê sen-nga, nan mbu men ma am gic
 makao tu in-nga.’ ³¹ Magoc damba sôm, ‘Anen
 balê, am mbo whin aô nanan, ma anen gên hon ti
 am nem. ³² Tigen am asim dindec nan yac gauc
 gêm bu in mbac ndu su, nan mbo tali. In ginga su,
 ma datap in sa tiyham. Bocdinan in lên solop bu
 yac atac nayham atu ma dandê mwasin tu in-nga.’ ”

16

Yom gôlin pi ngac yob wapa-nga

¹ Ma Yisu sôm yom gôlin dan tên ndê ngacsênomi
 bocdec bu, “Ngac ti lêlôm dan mbo, ma lau sic min
 tên in bu ngac nan yob in ndê gên, nan kêyain in
 ndê wapa daêsam. ² Dec in ta ngac dau men, ma
 sôm tên in, ‘Yom bocke dec gangô pi am lec. Kwahic
 dec am sa ndi ma sê gên hon sa ma êmasan bapia
 wapa-nga bu kên tên aô. Bu aô oc watin am su yêc
 gwelen yob anen wapa-nga.’ ³ Dec ngac yob wapa-
 nga sôm tên dau, ‘Aô wakôm bocke? Aô nen natau
 oc soc aô su yêc anen gwelen. Anen licwalô gitôm
 dom bu wakôm gwelen ôm-nga, ma aô mayan bu
 waten gên. ⁴ Aô kayalê gên nan bu wakôm-nga, ma
 tên ndoc natau tin aô su yêc anen gwelen, dec lau
 oc sêkôc aô sa ma sênem yaom aô yêc nac si andu.’
⁵ Bocdinan in mbwêc lau nan si tôp yêc in ndê
 natau, nan tigen-tigen sêtên in sêmen. Goc in ndac

ngac ñamata-nga bocdec bu, ‘Am nem tôp bocke yêc aô ñeñ ñadau?’ ⁶ Ma ngac dau sôm, ‘Aneñ tôp gitôm olib ñakwi sip lôn* 100.’ Goc ngac yob wapa-nga sôm tênh in, ‘Am nem bapia tôp-nga kelec. Kôc sa, ndôc sic ñagahô, ma to bu am nem tôp gitôm olib ñakwi sip lôn 50.’ ⁷ Goc in sôm tênh ngac tilu-nga, ‘Am nem tôp bocke yêc?’ Ma ngac dau sôm tênh in, ‘Aneñ tôp gitôm bolom wit sip dalu atu-tu 100.’ Goc ngac yob wapa-nga sôm, ‘Kôc nem bapia tôp-nga, ma to bu am nem tôp gitôm dalu 80.’

⁸ “Goc ñadau kêpiñ ngac yob wapa-nga sac dinan, bu in kôm gêñ ti gauc. Lau sambuc sêkôc awa nom-nga ma sêhê silip ñac si lau. Nalên dinan ñac sêkôm gêñ ti gauc sêhêc gêlêc Anötô ndê lau. ⁹ Awa nom dindec-nga hê lau daêsam si gauc tu sêkôm mêtê sac-nga. Magoc aô wasôm tênh mac bu akôc nem awa nom-nga ma anem lau sa, ma ñalên dinan ahê silip tênh daôm. Tiñambu awa dau oc ñiñga, magoc ñac oc sêkôc mac sa ti atac ñayham tênh ndoc mac andôc undambê.”

¹⁰ Ma Yisu gic têku yom ma sôm, “Asa nañ yob gêñ saun ñapep, nañ oc yob gêñ atu ñapep bocdinan. Ma asa nañ yob gêñ saun ñapep dom, nañ oc yob gêñ atu ñapep dom. ¹¹ Bocdinan mac bu ayob awa nom-nga ñapep dom, dec Anötô oc kêñ awa ñandô tênh mac tu ayob-nga dom! ¹² Ma mac bu ayob lau ñatô si gêñ ñapep dom, dec Anötô oc kêñ gêñ dan ti mac nem gêñ dom!”

¹³ “Ñamalac dan gitôm dom bu nem akind ñadau lu, bu in oc tec dan, ma atac whiñ dan, me oc sap dan dôn ma pu dan. Ma mac boc-dinan, gitôm dom bu

* **16:6:** Lôn dinan lôn atu - tigen-tigen gitôm 35-40 lita.

atoc Anötö ma awa nom-nga lu-lu sa ti mac nem ɲadau.”

¹⁴ Yisu sôm yom dinaɲ, ma lau Palêσαι ɲatô naɲ sêɲgô, naɲ sem tô iɲ. ɲahu bu ɲac lau atac whiɲ mone-nga. ¹⁵ Tigeɲ Yisu sôm têɲ ɲac, “Yêc ɲamalac aɲgô-nga, mac lau dinaɲ atoc daôm sa bu mac lau gitêɲ, magoc Anötö kêyalê mac nem ɲalôm su. Gêɲ naɲ mac lau nom-nga atoc sa bu gêɲ ɲayham kêlêc, naɲ Anötö gêlic gitôm gêɲ sac sambuc.”

Yisu puc Anötö ndê yomsu dôɲ

¹⁶ Ma Yisu sôm, “Anötö kêɲ Moses ndê yomsu ti propet si yom bu lau sêɲkuc e Jon, ɲgac Kêku Lau-nga hôc asê. Têɲ Jon ndê têm ma meɲ, naɲ lau sêhoc ɲawaê asê pi Anötö ndê gôliɲ. Ma lau daêsam sêkôm mwasac bu sêsoc Anötö ndê gôliɲ ɲapu. ¹⁷ Gitôm bu undambê ti nom oc niɲga, tigeɲ gitôm dom bu Moses ndê yomsu ɲalhô atêc daɲ niɲga. ¹⁸ ɲgac daɲ bu hu nawhê siɲ ma nem awhê wakuc, naɲ kôm mêtê mockaiɲ-nga yêc Anötö aɲgô-nga. Ma ɲgac naɲ gêm awhê naɲ hu ndê akweɲ siɲ, naɲ kôm mêtê mockaiɲ-nga bocdinaɲ.”

ɲgac ti lêlôm lu Lasarus

¹⁹ Ma Yisu sôm, “ɲgac ti lêlôm daɲ mbo, naɲ sôc ɲakwê ɲayham ma po dau sa ɲa gêɲ ɲayham-ɲayham tôm bêc hoɲ. ²⁰ Ma yêc iɲ ndê andu ɲamakê, ɲgac ɲalôm sawa daɲ ndöc, naɲ ndê ɲaê Lasarus. Gamboc daêsam sem iɲ ɲamlic ahuc, ²¹ ma giam sêmeɲ ma sêndambwê gamboc dau. Iɲ gêɲ yô iɲ, dec iɲ takwê bu neɲ gêɲ ɲapopoc naɲ peɲ akêɲ ɲgac ti lêlôm ndê tebo, magoc mba. ²² Têɲ bêc daɲ ɲgac ɲalôm sawa dinaɲ mbac ndu, ma aɲela sêkôc

in sa gi ndöc undambê whin Abraham. Ma ngac ti lêlôm mbac ndu bocdinañ, ma lau sêñsuhun in. ²³ In sip lambwam gi ma kêsahê ñandê atu, dec hóc tandô sa pi undambê, ma gêlic Abraham yêc ahê, ma Lasarus ndöc whin in. ²⁴ Goc in ta yom têt in ma sôm, ‘Abañ Abraham, tamwalô aô! Êmkin Lasarus bu kêñ amba-atu sip bu ndi, ma meñ kêñ pi aô êmbalañ. Ya dindêc kôm aô ñamlic ñandê atu.’ ²⁵ Tigen Abraham ô yom ma sôm, ‘Aneñ balê, gauc nem ndoc am mbo tamli, nañ am tap gêñ ñayham-ñayham daêsam sa, magoc Lasarus mbo sac ñapañ. Kwahic dec in mbo ñayham, ma am tap ñandê atu sa. ²⁶ Ma gêñ dan tiyham. Yêc hêclu ñalhu, Anötô kêñ ñasawa atu dan, dec oc tôm dom bu lau sêtên am sêloc. Ma gitôm dom bu mac nem dan lom têt yac meñ.’ ²⁷ Goc ngac dau sôm, ‘Bocdinañ aô wateñ am abañ, êmkin Lasarus têt aô damañ ndê andu ndi, ²⁸ ma kêñ puc aneñ asidôwai amañdan, bu sênem dau kwi tu bu sêmen ma sêhóc ñandê yêc gameñ dindêc dom.’ ²⁹ Magoc Abraham sôm, ‘Moses ma Propet si yom yêc bu kêñ puc ñac. Am nem asidôwai bu sêkên danga ñac si yom, dec oc tôm bu sênem dau kwi.’ ³⁰ Ma ngac dau sôm, ‘Mba, abañ Abraham! Lau batê si ngac dan bu mbu têt ñac ndi, dec ñac oc sêkac si ñalôm kwi.’ ³¹ Ma Abraham sôm, ‘Ñac bu sêkên whin yom nañ Moses ma lau propet sêto, nañ dom, dec ñac oc sêkên whin ngac nañ tisa akên lau batê-nga, nañ dom.’ ”

17

*Yisu ndê yom ñatô
(Mat 18:6-7; Mak 9:42-48)*

¹ Yisu sôm têtj inj ndê ngacsêjomi, “Gêj lêtôm-nga oc sêmenj sêhóc asê. Tigenj ñamalac asa nanj bu kôc gêj lêtôm-nga danj menj, nanj oc tap Anötö ndê matôc sa. Oyaê. ² Oc ñayham bu dasô hoc atu danj pi inj kachu, ma tambalinj inj sip gwêc ndi. Ma bocdinañ oc tôm dom bu inj êntôm anenj lau saun si danj bu kôm mêtê sac, ma tinjambu tap Anötö ndê matôc sa.

³ “Bocdinañ ayob daôm ñapep! Am nem asidôwa danj bu kôm sac, nanj goc hec yom inj. Ma inj bu nem dau kwi, goc suc inj ndê sac kwi. ⁴ Inj bu kôm sac têtj am tidim 7 têtj acsalô tigenj, magoc tinjambu kac ndê ñalôm kwi ma ndac am bu suc inj ndê sac kwi, nanj dec am suc inj ndê sac kwi manj.”

⁵ Ma lau aposel sêsôm têtj Pômdau, “Nem yac sa bu akêj whinj ñaŋga.” ⁶ Goc inj ô yom ma sôm, “Mac nem akêj whinj bu gêj saunj andô nditôm soc ñamatu saunj danj, dec oc tôm bu mac asôm têtj a atu dindec bu, ‘Puc daôm sa, ma sa ndi lhac gwêc ñagaponj,’ ma a dau oc danja wambu mac.”

⁷ Ma Yisu sôm, “Akôc gauc pi ngac akinj nanj gic nom me yob domba, ma mbu têtj ñadau ndê andu têtj telha. Inj ndê ñadau oc sôm têtj inj bu, ‘Mwenj ñagahô, ndôc sic ma nenj gêj,’ a? ⁸ Mba, inj oc sôm, ‘Sôc ñakwê sakinj-nga sa, ma êmasanj gêj bu wanenj, ma nem akinj aô e aô wanenj ti wanôm gêj pacndê. Goc tinjambu am daôm nenj ti nôm gêj.’ ⁹ Ma ñadau oc nem danje ngac akinj dau bu inj danja wambu inj ndê yom, a? Mba! ¹⁰ Ma mac bocdinañ, têtj ndoc mac akôm gêj honj nanj Anötö gic atu mac, nanj asôm, ‘Yac lau akinj ñambwa. Yac akôm gêj nanj gic yac ñawaê enj.’ ”

Yisu kôm lau 10 ti gêmbac leprasi nayham sa

¹¹ Yisu kêsêlêñ hêganôn malac Jerusalem gi, ma mbo señ nan yêc gameñ Samaria ti Galili-nga ñabatin. ¹² In hóc asê malac dan, ma tap laungac 10 ti gêmbac leprasi sa yêc malac dau ñamakê. Nac sêlhac ahê, ¹³ ma sêta in ña awha atu bocdec bu, “Ñadau Yisu, tamwalô yac!” ¹⁴ Yisu tahê ñac ma sôm, “Andi, ma atôc daôm têt lau dabunsga.” Ma têt ndoc ñac sêlhô s i, nan sêlic bu ñac si ñamlic ñawasi sa. ¹⁵ Nac si dan gêlic bu in ñayham sa su, dec gic hu kêpiñ Anötö ña awha atu, ma kac dau kwi ma mbu têt Yisu gi. ¹⁶ Ngac dau in ngac gameñ Samaria-nga, ma in hu dau sip nom yêc Yisu gahi-nga, ma gêm dançe in. ¹⁷ Ma Yisu sôm, “Bocke? Mac lau 10 hon ñamlic ñayham sa, me? Bocdinañ dec lau 9 sêmbo nde?” ¹⁸ Am ngac Israel-nga dom, magoc am ngac tigen dec mbu mwen ma kêpiñ Anötö.” ¹⁹ Ma Yisu sôm têt in, “Tisa, ma lhô ndi. Am nem kêñ whin kôm am ñayham sa.”

Anötö ndê gôlin ñapuc

²⁰ Têt béc dan lau Palêsai sêndac Yisu pi ndoc bocke Anötö ndê gôlin oc men sa tiawê yêc nom. Ma Yisu sôm, “Têt ndoc Anötö ndê gôlin men sa tiawê, nan oc tôm dom bu mac alic gêt dan tu kêñ puc mac-nga. ²¹ Ma oc tôm dom bu lau sêsôm, ‘Alic gêt dau kelec,’ me ‘Gêt dau kêlê.’ Mba! Anötö ndê gôlin men sa su, ma yêc mac ñalôm.”

Yisu ndê béc mbu men-nga

(Mat 24:37-44)

²² Ma in sôm têt in ndê ngac-sêñomi, “Têm oc men sa, nan mac tamkwê bu alic Ñamalac ndê Atu mbu

menj ma mbo whinj mac tiyham, magoc mac oc alic inj dom. ²³ Lau oc sênsau bu inj mbu menj su, ma sêsôm inj mbo gamen bocdê, me gamen bocdec. Magoc angô nac si yom dau dom, ma ankuc nac dom. ²⁴ Bu tênh ndoc Namalac ndê Atu mbu menj, nan inj oc hôc asê ngahô gitôm sickac hep tigen ma umbonj nasawa sambuc nawê sa. ²⁵ Tigen gêj namata-nga inj oc hôc nandê atu ma lau têm dindec-nga oc sêtec inj.

²⁶ “Têm nanj Namalac ndê Atu oc mbu menj, nan lau oc sêmbo tôm sêmbo tênh Noa ndê têm. ²⁷ Tênh ndoc dinanj lau senj gêj ti sênôm gêj, ma laungac ti lauwhê sem dau e Noa sôc wanj gi. Goc bu atu sunj ma senj nac honj su singa. ²⁸ Ma oc kainj tigen tôm Lot ndê têm, nan lau senj ti sênôm gêj, semlhi gêj ti sêkên gêj bu lau semlhi, sêsô gêj nawhê ma sêkwê andu. ²⁹ Magoc tênh béc Lot hu malac Sodom sinj, nan ya ti tsolpa penj sip akênj undambê ma senj lau Sodom-nga honj su. ³⁰ Ma lau oc sêmbo nalênj tigen dinanj tênh béc nanj Namalac ndê Atu mbu menj ma hoc dau asê. ³¹ Tênh béc dinanj, oc tôm dom bu lau nanj sêndôc andu nasactô, nanj sêsôc andu nalôm sêndi bu sêkôc gêj danj. Ma nalênj tigenj, oc tôm dom bu lau nanj sêmbo ôm, nanj sêkac dau kwi bu sêkôc si gêj danj. ³² Gauc nem gêj nanj hôc asê Lot ndê awhê! ³³ Asa nanj tac whinj bu sap gêj nom-nga dônj napanj tu mbo tali-nga, nanj oc ninga. Magoc asa nanj hu sinj tu ênkuc aô-nga, nanj oc ninga dom. ³⁴ Aô wasôm tênh mac, tênh béc nanj Namalac ndê Atu mbu menj, nanj namalac lu oc sêyêc andu danj, ma Anötö oc kôc injlu si danj, ma hu danj sinj. ³⁵⁻³⁶ Ma awhê lu oc sêndê gêj sêmbo, ma Anötö oc kôc danj, ma hu

danj sinj.” ³⁷ Yisu ndê ngacsêñomi sêngô yom dau su, goc sêndac inj, “Pômdau, gêñ dinanj oc hóc asê yêc nde?” Ma Yisu sôm, “Yac bu dalic macmponj sêngihi sêmbo, nanj tanyalê bu gêñ mbôp danj yêc.”

18

Yom gôlinj pi lêñ datenj mbec-nga

¹ Ma Yisu sôm yom gôlinj danj têtj inj ndê ngac-sêñomi, ma kêdôhônj ñac bu sêtenj mbec tôm bêc honj, ma takwê bu sêtap ñandô sa ma sêhu sinj dom.

² Inj sôm, “Ngac êmatôc yom-nga danj mbo malac atu danj. Inj tôte Anôtô dom, ma toc ñamalac danj sa dom. ³ Ma awhê sawa danj ndôc malac dinanj, ma inj têtj ngac êmatôc yom-nga dau gi ñapanj, ma sôm, ‘Ñamalac danj kêtj ñawapac têtj aô. Nem aô sa ma êmatôc alu mba yom.’ ⁴ Inj ndac tidim daêsam magoc ngac dau tec bu nem inj sa e tinjambu inj sôm têtj dau, ‘Aô gatôc Anôtô dom, ma gatoc ñamalac sa dom, ⁵ tigenj awhê sawa dindec ndac aô ñapanj, ma bocdinanj aô wanem inj sa ma wamatôc inj ndê yom. Aô bu wakôm dom, dec inj oc menj ñapanj e kôm aô lic kam sa.’ ”

⁶ Ma Pômdau sôm têtj ndê ngac-sêñomi, “Ngac êmatôc yom-nga dau inj ngac gitêtj dom, magoc inj sôm bu nem awhê sawa dinanj sa. ⁷ Mac lau nanj Anôtô kêyalinj mac sa ati inj ndê, nanj atenj mbec têtj inj acsalô ti ôbwêc, mac gauc gêm sake? Anôtô oc tec bu ngô mac nem mbec ma nem mac sa, a? ⁸ Mba! Aô wasôm têtj mac bu inj oc nem mac sa ñagahô. Tigenj, têtj ndoc Ñamalac ndê Atu mbu menj, nanj inj oc tap lau ñatô sa, nanj sêsap si sêkênj whinj inj-nga dôñ sêmbo, me mba?”

Yom gôlin pi Palêsai ma ngac kôc takis-nga dan

⁹ Yisu kêyalê bu lau natô nanj sêkên danja in, nanj sêtoc dau sa bu lau gitên ma sêpu lau natô. Bocdinañ in sôm yom gôlin danj bocdec bu. ¹⁰ “Ngac lu sêtên lôm dabun si, bu sêten mbec. Inlu si danj in Palêsai, ma ngac danj in ngac kôc takis-nga. ¹¹ Palêsai dau tisa kalhac, ma tenj mbec tu dau-nga bocdec bu, ‘Anötö, aö wanem danje am bu aö gatôm lau natô nanj lau sac, nanj dom. Aö gatôm lau kanj dom, me lau nanj sêkôm mêtê sac me mêtê mockainj-nga dom. Ma yomandô, aö gatôm ngac kôc takis-nga dindê dom. ¹² Yêc wake honj nalôm aö gahu gêñ danenj-nga sinj tidim lu tu gauc nem am-nga. Aö gawhê nenj awa ti wapa honj kôc gi tonj amanlu, ma gakênj tonj danj ti da tên am.’ ¹³ Palêsai tenj mbec bocdinañ, tigenj ngac kôc takis-nga kalhac ahê. Inj hôc tandô sa tênj undambê dom, magoc wec ti nalôm njawapac ma tenj mbec bocdec bu, ‘Anötö, tamwalô aö ngac sac dec.’ ” ¹⁴ Goc Yisu sôm, “Aö wasôm tênj mac bu Anötö gêlic ngac kôc takis-nga dinañ ti ngac gitên, ma Palêsai dinañ mba. Nahu bu asa nanj po dau ndê waê sa, nanj Anötö oc êngwinin in, ma asa nanj kêgwinin dau, nanj Anötö oc toc in sa.”

*Yisu gêm mbec balêkoc saun
(Mat 19:13-15; Mak 10:13-16)*

¹⁵ Tênj béc danj lau sêkôc si balêkoc saunj sêtên Yisu sêmenj, bu inj kênj amba sac nac. Inj ndê ngac-sênjomi sêlic e sêsôm dinda ti dambai. ¹⁶ Tigenj Yisu mbwêc nac sêmenj ma sôm, “Atec balêkoc dinañ sêtên aö sêmenj, ma alhac nac ahuc dom. Bu Anötö

ndê gôlin̄ gic lau nan̄ sêtom̄ balêkoc saun̄-saun̄ din-dec, nan̄ n̄awaê. ¹⁷ Aô wasôm yom n̄andô têng mac, bu asa nan̄ bu sôc Anötö ndê gôlin̄ n̄apu nditôm balêkoc saun̄ dan̄ dom, nan̄ oc nditôm dom bu sôc ndi.”

Ngac bata ti lêlôm

(Mat 19:16-22; Mak 10:17-22)

¹⁸ Ma ngac bata Israel-n̄ga dan̄ ndac Yisu, “Kêdôhôn̄waga n̄ayham, aô wakôm sake, dec tin̄ambu Anötö oc kôc aô sa wambo tan̄li yêc undambê?”

¹⁹ Ma Yisu sôm, “Tu sake-n̄ga am sam aô bu n̄ayham? Anötö tawasê in̄ n̄ayham. ²⁰ Am kêyalê Moses ndê yomsu, ‘Kôm gêng mockain̄-n̄ga dom. Ndic n̄amalac ndu dom. Nem kan̄ gêng dom. Sôm yom tasan̄ pi lau dom,’ ma ‘Toc damam lu dinam sa.’” ²¹ Ma ngac dau sôm, “Aô kakuc yomsu hon̄ dinan̄ têng ndoc aô gambo balê n̄apan̄ e kwahic dec.” ²² Yisu ngô yom dinan̄ ma sôm têng in̄, “Am pôn̄da gêng tigen̄. Kêng am nem wapa hon̄ têng lau sênemlhi, ma ndic sam n̄a-awa têng lau n̄alôm sawa. Ma bocdinan̄ am nem awa n̄andô oc yêc undambê. Ma tin̄ambu mwen̄ ma êmkuc aô.” ²³ Magoc ngac dau ngô Yisu ndê yom e n̄alôm n̄awapac, n̄ahu bu in̄ ngac ti wapa daêsam.

Puc pi awa ti wapa

(Mat 19:23-30; Mak 10:23-31)

²⁴ Yisu tahê in̄ ma sôm, “Lau ti lêlôm si awa ti wapa kalhac n̄ac ahuc e gitôm dom bu sêsôc Anötö ndê gôlin̄ n̄apu n̄agahô. ²⁵ Bôc atu dan̄ gitôm kamel, oc tôm bu sôc so n̄alasê n̄agahô hóc gêlêc ngac ti lêlôm dan̄ bu sôc Anötö ndê gôlin̄ n̄apu su.” ²⁶ Lau nan̄ sêngô yom dau sêsôm, “Bu bocdinan̄ dec asa oc tôm

bu tap Anötö ndê mwasiŋ nem lau si-ŋga sa? Oc ɲawapac atu!” ²⁷ Magoc Yisu ô yom ma sôm, “Gêŋ naŋ ɲamalac sêtôm dom bu sêkôm, naŋ Anötö gitôm bu kôm.”

²⁸ Ma Pita sôm têtŋ iŋ, “Yac oc bocke? Yac ahu mba andu ti gêŋ hoŋ siŋ tu aŋkuc am-ŋga.” ²⁹ Ma Yisu sôm têtŋ iŋ, “Aö wasôm yom ɲandô têtŋ mac bu asa naŋ bu hu andu, me awhê, me asidôwai, me damba lu dinda, me balêkoc siŋ tu êŋkuc aö-ŋga, ³⁰ naŋ Anötö oc kêŋ gêŋ kaiŋ dinaŋ daêsam têtŋ iŋ ô, têtŋ têtŋ iŋ mbo nom. Ma têtŋ têtŋ ɲambu-ŋga, Anötö oc kôc iŋ sa ma kêŋ iŋ ndöc tali ɲapaŋ yêc undambê.”

Yisu sôm tiyham bu iŋ oc mbac ndu

(Mat 20:17-19; Mak 10:32-34)

³¹ Yisu kôc ɲgacsêŋomi 12 sa sêsa si sêmbo dau-ŋga, ma sôm têtŋ ɲac bu, “Kwahic dec yac bu dapi Jerusalem dandi, ma gêŋ hoŋ naŋ lau propet sêto pi ɲamalac ndê Atu, naŋ oc ɲandô sa. ³² Lau oc sêkêŋ iŋ sip lau Rom-ŋga amba, ma ɲac oc sêsu iŋ susu, sêkôm iŋ ɲayom, sêhê gasôp pi iŋ, sêtap iŋ, ma sêndic iŋ ndu. ³³ Magoc iŋ oc tisa tiyham têtŋ bêt titö-ŋga.” ³⁴ Tigeŋ ɲac sêŋyalê yom dau ɲahu dom. ɲahu yêc siŋ dau têtŋ ɲac, ma ɲac si gauc sa pi Yisu ndê yom dau dom.

Yisu kôm ɲgac tapec tandô po asê

(Mat 20:29-34; Mak 10:46-52)

³⁵ Yisu ma lau naŋ sêŋkuc iŋ sêŋsêlêŋ e sêsuŋ sa malac Jeriko. Ma yêc seŋ ɲamakê ɲgac tapec dan ndöc ma teŋ gêŋ. ³⁶ ɲgac dau ɲgô bu lau daêsam sêŋsêlêŋ sêmbo seŋ, goc ndac gêŋ dau ɲahu. ³⁷ Ma lau sêsôm têtŋ iŋ bu Yisu Nasaret-ŋga kêsêlêŋ mbo

senj menj. ³⁸ Goc inj mbwêc, “Yisu, †Dawid ndê Atu, tamwalô aö!” ³⁹ Lau nanj sêñsêlêñ sêmunj Yisu sêhec yom ngac tapec dau, ma sêsôm têtj inj bu nem dôñ. Magoc inj mbwêc ti ñanga, “Dawid ndê Atu, tamwalô aö!” ⁴⁰ Yisu kwê dôñ kalhac, ma sôm têtj lau bu sêkôc ngac dau sêtêtj inj sêmenj. Ma têtj ndoc inj tigasuc Yisu, nanj Yisu ndac inj, ⁴¹ “Am tac whinj bu aö wakôm sake têtj am?” Ma inj sôm, “Pômdau, aö tac whinj bu tanôñ ñayham sa.” ⁴² Goc Yisu sôm têtj inj, “Tanôm ñayham sa! Am nem kêñ whinj kôm am ñayham sa.” ⁴³ Ma ñagahô enj inj tandô ñayham sa, ma inj kêkuc Yisu ma kêpiñ Anötö. Ma lau honj nanj sêlic gêtj dinanj, nanj sêmpinj Anötö bocdinanj.

19

Yisu lu Sakias

¹ Yisu sôc malac Jeriko gi, ma bu êñsêlêñ gacgen sa ndi. ² Ma ngac danj mbo, nanj sêsam inj ndê ñaê bu Sakias. Inj ngac bata kôc takis-nga, ma inj dau ndê mone daêsam. ³ Inj tac whinj bu lic Yisu pi ñandô, magoc inj gitôm dom, bu inj ngac apê, ma lau daêsam sêñgihi Yisu ahuc. ⁴ Tu dinanj-nga inj kêtj munj gi, ma pi a kinj danj, bu lic Yisu nanj kêsêlêñ mbo senj menj. ⁵ Têtj ndoc Yisu hôc asê a dinanj ñapu, nanj tatic ma sôm têtj inj, “Sakias, sip mwenj ñagahô! Acsalô dec aö wambo am nem andu wawhinj am.” ⁶ Goc ñagahô Sakias sip nom ma kôc Yisu sa ti atac ñayham, ma sêtêtj inj ndê andu si. ⁷ Magoc lau honj nanj sêlic gêtj dau sêtucdiñ ma sêsôm, “Yisu bu ndic ngac sac danj kêsi!”

⁸ Têtj ndoc sêmbô Sakias ndê andu, nanj ngac dau tisa ma sôm têtj Yisu, “Pômdau lic! Kwahic

dec aô wawhê anenɔ wapa honɔ kôc ndi tonɔ lu, ma wakêɔ tonɔ danɔ tɛnɔ lau nɔlôm sawa. Ma lau nanɔ aô kasau nɔc ma gakôc nɔc si mone, nanɔ aô waô mone dau tidim hale tɛnɔ nɔc.” ⁹ Dec Yisu sôm, “Acsalô lec Anôtô ndê mwasinɔ nem lau si-nɔga menɔ pi lau andu dindɛc-nɔga. Bu nɔgac dindɛc inɔ Abraham ndê apanɔgac danɔ whinɔ. ¹⁰ Nɔmalac ndê Atu menɔ bu ênɔsalê lau nanɔ sinɔga su, ma bu nem nɔc si.”

Yom gôlinɔ pi mone gol
(Mat 25:14-30)

¹¹ Lau nanɔ sêɔgô Yisu ndê yom dinanɔ, nanɔ sêlic bu inɔ sunɔ sa tɛnɔ Jerusalem, ma sêkêɔ bata bu tɛnɔ ndoc inɔ hôc asê, nanɔ Anôtô ndê gôlinɔ oc menɔ sa tiawê, ma Yisu oc ti lau Israel-nɔga si kinɔ. Bocdinanɔ Yisu gic hu sôm yom gôlinɔ danɔ tɛnɔ nɔc. ¹² Inɔ sôm, “Nɔgac ti waê atu danɔ kêmasanɔ dau bu tɛnɔ gamenɔ balinɔ danɔ ndi, bu yêc dindê kinɔ atu oc kêɔ nɔaclai tɛnɔ inɔ bu nem gôlinɔ lau yêc inɔ dau ndê gamenɔ. Ma tinɔambu inɔ oc mbu menɔ. ¹³ Boc-dinanɔ inɔ kêgalêm inɔ ndê lau akinɔ amanɔlu sa, ma kêɔ mone gol danɔ nanɔ sêsam bu ‘maina’ tɛnɔ nɔc tôm gi.* Ma inɔ sôm tɛnɔ nɔc, ‘Akôc mone dec sa, ma akôm gwelenɔ pi e nditôm aô wambu wamenɔ.’ ¹⁴ Magoc inɔ ndê lau sêtec inɔ, ma sêkêɔ lau ahenɔ-nɔga nɔatô sêɔkuc inɔ bu sêsôm tɛnɔ kinɔ atu bu, ‘Yac atec nɔgac dec bu nem gôlinɔ yac.’ ¹⁵ Magoc kinɔ atu nɔgô nɔc si yom dom ma kêɔ nɔaclai tɛnɔ nɔgac dau bu nem gôlinɔ lau, goc inɔ mbu tɛnɔ inɔ ndê gamenɔ gi. Inɔ hôc asê su, goc kêɔ yom bu inɔ ndê lau akinɔ nanɔ inɔ kêɔ mone tɛnɔ nɔc, nanɔ sêtɛnɔ

* **19:13:** Maina tigenɔ gitôm †denarii 100, nanɔ gitôm nɔaôli gwelenɔ bêc 100-nɔga.

inj sêndi. Inj bu lic ñac sêkôm gwelenj bocke pi mone dau.

¹⁶ “Ngac aking ñamata-nga menj ma sôm, ‘Anej ñadau, aô gakôm gwelenj pi am nem mone tigenj, ma gatap mone amanlu tiyham sa.’ ¹⁷ Ma ñadau sôm, ‘Anej ngac aking, am kôm ñayham! Am yob gêñ saunj dindec ñapep, ma kwahic dec aô wakênj am nem gôlinj malac amanlu.’

¹⁸ “Ma ngac tilu-nga menj ma sôm, ‘Ñadau, aô gakôm gwelenj pi am nem mone tigenj, ma gatap mone amanjanj tiyham sa.’ ¹⁹ Ma ñadau sôm têng inj, ‘Kwahic dec aô wakênj am nem gôlinj malac amanjanj.’

²⁰ “Ma lau aking dau si danj menj ma sôm, ‘Ñadau, am nem mone gol tigenj kelec. Aô kapanj si ñapep. ²¹ Aô gatôc am, bu am ngac lêlê-nga dom. Am kêñ batam bu kôc gêñ ñandô yêc lau nanj am kêñ gêñ têng ñac dom. Ma am gic gêñ ñandô sa yêc gameñ nanj am sô gêñ ñawhê dom.’ ²² Goc ñadau sôm têng inj, ‘Am ngac aking sac! Aô wamatôc am wanjuc yom nanj am daôm sôm. Am kêyalê bu aô ngac lêlê-nga dom, ma bu aô gakênj batanj bu wakôc gêñ yêc lau nanj aô gakênj gêñ têng ñac dom, ma bu wandic gêñ ñandô sa yêc gameñ nanj gasô gêñ dom. ²³ Tu sake-nga am kôm gwelenj pi anej mone dom? Oc tômbu am kêñ anej mone têng lau sêyob mone-nga bu sêyob e aô wambu wamenj, dec oc tômbu sêkênj mone ñagec sac mone dau ñahô ma aô wakôc honj sa.’

²⁴ “Ma inj sôm têng lau nanj sêlhac sêmpinj, ‘Akôc inj ndê mone tigenj dinanj su, ma akênj têng ngac aking nanj kôc mone amanlu.’ ²⁵ Magoc ñac sêsôm, ‘Ñadau, inj kôc mone amanlu su!’ ²⁶ Goc ñadau sôm,

‘Aö wasôm têtj mac bu asa nanj yob gêtj nanj aö gakêtj sip inj amba, nanj napep, nanj wakêtj gêtj njatô tiyham têtj inj whinj. Tigenj asa nanj yob ndê gêtj napep dom, nanj aö wakôc inj ndê gêtj honj su. ²⁷ Ma anjô! Anenj njacyo nanj sêtec bu aö wanem gôlinj njac, nanj akôc njac sêmenj, ma andic njac ndu yêc aö anjônj-nga.’ ”

Yisu hôc asê Jerusalem

(Mat 21:1-9; Mak 11:1-10; Jon 12:12-15)

²⁸ Yisu sôm yom dinanj su, ma kêsêlênj hêganônj Jerusalem gi, ma inj ndê sênjomi sênjuc inj. ²⁹ Inj kêsêlênj gi e kêpinj malac lu nanj sêsam bu Betpagi ma Betani, malac lu nanj sêyêc Lôc Olib. Ma inj kêkinj ndê njacsênjom lu ³⁰ ma sôm têtj injlu, “Asôc malac dindê andi, ma amlu oc atap donjki danj sa, nanj sêsô dônj kalhac. Inj donjki njatu wakuc, nanj njamalac danj ndöc njahô munj su dom. Anjapwêc su ma akôc sa amenj. ³¹ Ma lau bu sêndac amlu bu bocke ma amlu bu anjapwêc inj su, goc asôm têtj njac bu, ‘Pômdau tac whinj bu donjki dindêc nem inj sa.’ ”

³² Boc-dinanj njac lu dinanj sêsôc malac dau si, ma sêtap donjki dau sa tôm Yisu sôm. ³³ Sênjapwêc donjki sêmbo, ma njadaui sêndac injlu bu, “Amlu anjapwêc inj tu sake-nja?” ³⁴ Ma sêsôm, “Pômdau tac whinj bu donjki dindêc nem inj sa.”

³⁵ Injlu sêwê donjki dau sêtênj Yisu si, ma sêkênj njac si njakwê awê-nja sac donjki, ma sêkênj inj pi gi ndöc njahô. ³⁶ Yisu ndöc donjki ma kêsêlênj gi, ma lau sêhê si njakwê yêc senj. ³⁷ Inj kêsêlênj gi e hôc asê gamenj nanj senj sip akênj Lôc Olib, goc sênjomi tonj atu nanj sênjuc inj, nanj sêmbwêc ti atac njayham atu, ma sêmpinj Anötö pi gêtj dalô nanj sêlic. ³⁸ Sêsôm,

“Anötö nem mbec kin nan men gem Pômdau angô. Yom malô yêc undambê, ma Anötö ndê waê sa yêc lôlôc!”

³⁹ Palêsai natô sêmbo sêwhin lau daêsam dinañ, ma sêsôm têt Yisu, “Kêdôhônwaga, hec yom am nem sênomi, bu ñac si yom so.” ⁴⁰ Ma Yisu sôm têt ñac, “Añgô! Sênomi bu sênem dôn, goc hoc dindéc oc sêmbwêc asê!”

⁴¹ Yisu kêsêlên gi e hôc tandô sa pi malac atu Jerusalem, dec tañ pi malac dau. ⁴² In sôm, “Tôm ñasawa baliñ su e men têt acsalô lec aô tac whin bu mac lau Jerusalem-nga anyalê lêt nan oc tôm bu kêt mac ambo ti atac malô. Tigen mac nem ñalôm ñadandi ma kwahic dec lêt dau yêc sin dau têt mac.

⁴³ Têm oc men sa, nan nem ñacyo oc sênghihi mac ahuc ma sêngili tunbôm ma sêsôc nem malac sêloc.

⁴⁴ Ñac oc sêndic mac ti nem balêkoc hon ndu, m a sêseñ malac dindéc su e hoc dañ ndôc hoc dañ ñahô tiyham dom. Ñac oc sêkôm bocdinañ, ñahu bu Anötö têt mac men bu nem mac sa, magoc mac anyalê dom.”

Yisu soc lau su yêc lôm dabun

(Mat 21:12-17; Mak 11:15-17)

⁴⁵ Têt ndoc Yisu hôc asê Jerusalem, nan in kêsêlên gi e sôc lôm dabun ñabatêmdô gi. Ma in soc lau nan sêkên gêt bu lau sênemlhi, nan sêsa awê. ⁴⁶ In sôm têt ñac, “Sêto Anötö ndê yom yêc bocdec bu, ‘Aneñ andu gic waê bu lau sêteñ mbec sêmbo-nga,’ magoc mac akôm Anötö ndê andu ti lau kañ si gamen.”

⁴⁷ Tôm bêc hon in kêdôhôn lau mbo lôm dabun ñabatêmdô. Ma dabunsga atu-tu ti lau †Skraib

naŋ sêndôhôn yomsu, ma lau bata Israel-nga sêŋsalê lêŋ bu sêndic iŋ ndu. ⁴⁸ Magoc sêtap lêŋ dan sa dom, bu lau honŋ atac whiŋ bu sêŋgô iŋ ndê yom, ma sêsap iŋ dônŋ naŋaŋ.

20

*Gêndac pi Yisu ndê ŋaclair ŋahu
(Mat 21:23-27; Mak 11:27-33)*

¹ Têŋ têm dinanŋ Yisu kêdôhônŋ lau, ma gêm mêtê pi ŋawaê ŋayham mbo lôm dabuŋ. Ma dabuŋsiga atu-tu ti lau Skraib ma lau bata Israel-nga sêtêŋ iŋ si, ² ma sêsôm, “Sôm têtŋ yac. Am kôc ŋaclair yêc nde, bu kôm gêtŋ honŋ naŋ am kôm? Asa kêŋ têtŋ am?”

³ Ma iŋ sôm, “Gêtŋ ŋamata-nga aô bu wakêtŋ gêndac dan têtŋ mac. Asôm têtŋ aô, ⁴ asa kêŋ ŋaclair têtŋ Jon dec iŋ kêku lau? Anötô kêŋ ŋaclair têtŋ iŋ, me mba?”

⁵ Ŋac sem yomgalôm têtŋ dau pi Yisu ndê gêndac ma sêsôm, “Yac bu dasôm bu, ‘Anötô kêŋ ŋaclair têtŋ Jon,’ dec iŋ oc ndac yac, ‘Tu sake-nga mac akêtŋ whiŋ Jon dom?’ ⁶ Magoc yac bu dasôm bu Jon kêku lau kêkuc ŋamalac nom-nga si gauc ŋambwa, dec lau honŋ oc sêtuc yac ŋa hoc dambac ndu, bu ŋac sêlic Jon bu Anötô ndê propet dan.” ⁷ Bocdinaŋ sêsôm têtŋ Yisu bu sêŋyalê Jon ndê ŋaclair ŋahu dom. ⁸ Ma Yisu sôm têtŋ ŋac, “Ma bocdinaŋ aô wasôm anenŋ ŋaclair ŋahu asê têtŋ mac dom.”

*Yom gôliŋ pi lau sêyob ôm wain-nga
(Mat 21:33-46; Mak 12:1-12)*

⁹ Ma Yisu sôm yom gôliŋ dan têtŋ lau dau bocdec bu, “Ŋgac dan sô ôm wain-nga dan, ma kêŋ têtŋ lau ŋatô bu sêyob. Goc iŋ têtŋ gameŋ dan gi ma mbo

ņasawa baliņ. ¹⁰ Têņ ndoc sêhoņ wain nandô sa-
 nga, iņ kêkiņ ngac akiņ dan têt lau naņ sêyob iņ
 ndê ôm, naņ gi, bu sêkêņ wain nandô natô têt iņ.
 Tigen naci sic iņ, ma sêkêņ iņ kôlhô amba sawa gi.
¹¹ Goc nădau kêkiņ ngac akiņ dan tiyham, magoc
 naci sic iņ ma sêkôm mêtê sac têt iņ, ma sêkêņ iņ
 kôlhô amba sawa gi. ¹² Ma iņ kêkiņ ngac titô-nga
 têt naci gi, magoc naci sic iņ basô, ma sêmasuc iņ sa
 awê gi. ¹³ Goc ôm wain-nga nădau sôm, ‘Aô wakôm
 sake? Aô wanķiņ aneņ balê, naņ aô atac whiņ iņ
 ndu andô. Mboe naci oc sêtoc iņ sa.’ ¹⁴ Tigen têt
 têt lau sêyob ôm-nga sêlic nădau ndê atu kêsêlêņ
 meņ, naņ sêsôm têt dandi, ‘Nădau ndê atungac dê
 oc wêkaiņ ôm dindec. Dandic iņ ndu ma dakôc ôm
 dindec su ti yac neņ.’ ¹⁵ Ma sêmasuc iņ yêc ôm wain-
 nga, ma sic iņ ndu.”

Ma Yisu ndac, “Mac gauc gêm bu ôm nădau oc
 kôm sake têt naci? ¹⁶ Iņ oc meņ ma ndic lau sêyob
 ôm-nga ndu, ma kêņ ndê ôm têt lau natô sêyob.”
 Lau naņ sêngô yom dinaņ sêsôm, “Mba! Bocdinaņ
 dom!” ¹⁷ Magoc Yisu tahê naci ma sôm, “Gauc
 nem yom naņ sêto yêc bocdec bu, ‘*Hoc naņ lau
 sêkwê andu-nga sêtec, naņ kwahic ti hoc namata-nga
 yêc andu dau.*’ Mac anyalê yom dau nahu, me mba?”
¹⁸ Lau hoņ naņ sêtiņ gahi pi hoc dinaņ e sêpeņ, naņ
 oc sêniņa, ma hoc dau bu peņ pi namalac dan, dec
 oc sec iņ popoc.”

¹⁹ Lau Skraib ti dabuņsiga atu-tu sênyalê bu Yisu
 ndê yom gôliņ dinaņ hêganôņ naci, dec naci atac
 whiņ bu sêkôc iņ dôt năgahô eņ. Magoc naci sêtoc
 lau naņ sêmbo sêwhiņ iņ, dec sêkôm dom.

Lau bu sêtim Yisu pi yom takis-nga
(Mat 22:15-22; Mak 12:13-17)

²⁰ Ma lau bata Israel-nga dinan tatin Yisu napep, ma sêkên lau natô bu sêtip in. Lau sêtip Yisu-nga dinan sênsau bu nac tac whin bu sêngô in ndê yom. Tigen sêkên danğa bu mboe sêngô in sôm yom so dan, dec nac oc sêkên in sip gôlinwaga Rom-nga ndê amba, bu êmatôc in. ²¹ Ma nac sêsôm têt in bu, “Kêdôhônwaga, yac anyalê bu am sôm yom ma kêdôhôn lau nalên gitên. Am toc lau hon sa nalên tigen, ma kêdôhôn Anötö ndê lêt têt lau kêkuc yom nandô. ²² Kwahic dec yac bu andac am bu in solop bu yac dakên takis têt Sisa, me mba?”

²³ Yisu kêyalê bu nac gauc gêm bu sêtim in, dec sôm têt nac, ²⁴ “Atôc mone silba dan têt aö.” Ma in ndac, “Asa ndê nagatu ti naê yêc mone dindec?” ²⁵ Ma nac sêsôm, “Sisa ndê.” Goc Yisu sôm têt nac, “Bocdinan atoc Sisa sa na gêt nan gic in nawae, ma atoc Anötö sa na gêt nan gic in nawae.”

²⁶ Nalên dinan nac sênsahê bu sêtim in bu sôm yom so dan yêc lau hon angô-nga, magoc sêtôm dom. Sêhêdaê tu in ndê yom ti gauc-nga, ma nac si yom mba bu sêsôm ô.

Lau Sadiusi bu sêtim Yisu pi yom datisa akên lau batê-nga
(Mat 22:23-33; Mak 12:18-27)

²⁷ Têt dinan lau †Sadiusi natô sêtên Yisu si. Nac lau Israel-nga si ton dan, nan sêkên whin bu lau batê oc sêtisa tiyham dom. Ma nac sêkên gêndac dan têt Yisu bocdec bu, ²⁸ “Kêdôhônwaga, Moses to yac nen yomsu dan bocdec bu. Ngac dan bu ndê dôwa nem awhê sa ma bu mbac ndu ma

balêkoc mbasi, nanŋ ngac dau oc nem dôwa ndê awhê sawa, ma kwê balêkoc asê tu dôwa-ŋga. ²⁹Têŋ tēm danŋ, asidôwai 7 sêmbo. Ngac ŋamata-ŋga gêm awhê sa, magoc inŋ mbac ndu ma inŋ ndê balêkoc mba. ³⁰⁻³¹Ma ngac tilu-ŋga gêm awhê sawa dau, tigenŋ mbac ndu ma balêkoc mba. Nalêŋ tigenŋ ngac titô-ŋga e tēŋ ngac ti-7-ŋga honŋ sem awhê sawa dau magoc sêmbac ndu ma balêkoc mba. ³²Ma tiŋambu awhê dau mbac ndu. ³³Kwahic dec yac bu andac am bocdec bu. Lau batê bu sêtisa tôm lau ŋatô sêsôm, dec awhê dau oc ti asa ndê awhê? Bu asidôwai 7 dinanŋ honŋ sem inŋ su tēŋ ndoc sêmbo tali.”

³⁴Ma Yisu ô yom ma sôm tēŋ ŋac, “Lau tēm dindec-ŋga sem dau, ³⁵tigenŋ tēŋ tēm ŋambu-ŋga, lau nanŋ Anötö oc lic bu lau gitēŋ ma uŋ ŋac sa bu sêndöc tali yêc undambê, nanŋ oc sênem dau dom. ³⁶Ma oc tôm dom bu ŋac sêmbac ndu tiyham, bu ŋac oc sêmbo sêtôm aŋela. Lau nanŋ Anötö uŋ sa sêndöc undambê, nanŋ oc sêti inŋ ndê balêkoc. ³⁷Ma Moses dau tôte asê bu lau batê oc sêtisa. Gauc nem yom nanŋ inŋ to pi ndoc inŋ gêlic ya golom sa a danŋ. Tēŋ ndoc dinanŋ inŋ sam Pômdau bu Abraham ndê Anötö, Aisak ndê Anötö, ma Jakob ndê Anötö. ³⁸Lau batê bu sêtisa dom, dec tu sake-ŋga Anötö sam dau bu lau tö dinanŋ si Anötö? Anötö inŋ lau batê si Anötö dom, inŋ lau tali si Anötö, bu lau honŋ si ŋahu sêmbo tali-ŋga yêc Anötö.”

³⁹Lau †Skraib ŋatô sêŋgô Yisu ndê yom dau ma sêsôm, “Kêdôhônŋ-waga, am nem yom ŋayham!” ⁴⁰Ma tiŋambu lau sêtöc dau bu sêkêŋ gêndac tēŋ Yisu tiyham.

*Yisu kêsahê lau si gauc pi Mesaya
(Mat 22:41-46; Mak 12:35-37)*

⁴¹ Ma Yisu sôm têt̃ n̄ac, “Bocke ma lau sêsôm bu Mesaya in̄ Dawid ndê Atu? ⁴² Dawid dau to yom yêc Buku Wê-n̄ga bocdec bu, ‘Anötö sôm têt̃ aneñ Pômdau, “Am ndöc aö aman̄ andô-n̄ga, ⁴³ e nditôm aö wakêt̃ nem n̄acyo sêsôc am gahim n̄apu.”’ ⁴⁴ Bocdinañ Dawid dau sam Mesaya bu Pômdau, ma bocke dec lau sêsôm bu Mesaya in̄ Dawid ndê Atu?”

*Yisu ndê puc pi lau Skraib si mêtê sac
(Mat 23:1-7; Mak 12:38-40)*

⁴⁵ Ma yêc lau hoñ dinañ si anğô-n̄ga, Yisu sôm têt̃ in̄ ndê n̄gacsên̄omi, ⁴⁶ “Ayob daôm n̄apep bu an̄kuc lau Skraib si gêbôm dom. N̄ac sêsôc n̄akwê baliñ ma sên̄sêlên̄ sêmbo malac lôm, bu n̄ac atac whiñ bu lau sêtoc n̄ac sa ma sêhê mwalêc n̄ac. N̄ac atac whiñ bu sêndöc mala n̄amata-n̄ga yêc lôm wê-n̄ga, ma lau tiwaê si mala têt̃ ndoc sêneñ mwasin̄-n̄ga. ⁴⁷ Yêc lau hoñ anğô-n̄ga, sêteñ mbec baliñ, magoc têt̃ ndoc lau sêlic n̄ac dom, nañ sên̄sau lauwhê sawa bu sên̄gaho n̄ac si andu su. Anötö oc êmatôc n̄ac ma kên̄ n̄agêyô sac andô têt̃ n̄ac.”

21

*Awhê tuc dañ kên̄ da dan̄ge
(Mak 12:41-44)*

¹ Yisu hôc tandô sa ma gêlic lau ti lêlôm sêkên̄ si da sip apa da-n̄ga nañ kalhac lôm dabuñ n̄amakê. ² Ma in̄ gêlic awhê tuc n̄alôm sawa dañ kên̄ awa saun̄ lu gitôm wan toea lu sip apa da-n̄ga. ³ Ma in̄ sôm, “Aö wasôm yomandô têt̃ mac, bu yêc Anötö

anġô-nga awhê tuc ñalôm sawa dindêc kêñ da hôc gêlêc lau hon si da su. ⁴ Nahu bu lau ti lêlôm sêkêñ si da, magoc ñac si awa daêsam gacgeñ yêc ñac-nga. Tigen awhê dindêc in awhê ñalôm sawa, ma in kêñ in ndê gêñ hon ti da.”

*Yisu sôm yom pi lôm dabuñ Jerusalem-nga
(Mat 24:1-2; Mak 13:1-2)*

⁵ Yisu ndê ñgacsêñomi ñatô sêsôm yom pi hoc ñayham-ñayham ma gôlôn ñayham nañ lau ñatô sêkêñ bu sêñgôlôn lôm dabuñ. Magoc Yisu sôm, ⁶ “Ndôc oc meñ sa, nañ gêñ ñayham hon nañ kwahic dec mac alic yêc gameñ dindêc, nañ oc ñinga. Nacyo oc sêseñ hoc hon su, ma hoc dan oc ndôc hoc dan ñahô tiyham dom.”

*Gêñ wapac têm ñambu-nga-nga
(Mat 24:3-14; 10:17-22; Mak 13:3-13)*

⁷ Ma Yisu ndê ñgacsêñomi sêndac in, “Kêdôhônwaga, ñawapac nañ am sôm yom pi, nañ oc hôc asê Jerusalem têt têm bocke? Ma gêt sake oc kêñ puc yac bu têm dau meñ kêpin?” ⁸ Ma Yisu sôm, “Ayob daôm ñapep bu lau sêñsau mac dom. Lau daêsam oc sêmeñ sênem aô anôn ma sêsôm, ‘Aô Mesaya dau,’ ma ‘Têm dau meñ kêpin.’ Ankuc ñac dom! ⁹ Ma têt têm mac anġô ñawaê bu lau sic sin têt dau, me lau sêli dau sa, nañ atôc daôm dom. Bu gêt hon dinañ gic waê bu meñ sa muñ, magoc têm ñambu-nga yêc dôn yêc.” ¹⁰ Ma Yisu gic têt yom ma sôm, “Kin nom-nga oc sêkêñ kisa dau, ma lau akêñ gameñ dan oc sêndic sin têt lau akêñ gameñ dan. ¹¹ Tiyhê oc nem atu, ma tôbôm ti gêmbac atu-tu oc sêhêc asê gameñ ñatô. Lau oc sêlic gêt

dalô atu-tu yêc umbon, ma gêñ atu-tu nan oc kôm ñac sêtöc dau atu.

¹² “Gêñ ñamata-nga, lau oc sêkên kisa mac, ma sêkôc mac dôñ. Tu mac akên whiñ aö-nga, dec lau oc sêmatôc mac yêc lôm wê-nga, ma sêkên mac andöc gapocwalô. Ma ñac oc sêkên mac alhac kin ti göliñwaga angô-nga bu sêmatôc mac. ¹³ Ndoc dinañ in mac nem têm bu asôm yom asê pi aö. ¹⁴ Ahêgo daôm tu yom asôm-nga dom, ¹⁵ bu aö dauñ oc wanem mac sa, ma wakên yom ti gauc têt mac. Ma mac nem ñacyo oc sêtôm dom bu sêo mac nem yom me sêseñ mac nem yom. ¹⁶ Dinami ti damami, ma asidôwai ma silip nan sêkên whiñ dom, nan oc sêhoc mac nem lau ñatô asê, ma sêndic ñatô ndu. ¹⁷ Tu aö-nga dec lau hon oc sêtec mac. ¹⁸ Tigen Anötö oc yob mac e nem kêclaun ñandô dan ñinga dom. ¹⁹ Magoc alhac ñanga ma ahu aö siñ dom, ma Anötö oc kôc mac sa andöc tamli ñapan yêc undambê.”

*Nawapac gameñ Judia-nga
(Mat 24:15-28; Mak 13:14-23)*

²⁰ “Têñ ndoc mac alic lau siñ-nga sêñgihi Jerusalem ahuc, nan dec anyalê bu ñasawa saun ma ñac oc sêseñ malac atu dau su. ²¹ Têñ ndoc dinañ, mac lau nan ambo gameñ Judia-nga nan alhê ñagahô api gameñ lôc-nga andi. Lau nan sêmbo Jerusalem, nan sêhu malac dau siñ, ma lau nan sêmbo gameñ ñamakê-nga nan sêsôc malac atu dau tiyham dom. ²² Yom hon nan lau propet sêhoc asê gwanan pi ñagêyô nan oc tap lau nom-nga sa, nan oc ñandô sa têt têm dinañ. ²³ Oyaê. Lauwhê nan daê ma lauwhê nan sêkên su têt balêkoc, nan

oc sêtap nawapac atu sa têt têt dinan. Nawapac atu oc hôc asê nom, ma lau Israel-nga oc sênsahê nacyo si atac nandê. ²⁴ Lau gamen apa-nga oc sêndic lau Israel-nga natô ndu na bien bali, ma sêngaho natô su ma sêwê nac sêtên lau apa si gamen sêndi sêtôm lau gapocwalô-nga. Anötö kêmatin têt bu lau gamen apa-nga sêngwini lau Jerusalem-nga, ma nac oc sêkôm e têt dau pacndê.”

*Namalac ndê Atu ndê bêt mbu men-nga
(Mat 24:29-36; Mak 13:24-31)*

²⁵ “Lau oc sêlic gêt dalô ac-nga ti ayô-nga ma tata-nga. Ma yêc nom, gwêc oc li dau sa atu, ma kôm lau si gauc ênsôn ma nalôm nawapac atu. ²⁶ Gêt ti naclai nan sêlhac umbon oc wiwic sa, ma tu dinan-nga lau oc sêtôc dau e nac tagôlô ma sêhêgo dau tu gêt bocke nan oc hôc asê nom-nga. ²⁷ Têt ndoc dinan lau oc sêlic Namalac ndê Atu mbu men ndôc dao nahô ti naclai ma nawasi atu. ²⁸ Têt ndoc gêt kain dinan bu men sa, nan atisa ma tamtac, bu mac nem ndoc bu atap Anötö ndê mwasi nem mac si-nga na-nandô sa, nan men kêpin.”

²⁹ Ma Yisu sôm yom gôlin dan bocdec, “Gauc nem a lan ma a natô. ³⁰ Têt ndoc mac alic nalaun wakuc bu lêt, nan mac anyalê bu ndoc ac-nga men kêpin. ³¹ Ma bocdinan têt ndoc mac alic gêt nan aô gasôm yom pi, nan hôc asê, dec anyalê bu ndoc men kêpin bu Anötö ndê gôlin men sa tiawê. ³² Yomandô! Lau têt dinan-nga oc sêmbac ndu dom e gêt hon dinan hôc asê. ³³ Undambê ti nom oc nînga, tigen anen yom dan oc nînga dom.”

Danem ali

³⁴⁻³⁵ Ma Yisu sôm, “Oc tôm dom bu ñamalac dan êñlêc bêc ñambu-nga dau. Bocdinañ dec amasan daôm ñapep ma anem ali. Ayob bu anôm gêñ êñiñ mac-nga ma anenñ gêñ ñawahô me apô sim daôm tu ñawapac nom-nga êñlêc dom, bu mboe gêñ dau oc hê nem gauc dôn têt têt bêc ñambu-nga dau men sa. Bu bêc dau oc hôc asê mac ñagahô, tôm bôc dan sip akô sep en. ³⁶ Anem ali ma atenñ mbec bu Anötô kênñ licwalô têt mac bu ñawapac honñ nan oc sêhôt asê, nan ku mac dulu dom, ma bu mac oc atôm bu alhac Ñamalac ndê Atu anğô-nga ti mayam pac.”

³⁷ Têt ñasawa dinañ Yisu kêdôhônñ lau mbo lôm dabuñ ñabatêmndô têt acsalô, ma in sa gi yêc Lôt Olib têt ôbwêc. ³⁸ Tôm bêc honñ lau daêsam sêtênñ lôm dabuñ si têt bêbêc ganduc, bu ñac atac whiñ bu sênğô Yisu ndê yom.

22

Judas sôm tidônñ bu hoc Yisu asê (Mat 26:14-16; Mak 14:10-11)

¹ Lau Israel si †Mwasinñ Bolom Yist Mba-nga nan lau sêsam bu Mwasinñ Pasowa-nga, nan menñ kêpinñ.

² Ma dabuñsiga atu-tu ti kêdôhônñwaga yomsu-nga sênşalê lêt bu sêndic Yisu ndu gelec, ñahu bu sêtôt lau. ³ Têt ndoc dinañ Sadan sip Judas ndê ñalôm. In ñac nan sêsam bu Iskeriot, ma in ñgacsênñomi 12 si dan. ⁴ In têt dabuñsiga atu-tu ti lau sin-nga nan sêyob lôm dabuñ, nan gi, ma ñac sem yomgalôm pi lêt tu Judas hoc Yisu asê têt ñac-nga. ⁵ Goc ñac atac ñayham, ma sêsôm tidônñ bu sênemlhi in ña mone.

⁶ Judas gôlôt ma kêsâlê ndoc bocke nan lau daêsam

oc sêmbô sêwhin Yisu dom, dec oc tòm bu in hoc Yisu asê.

*Yisu ndê ngacsênomi sêmasan Mwasiŋ Pasowa-nga
(Mat 26:17-19; Mak 14:12-16)*

⁷ Mwasiŋ Bolom Yist Mba-nga ñabêc nan lau Israel sic domba Pasowa-nga ndu, nan men hôc asê. ⁸ Ma Yisu kêkin Pita lu Jon ma sôm, “Amlu andi ma amasan Mwasiŋ Pasowa-nga bu danen.” ⁹ Ma sêndac in, “Am tac whin bu alu amasan Pasowa yêc nde?” ¹⁰ Ma Yisu sôm têt inlu, “Asôc Jerusalem andi, ma amlu oc atap ngac dan sa, nan hôc bu lôŋ dan. Ankcuc in atêt in ndê ñadau ndê andu andi, ¹¹ ma asôm têt andu ñadau, ‘Alu mba kêdôhônwaga ndac am pi ñalôm ñaclen-nga, bu in ti ndê ngacsênomi bu sênen Mwasiŋ Pasowa-nga yêc am nem andu.’ ¹² Ma in oc tôc ñalôm atu dan yêc andu dau ñahô-nga têt amlu. Tebo ti gêt hon tu yac danen Mwasiŋ Pasowa-nga yêc ñalôm dinan, goc amlu amasan gêt yêc ñalôm dinan.” ¹³ Goc inlu sêsôc Jerusalem si ma sêtap gêt hon sa gitôm Yisu sôm têt inlu, ma sêmasan mwasiŋ Pasowa-nga.

*Yisu gic hu Mwasiŋ Dabun
(Mat 26:26-29; Mak 14:22-26)*

¹⁴ Têt ôbwêc dinan, Yisu ndôc tebo whin lau aposel bu sênen Mwasiŋ Pasowa-nga. ¹⁵ Ma in sôm têt ñac, “Ñasawa sauŋ aô oc wahôc ñandê atu, magoc aô atac whin bu wanen Mwasiŋ Pasowa-nga dindêc wawhin mac mun. ¹⁶ Bu aô wasôm têt mac, aô wanen Mwasiŋ Pasowa-nga tiyham dom e Anötô ndê gôlin men sa tiawê, ma Pasowa dau ña-ñandô men sa.” ¹⁷ Goc in kôc laclhu wain-nga dan, gêm danje ma sôm, “Akôc ma akêt lom têt daôm.

¹⁸ Aô wasôm tênh mac bu aô oc wanôm wain tiyham dom e Anötö ndê gôlinj menj sa tiawê.” ¹⁹ Ma inj kôc bolom, gêm danje ma pô kôc, goc gic sam tênh njac ma sôm, “Aô nenj nandô dau dec, nanj gakênj tu mac-nja. Anenj gênj dindéc tu bu gauc nem aô-nja.” ²⁰ Njac senj gênj pacndê, goc njalênj tigerj inj kôc laclhu wain-nja danj ma sôm, “Laclhu dindéc ti dôhônj pwac wakuc anenj dac-nja, nanj wakêc sinj tu mac-nja. ²¹ Tigerj angô! Njac nanj bu hoc aô asê, nanj gênj gênj ndôc tebo whinj aô. ²² Bu gênj nanj oc hôc asê Njamalac ndê Atu, nanj kêkuc lênh nanj Anötö kêmasanj gwananj su, tigerj njac nanj hoc aô asê, nanj oc tap njagêyô atu sa. Oyaê!” ²³ Goc njac honj sêndac dandi pi njac si asa oc kôm gênj dau.

Asa ti njac njamata-nja

(Mat 20:25-28; 19:28; Mak 10:42-45)

²⁴ Ma tênh ndoc dinanj njac-sênjomi sêsenj dau bu njac si asa ti njac njamata-nja. ²⁵ Goc Yisu sôm tênh njac, “Lau sambuc si kinj sêtoc dau sa tênh njac si lau, ma lau nanj sem gôlinj lau, nanj sêsam dau bu lau njamata-nja. ²⁶ Magoc mac anjuc mêtê kainj dinanj dom. Mac nem asa inj njac tiwaê, nanj êngwininj dau ti njac waêmbe. Ma asa inj njac njamata-nja, nanj ti njac akinj njambwa. ²⁷ Mac gauc gêm bocke? Njac nanj ndôc tebo, ma njac nanj gêm akinj inj, nanj injlu si asa ti njac njamata-nja? Yêc njamalac angô-nja, njac nanj ndôc tebo inj njac njamata-nja. Tigerj aô gambo gawhinj mac gitôm njac akinj.

²⁸ “Ndoc bocke nanj njawapac me kisa tap aô sa su, nanj mac ahu aô sinj dom. ²⁹ Bocdinanj tinjambu aô wakênj mac anem gôlinj lau, gitôm Damanj kênj njac lai tu wanem gôlinj-nja sip aô daunj amanj. ³⁰ Ma

mac oc aneñ ti anôm gêñ awhiñ aô yêc gameñ undambê-nga, ma mac oc andöc pônñ atu ma amatôc Israel si lau ñaton 12.”

*Yisu sôm bu Pita oc sêc iñ ahuc
(Mat 26:31-35; Mak 14:27-31)*

³¹ Ma Yisu gic têku yom ma sôm, “Saimon, Saimon, Sadan ndac bu êñsahê mac nem akêñ whiñ bu gêñ ñandô me mba, gitôm lau sêwhê wît ñapa ti ñandô kôc. ³² Tigen aô gateñ mbec tu am-nga Saimon, bu am oc hu nem kêñ whiñ siñ dom. Ma tiñambu têtêm am nem daôm kwi, nan puc nem asidôwai dôñ.” ³³ Dec Pita sôm, “Pômdau, tôm ñac sêkêñ hêclu dasôc gapocwalô, me sêndic hêclu ndu, aô wahu am siñ dom.” ³⁴ Ma Yisu sôm, “Pita, aô wasôm têtêm am, ôbwêc dec am oc sêc aô ahuc tidim tö, ma tiñambu dalec oc tan.”

Ngacsêñjomi oc sêtap kisa sa

³⁵ Goc Yisu ndac ñac, “Têtêm ndoc aô kakiñ mac asa a bu anem mêtê lau, nan mac akôc talhi mone-nga, ti gata, ma atapa dom. Têtêm ndoc dinan mac apônnda daôm, me mba?” Ma ñac sêsôm, “Mba.” ³⁶ Goc Yisu sôm, “Kwahic dec ma ndi, mac nem talhi mone-nga me gata bu yêc, nan akôc sa. Ma mac nem bien balin bu mbasi, dec akêñ nem ñakwê awê-nga têtêm lau sênemlhi, goc akôc ña-awa ma anemlhi bien balin dan. ³⁷ Bu sêto yom dan yêc bocdec bu, ‘Sêlic iñ gitôm lau sac si dan.’ Yom dau hêganônñ aô, ma gic waê bu ñandô sa. Yomandô, yom nan sêto pi aô, nan oc ñandô sa.” ³⁸ Ma ngacsêñjomi sêsôm, “Pômdau lic! Bien balin lu dec sêyêc.” Ma Yisu sôm, “Gitôm.”

Yisu ten mbec yêc Lôc Olib
(Mat 26:36-46; Mak 14:32-42)

³⁹ Yisu ti ndê ngacsênomi sêhu malac Jerusalem sinj, ma sêsa sêtenj Lôc Olib si. Têm daêsam su sêkac sa sêmbo gamenj dinan. ⁴⁰ Inj hôc asê ma sôm têtj nac, “Atenj mbec bu lêtôm tap mac sa dom.” ⁴¹ Goc inj hu nac sinj ma sa nasawa saunj gi, pônj haduc ma tenj mbec bocdec bu, ⁴² “Damanj, am bu tac whinj, dec kôc lacihu nawapac-nga dindec su yêc aô. Tigenj êmkuc anenj tac whinj dom, kôm tôm am daôm nem atac whinj bu kôm.” ⁴³ Ma anjela undambê-nga danj hoc dau asê têtj inj, ma kôm inj licwalô sa. ⁴⁴ Yisu pô sim dau nandô, ma tenj mbec nanja, ma inj ndê wahrenj kêc sip nom gitôm dac.

⁴⁵ Inj tenj mbec su, goc tisa ma mbu têtj inj ndê ngacsênomi gi, ma gêlic bu nac sêyêc bêt sêyêc. Nac si nalôm nawapac kôm nac kwapac. ⁴⁶ Ma inj unj nac sa goc ndac nac, “Tu sake-nga mac ayêc bêt ayêc? Atisa mac atenj mbec bu lêtôm tap mac sa dom.”

Sêkôc Yisu dônj
(Mat 26:47-56; Mak 14:43-52; Jon 18:1-11)

⁴⁷ Yisu sôm yom dau mbo, ma ngacsênomi 12 si danj, nanj sêsam bu Judas, nanj hôc asê ma wê lau tonj atu sêwhinj inj. Inj kêsêlênj têtj Yisu bu ngutô inj, ⁴⁸ magoc Yisu ndac inj, “Judas, bocke? Am bu ngutô Namalac ndê Atu tu bu hoc inj asê, a?” ⁴⁹ Lau nanj sêmbo sêwhinj Yisu, nanj sêlic gêtj nanj bu hôc asê ma sêndac, “Pômdau, yac andic nac na bienj, a?” ⁵⁰ Ma nac si danj puc ndê bienj sa ma pa dabun-siga namata-nga ndê ngac akinj ndê danjgalaunj andô-nga su. ⁵¹ Magoc Yisu sôm, “Akôm bocdinanj dom!” Ma inj kêmasac ngac dau ndê danjgalaunj, ma kôm inj

ņayham sa. ⁵² Goc Yisu sôm tēņ dabuņsiga atu-tu ti lau bata, ma lau siņ sēyob lôm dabuņ-ņga, naņ sēmeņ bu sêkôc iņ dôn, “Bocke dec mac akôc bien ti gēņ siņ-ņga ma asa amen bu akôc aô dôn gitôm ngac kaņ daņ? ⁵³ Tôm bēc hon aô gambo gawhiņ mac yēc lôm dabuņ ņagameņ, ma mac akôc aô dôn dom. Tigeņ kwahic dec ti mac nem ndoc, ma ņaclai ņasec-ņga gēm gôliņ mac.”

Pita sêc Yisu ahuc

(Mat 26:69-75; Mak 14:66-72; Jon 18:15-18, 25-27)

⁵⁴ Ȧac sêkôc Yisu dôn, ma sêwê iņ sêtēņ dabuņsiga ņamata-ņga ndê andu si. Ma Pita kêkuc Ȧac mbo ahê. ⁵⁵ Yēc dabuņsiga dau ndê andu Ȧatuņlôm, lau Ȧatô sêkôm ya golom asê, goc sêndôc sêwhiņ dau ma sêņsulu. Ma Pita gi ndôc sic whiņ Ȧac. ⁵⁶ Awhê akiņ daņ gêlic Pita ndôc ya Ȧawê, goc tahê iņ ma sôm, “Iņ ngac dindec iņ kêkuc Yisu whiņ.” ⁵⁷ Tig eņ Pita pa dau ma sôm, “Awhê! Aô kayalê iņ dom!”

⁵⁸ Ȧasawa sauņ ma Ȧamalac daņ gêlic iņ ma sôm, “Am lau naņ sêņkuc iņ, naņ si ngac daņ!” Ma Pita ô yom ma sôm, “Am ngac, mba!”

⁵⁹ Acgatu Ȧasawa daņ meņ gi su, ma Ȧamalac daņ tiyham sôm ti Ȧaņga, “Ȧgac dindec iņ kêkuc Yisu whiņ! Yomandô! Bu iņ ngac Galili-ņga.” ⁶⁰ Magoc Pita sôm, “O ngac daôm! Aô kayalê yom naņ am sôm, naņ Ȧahu dom!” Iņ sôm yom dinaņ mbo, ma mbac dalec taņ. ⁶¹ Ma Pômdau kac dau kwi ma tahê Pita, ma Pita gauc gēm yom naņ Pômdau sôm tēņ iņ bocdec bu, “Ôbwêc dindec am oc sêc aô ahuc tidim tō, ma tiņambu mbac dalec oc taņ.” ⁶² Goc iņ sa awê gi, ma taņ dau ndu.

Lau siŋ-ŋga sêsu Yisu susu
(Mat 26:67-68; Mak 14:65)

⁶³⁻⁶⁴ Lau siŋ-ŋga nan sêkôc Yisu dôn, nan sic hu sêsu in susu. Sêkic in tandô ahuc ŋa po, goc sêtap in ma sêndac, “Am bu propet, dec sôm asê bu asa dec tap am?” ⁶⁵ Ma sêpu in ti sêngwiniŋ in ŋa yom sac daêsam.

Lau bata Israel-ŋga sêmatôc Yisu
(Mat 26:63-68; Mak 14:61-65)

⁶⁶ Têŋ bêbêc ganduc lau bata Israel-ŋga, ma dabuŋsiga atu-tu ti lau Skraib sêkac sa sêpitigen, ma sêkêŋ Yisu kalhac ŋac aŋgô-ŋga. Ŋac sêsôm têŋ in, ⁶⁷ “Am bu Mesaya dau, dec sôm têŋ yac!” Ma Yisu sôm têŋ ŋac, “Aô bu wasôm, dec mac oc akêŋ whiŋ aô dom, ⁶⁸ ma aô bu wakêŋ gêndac dan têŋ mac, dec mac oc aô aneŋ yom dom. ⁶⁹ Tigen, têŋ kwahic dec ma ndi, Ŋamalac ndê Atu oc ndôc Anötô Ŋaclai Ŋadau ndê amba andô-ŋga.” ⁷⁰ Ma ŋac hoŋ sêsôm, “Bocdinaŋ, am sôm bu am Anötô ndê Atu, a?” Ma Yisu sôm, “Mac asôm solop bu aô dauŋ dindéc.” ⁷¹ Goc sêsôm têŋ dandi, “Yac danŋgô yom nan in dau sôm su. Dapônda yom dan tu tangôlin pi in-ŋga dom.”

23

Pailot kêsu Yisu
(Mat 27:11-26; Mak 15:2-15; Jon 18:29–19:16)

¹ Goc lau hoŋ dinaŋ sêtisa ma sêwê Yisu sêtêŋ Pailot si. ² Ma ŋac sêngôlin yom pi in, ma sêsôm, “Ŋgac dindéc gêli lau Israel-ŋga ŋalôm sa. In sôm bu lau sêkêŋ takis têŋ Sisa dom, ma in toc dau sa ma sam dau bu Mesaya, kin nan lau Israel-ŋga sêkêŋ

bata.” ³ Goc Pailot ndac Yisu bocdec bu, “Am lau Israel-nga si kin, a?” Ma Yisu sôm, “Tôm nan am daôm sôm.” ⁴ Dec Pailot sôm asê têt dabujsiga atu-tu ti lau hon, “Aö gatap ngac dindec ndê giso dan sa dom, bu tamatôc in pi-nga.” ⁵ Tigen nac sêsôm ti nanga, “In kêdôhôn lau ma gêli nac si nalôm sa yêc gamen Judia-nga hon. In gic hu yêc gamen Galili-nga ma kôm napan e men têt gamen dindec.”

Pailot kêkin Yisu têt Herod Antipas

⁶ Têt ndoc Pailot ngô yom dinan, nan in ndac nac bu Yisu in ngac Galili-nga, me mba. ⁷ Ma in tap sa bu in ngac Galili-nga, dec kêkin in têt Herod gi. Herod in ngac nan gêm gôlin gamen Galili-nga, ma in mbo malac Jerusalem têt têt dinan. ⁸ Têt têt Herod gêlic Yisu, nan in tac nayham atu, bu nasawa balin su in tac whin bu lic in. In ngô nawê pi Yisu su, ma kêk bata bu lic in kôm gêt dalô dan. ⁹ In kêk gêndac daêsam têt Yisu, magoc Yisu ô yom dom.

¹⁰ Têt dinan dabujsiga atu-tu ti lau Skraib sêtisa ma sêngôlin yom pi in ti nanga. ¹¹ Goc Herod ti lau sin-nga sêsu Yisu susu ma sêngwinin in. Sêkên in sôc nakwê balin gitôm kin sêsôc, ma sêkin in mbu têt Pailot gi. ¹² Mun-nga Herod lu Pailot sêkên kisa dau, magoc acsalô dinan inlu sêhê silip dandi.

Pailot bu êngapwêc Yisu

¹³ Pailot mbwêc dabujsiga atu-tu ti lau bata ma lau Israel-nga natô sêpitigen, ¹⁴ ma sôm têt nac, “Mac akôc ngac dau atên aö amen, ma asôm bu in gêli lau nalôm sa. Aö kasahê in yêc mac anôm-nga, ma gatap sa bu yom nan mac angôlin pi in, nan nahu mba. ¹⁵ Ma Herod bocdinan, bu in kêkin

in mbu tɛn yac mɛn. Bocdinaŋ wasôm tɛn mac bu ŋgac dau kôm giso dan dom bu dandic in ndu. ¹⁶⁻¹⁷ Tu dinaŋ-ŋga aô wakêŋ aneŋ lau sêhi in ŋa sô, ma sêhu in siŋ lhô ndi.” ¹⁸ Magoc ŋac sêmbwêc atu sêwhiŋ dau bu, “Kôc in sa ma ndic in ndu! Ma hu Barabas siŋ tɛn yac.” ¹⁹ Barabas in ŋgac naŋ ndôc gapocwalô tɛn ndoc dinaŋ, bu in kɛgilí lau bu sêndic siŋ, ma in gic lau ŋatô ndu. ²⁰ Magoc Pailot tac whiŋ bu êngapwêc Yisu su, dec sôm yom ŋaŋga tiyham bu nem ŋac si ŋalôm kwi. ²¹ Magoc ŋac sêmbwêc yom ŋapaŋ, “Ndic in pi a gicso dau! Ndic in pi a!” ²² Goc Pailot sôm tɛn ŋac tidim tō-ŋga, “Tu sake-ŋga? In kôm giso bocke? Aô gatap yom dan sa pi in dom, bu dandic in ndu. Bocdinaŋ aô wakêŋ aneŋ lau siŋ-ŋga sêndic in ŋamlic ŋandê, ma wahu in siŋ.” ²³ Tigeŋ ŋac sêmbwêc hôc ahuc ŋapaŋ, bu sêndic in pi a gicso dau. Ma sêmbwêc yom dau e Pailot sôc ŋapu. ²⁴ In gôlôc ma sôm tɛn lau siŋ-ŋga bu sêkôm gitôm lau dau si yom. ²⁵ Barabas, ŋac siŋsêlêc naŋ ndôc gapocwalô tu in gic lau ndu-ŋga, naŋ sêŋgapwêc in su tôm lau sêndac. Magoc Yisu, naŋ sêtec, naŋ Pailot kêkin in tɛn lau siŋ-ŋga bu sêndic in ndu.

Sic Yisu pi a gicso dau

(Mat 27:32-44; Mak 15:21-32; Jon 19:17-27)

²⁶ Ŋac sêwê Yisu sêsa si, ma yêc seŋ sêtap ŋgac dan ŋaê Saimon sa. In ŋgac malac Sairin-ŋga,* ma in kêsêlêŋ mbo seŋ akêŋ gameŋ ŋamakê-ŋga bu tɛn Jerusalem ndi. Lau siŋ-ŋga sêkôc Saimon ma sêkêŋ in kêbalaŋ a gicso dau kêkuc Yisu.

* **23:26:** Sairin - malac dan naŋ yêc Not (North) Afrika.

²⁷ Lau daêsam sêhkuc Yisu si, ma lauwhê natô sêwhiŋ ɲac, sêhu danjibo asê pi iŋ ma sêtaŋ. ²⁸ Goc Yisu kac dau kwi ma sôm têt ɲac, “Mac lauwhê Jerusalem-ŋga, ataŋ aô dom! Tigen ataŋ tu daôm-ŋga, ma tu mac nem balêkoc-ŋga. ²⁹ Bu ndoc ɲawapac-ŋga oc meŋ sa, naŋ mac oc asôm bu iŋ gêt ɲayham bu lauwhê natô ɲac lauwhê gapoc ma sêkôc balêkoc me sêkêt su têt balêkoc dom. ³⁰ Têt ndoc dinaŋ, lau oc tac whiŋ bu lôc dan tip meŋ ma êngatôc ɲac si. ³¹ Gêt naŋ kwahic dec sêkôm têt aô, naŋ gitôm sêkêt ya gêt a batat. Bocdinaŋ ahêgo daôm pi gêt ɲac oc sêkôm tiŋambu-ŋga, oc nditôm sêkêt ya neŋ a basô.”

³² Lau siŋ-ŋga sêwê ɲgac sac lu sêwhiŋ Yisu, bu sêndic iŋlu ndu sêwhiŋ iŋ. ³³ ɲac sêsa si e sêhôt asê gamet naŋ sêsam bu ɲakêcyha, ma yêc dinde ɲac sic Yisu pi a gicso dau. Ma sic ɲgac sac lu sêpi a gicso sêwhiŋ Yisu, dan kêgalêt andô-ŋga, ma dan kêgalêt gasê-ŋga. ³⁴ Têt dinaŋ Yisu tet mbec ma sôm, “Damaŋ, suc anet ɲacyo si sac kwi, bu ɲac sêŋyalê gêt naŋ sêkôm, naŋ dom.” Tiŋambu lau siŋ-ŋga sêpuc gapoc bu sêlic ɲac si asa oc kôt Yisu ndê ɲakwê.

³⁵ Lau daêsam sêlhac ma tahê Yisu, ma lau bata Israel-ŋga bocdinaŋ. Sêlhac ti sem tô iŋ ma sêsôm, “Iŋ gêm lau natô sa. Iŋ bu Mesaya naŋ Anôtô kêyalin sa, naŋ nem dau si maŋ.” ³⁶ Ma lau siŋ-ŋga sêtigasuc ma sêsu iŋ susu boc-dinaŋ. Sêkêt wain ɲamakic têt iŋ, ³⁷ ma sêsôm, “Am bu lau Israel-ŋga si kin, naŋ goc nem daôm si.” ³⁸ ɲac sêto yom kalhac iŋ ndê a gicso dau ɲahô, naŋ sôm, ‘Lau Israel-ŋga si Kin dindec.’

³⁹ Ngac sac dan nan kêgalên a gicso dau kêpin Yisu, nan su in susu ma sôm, “Am Mesaya dau, a? Bocdinañ dec nem daôm si, ma nem alu si awhin!”

⁴⁰ Tigen ngac sac tilu-nga hec yom in, ma ndac, “Am töt Anötö, me mba? Yac lau tö dakôc ngâyô tigen.

⁴¹ Hêclu dakôc ngâyô solop, bu hêclu dakôm sac. Magoc ngac dindec kôm giso dan dom.” ⁴² Goc in sôm têt Yisu, “Yisu, têt ndoc am ndöc nem pôn kin-nga, nan gauc nem aö.” ⁴³ Ma Yisu ô yom ma sôm têt in, “Aö wasôm yomandô têt am bu acsalô lec am oc ndöc †Paradais whin aö.”

Yisu mbac ndu

(Mat 27:45-56; Mak 15:33-39; Jon 19:28-30)

⁴⁴ Têt ac kalhac lhu, nasec gêm gamen sambuc ahuc e acgatu gitôm 3 kilok telha-nga, ⁴⁵ bu ac gêm ganduc. Ma po baliñ nan kêgalên lôm dabun ñalôm, nan dau kic gi lu. ⁴⁶ Têt ndoc dinañ Yisu mbwêc awha atu ma sôm, “Damañ, aö gakên anen gatuñ sip am amam!” In sôm yom dinañ su, goc mbac ndu.

⁴⁷ Ngac bata sin-nga gêlic gêt hon dinañ, ma kêpin Anötö ma sôm, “Yomandô! Ngac dindec in ngac gitên!” ⁴⁸ Ma lau daêsam nan sêkac sa su bu sêlic lau sin-nga sic Yisu pi a gicso dau, nan sêlic gêt hon dinañ e kôm ñac si ñalôm ñawapac, dec sêndahin ñasu ma sêlhö si. ⁴⁹ Ma lau hon nan sênjalê Yisu, ma lauwhê nan sênkuc in akên gamen Galili-nga, nan sêlhac ahê ma sêlic gêt dinañ.

Josep kên Yisu ndê ñamlan yêc hoc ñasun

(Mat 27:57-61; Mak 15:42-47; Jon 19:38-42)

⁵⁰⁻⁵¹ Ngac dan mbo, nan ndê ñaê Josep. In ndê malac Arimatiya yêc gamen Judia-nga, ma in ngac

ņayham ma gitêņ naņ kên bata Anötö ndê gôlin bu meņ sa tiawê. In lau †Sanedrin-ņga si daņ, tigen in ņalôm whin yom naņ ņac sêkic pi Yisu bu sêndic in ndu, ti gêņ naņ sêkôm têņ in, naņ dom. ⁵² Têņ telha dinan in têņ Pailot gi, ma ndac Yisu ndê ņamlan. ⁵³ Goc in kôc in su yêc a gicso dau, kêpaņ in ņa po ņayham daņ, ma kên in yêc sêhô daņ. Lau sêlêņ sêhô dinan gwanan su yêc hoc daņ ņalôm, ma sêkên ņgac batê daņ yêc sêhô dau mun su dom.

⁵⁴⁻⁵⁵ Lauwhê naņ mun-ņga sêņsêlêņ sêwhin Yisu têņ ndoc in meņ akêņ gamen Galili-ņga, naņ sêņkuc Josep si, ma sêlic sêhô dinan ti gamen naņ Josep kên Yisu ndê ņamlan yêc naņ. Tigen bêc dinan in lau Israel si bêc sêmasan dau tu sêlic om-ņga, ma ndoc Sabat-ņga meņ kêpin. ⁵⁶ Bocdinan lauwhê dinan sêmbu sêtêņ si andu si, ma sêmasan bu ņamalu ti gêņ ņatô bu sênem oso Yisu. Ma têņ bêc Sabat-ņga, ņac sêņwhan dau tôm yomsu Sabat-ņga sôm.

24

Yisu tisa

(Mat 28:1-10; Mak 16:1-13)

¹ Sabat meņ gi su, ma têņ wake ņabêc ņamata-ņga, goc lauwhê dinan sêti têņ bêbêc ganduc. Sêkôc gêņ ņamalu naņ sêmasan su, ma sêsa sêtêņ sêhô dau si. ² Ma sêlic bu hoc atu naņ Josep kêpi gi tin sê awha, naņ ndôc ņamala dom. ³ Dec sêšôc si, magoc sêtap Pômdau Yisu ndê ņamlan sa dom. ⁴ Sêlhac ma sêhêdaê, ma ņgac lu ti ņakwê ņawasi atu, sêhoc dau asê ma sêlhac sêwhin ņac. ⁵ Dec lauwhê sêtôc dau, ma sêwec aņgô andô têņ nom. Ma ņgac lu sêšôm têņ ņac, “Tu sake-ņga mac aņsalê in naņ mbo tali,

yêc lau batê si mala? ⁶ Inj mbo lec dom, inj tisa su. Gauc nem yom nanj inj sôm têñ mac munj su, têñ tēm inj mbo gameñ Galili-nga. ⁷ Inj sôm bu lau oc sêhoc Njmalac ndê Atu asê ma sêkêñ inj sip lau sac si amba, ma njac oc sêndic inj pi a gicso dau, ma têñ bêt titö-nga inj oc tisa tiyham.” ⁸ Goc lauwhê dinanj gauc gêm yom nanj Yisu sôm munj su. ⁹ Ma njac sêhu sêhò dau sinj ma sêmbu sêtêñ Jerusalem si, ma sic minj yom honj dinanj têñ njacsêñomi 11, ma têñ lau honj nanj munj-nga sêñkuc Yisu.

¹⁰ Lauwhê dau si njê bocdec. Maria Magadala, Joana, ma Jems dinda Maria, ma lauwhê njatô sêwhinj. Njac sic minj têñ lau aposel, ¹¹ magoc aposel sêngô yom dau gitôm yom njambwa, ma sêkêñ whinj dom. ¹² Goc Pita tisa ma kêtî têñ sêhò gi. Inj wec bu tôc gwaninj sêhò njâlôm, dec inj gêlic po njambwa nanj yêc. Goc inj kôlhô gi ma gauc gêm yom daêsam pi gêñ honj dinanj.

Yisu hoc dau asê têñ njacsêñom lu

¹³ Têñ bêt tigenj dinanj njac-sêñom lu sêñsêlêñ sêmbò senj bu sêtêñ malac Emeyas sêndi. Senj akêñ Jerusalem têñ Emeyas, nanj njasawa gitôm kilometa 11. ¹⁴ Injlu sem yomgalôm têñ dandi, pi gêñ honj nanj hôc asê têñ tēm dinanj. ¹⁵ Sêñsêlêñ ti sem yomgalôm sêmbò, ma Yisu dau menj kêsêlêñ whinj injlu. ¹⁶ Tigenj Anötô kôm injlu tandô njâlêñ kainj danj sa, dec sêñyalê inj dom. ¹⁷ Ma inj sôm têñ injlu, “Yom bocke dec amlu asôm têñ daôm ma anjêlêñ ambo senj?” Goc injlu sêkwê dônj sêlhac, ma sêwec. ¹⁸ Ma injlu si danj nanj sêsam bu Kliopas ô yom ma sôm, “Njaclej honj nanj sêmbò Jerusalem têñ tēm dindec, nanj sêñyalê gêñ nanj hôc asê. Bocke dec am kêyalê dom?” ¹⁹ Ma

Yisu ndac, “Gêñ sake?” Ma sêsôm têt in, “Gêñ nan hóc asê Yisu Nasaret-nga. Ngac dau in propet dan, ma in kôm gêñ ma sôm yom ti ñaclai atu yêc Anötö ma ñamalac hon angô-nga. ²⁰⁻²¹ Ma yac akên batan su, bu mboe in Mesaya nan Anötö oc êñkin bu êñgaho lau Israel-nga su yêc lau Rom-nga amba. Tigen yac mba dabun-siga atu-tu ti lau bata Israel-nga sêkên in têt lau Rom-nga bu sêmatôc in, ma ñac sêkic yom bu in mbac ndu, ma sic in pi a gicso dau. Gêñ hon dinan hóc asê in, ma kwahic dec bêc tö giñga su. ²² Ma bêbêc lec yac mba lauwhê ñatô sêsôm yom nan kôm yac hon asö. Têt bêbêc ganduc, ñac sêtên sêhó si, ²³ magoc sêtap in ndê ñamlan sa dom. Sêmbu sêmen, ma sêsôm bu añela sêhoc dau asê têt ñac, ma sêsôm têt ñac bu Yisu mbo tali. ²⁴ Lau ñatô nan sêmbu sêwhin yac, nan sêsa sêtên sêhó si, ma sêtap gêñ hon sa tôm lauwhê dau sêsôm, magoc sêlic Yisu dom.”

²⁵ Goc Yisu sôm têt inlu, “O mac lau! Mac nem gauc sa dom. Lau propet sêhoc yom asê pi gêñ hon dinan gwanan su, magoc mac akên whin gwalec! ²⁶ Sêhoc yom asê ma sêsôm bu Mesaya gic waê bu hóc ñawapac hon dinan, ma tinambu tap in ndê ñawasi sa.” ²⁷ Ma Yisu whê inlu si gauc sa pi yom hon nan Moses ti lau propet sêto hêganôn in, e in whê Anötö ndê yom hon nan sêto gwanan pi in, nan sa têt inlu.

²⁸ Ñac sêsun sa malac Emeyas, ma Yisu kôm bu hu inlu sin, ma êñsêlên gacgen ndi. ²⁹ Magoc sêten in ti ñanga, ma sêsôm, “Mbo whin alu, bu ac pacndê ma sauñ oc ôbwêc sa.” ³⁰ Dec Yisu sôc malac dau gi, bu mbo whin inlu. Ma têt ndoc sêndôc sic bu

sêneŋ gêŋ, naŋ Yisu kôc bolom sa, gêm danŋe ma pô kôc, goc kêŋ têŋ iŋlu. ³¹ Ma iŋlu si tandô ŋawa sa, dec sêŋyalê iŋ. Ma ŋagahô eŋ Yisu aŋgô mba. ³² Ma iŋlu sêsôm têŋ dandi, “Yomandô. Têŋ ndoc iŋ sôm yom têŋ hêclu yêc seŋ, ma whê Anötô ndê yom naŋ sêto yêc, naŋ sa, dec kôm hêclu neŋ ŋalôm kac hêclu ŋandô.” ³³ Goc iŋlu sêtisa ŋagahô, ma sêlhô sêmbu sêtêŋ Jerusalem si. Ma sêtap ŋgacsêŋomi 11 sa, ti lau ŋatô naŋ sêmbu sêwhiŋ ŋac. ³⁴ Ma ŋgacsêŋomi sêsôm têŋ iŋlu, “Pômday tisa yomandô, ma iŋ hoc dau asê têŋ Saimon!” ³⁵ Goc iŋlu sic miŋ yom pi gêŋ naŋ hôc asê yêc seŋ, ma bu iŋlu sêŋyalê Yisu têŋ ndoc iŋ pô bolom kôc.

Yisu hoc dau asê têŋ sêŋomi hoŋ

³⁶ Sêsôm yom dinaŋ sêmbu, ma Yisu hoc dau asê ma kalhac ŋac aŋgô-ŋga, ma sôm têŋ ŋac, “Yom malô whiŋ mac.” ³⁷ Ŋac sêsô ti sêtôc dandi ŋandô, bu ŋac gauc gêm bu sêlic ŋalau danŋ. ³⁸ Ma iŋ sôm têŋ ŋac, “Tu sake-ŋga mac nem ŋalôm ŋawapac, ma gauc gêm yom daêsam?” ³⁹ Alic aman ti gahiŋapa, bu aô dauŋ dindec. Amasec aô, ma alic. Ŋalau si ŋamsôm ti ŋakwa mbasi, magoc alic aô neŋ.” ⁴⁰ Iŋ sôm yom dinaŋ, goc tôc amba ti gahiapa têŋ ŋac.

⁴¹ Ŋac atac ŋayham babalec, magoc ŋac gauc gêm yom daêsam, ma atac lu-lu bu gêŋ naŋ hôc asê, naŋ gêŋ ŋandô, me mba. Goc iŋ ndac ŋac, “Mac nem gêŋ danêŋ-ŋga ndôc?” ⁴² Ma sêkêŋ i tô danŋ naŋ sêpec su, naŋ têŋ iŋ. ⁴³ Ma iŋ kôc su, ma gêŋ yêc ŋac si aŋgô-ŋga. ⁴⁴ Goc iŋ sôm têŋ ŋac, “Gauc nem bu aô gasôm yom têŋ mac muŋ su, pi gêŋ naŋ kwahic dec ŋandô sa. Têŋ ndoc aô gambo gawhiŋ mac, naŋ gawhê sa bu gêŋ hoŋ naŋ sêto pi aô yêc Moses ma

lau propet si bapia tilhun, ma yêc Buku Wê-nga, nan gic waê bu nandô sa.” ⁴⁵ Ma in whê nac si gauc sa pi Anötö ndê yom hon nan sêto yêc. ⁴⁶ In sôm têñ nac, “Sêto yom pi Mesaya bu in oc hôc nandê atu ma mbac ndu, ma têñ bêc titö-nga in oc tisa ma mbo tali tiyham. ⁴⁷ Ma sêto bu lau oc sênem mêtê tu in ndê ñaê-nga, ma sêsôm têñ lau bu sêkac si ñalôm kwi, dec Anötö oc suc nac si sac kwi. Nac oc sêndic hu sênem mêtê dau yêc malac Jerusalem, ma tinambu mêtê dau oc sa têñ lau gameñ apa-nga hon. ⁴⁸ Gêñ hon dindêc mac alic gatô su, dec oc ahoc yom nandô asê pi gêñ dau awhin. ⁴⁹ Ma alic! Aô oc wakên gêñ nan aneñ Damañ gic bata su, nan têñ mac. Bocdinañ ambo malac dindêc e Anötö kêñ in ndê ñaclai nem mac ahuc.”

Yisu pi undambê gi

⁵⁰ Tinambu Yisu wê nac sêsa sêtên gameñ nan yêc kêpiñ malac Betani si. Yêc dinañ in hôc amba sa, ma gêm mbec nac. ⁵¹ Ma têñ têm in gêm mbec nac mbo, nan in hu nac sin, ma Anötö kôc in sa pi undambê gi. ⁵² Dec nac sêpôn haduc ma sêmpin in. Ma sêlhô sêmbu sêtên Jerusalem si ti atac ñayham atu. ⁵³ Ma tôm bêc hon, sêkac sa sêmbu lôm dabun ñabatêmdö, ma sêhoc Anötö ndê waê asê.

Anötö ndê Yom Lêñsêṁ Wakuc
The New Testament in the Bukawa language of Papua
New Guinea

Nupela Testamen long tokples Bukawa long Niugini

copyright © 2000 Lutheran Bible Translators Australia

Language: Bukawa

Translation by: Lutheran Bible Translators Australia

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-13

PDF generated using Haiola and XeLaTeX on 11 Nov 2022 from source files dated 9 Oct 2020

545e5ca3-1e95-59e4-8380-93951e023cf7